

प्रबोधचन्द्रोदय नाटक.
(भाषा)

॥ श्रीः ॥

प्रबोधचन्द्रोदयनाटक ।

कविगुलाबसिंहकृत.

जिसको ।

पं० गुरुप्रसादउदासीनने गुरुमुखी अक्षरोंसे
देवनागरीमें टिप्पणीसहित उद्धृत किया ।

वह

मुमुक्षुजनोंके हितार्थ,
खेमराज श्रीकृष्णदासने
बंबई

निज “श्रीवेङ्कटेश्वर” (स्टीम्) यन्त्रालयमें

छापकर प्रसिद्ध किया ।

संवत् १९८०, शक १८४९,

सर्वाधिकार “श्रीवेङ्कटेश्वर” यन्त्रालयाधिकारिने
स्वाधीन रक्खाहै ।

यह पुस्तक खेमराज श्रीकृष्णदासने बम्बई खेतवाडी ७ वीं गली खम्बाटा लैन्
निज "श्रीवेंकटेश्वर" स्टीम प्रेसमें अपने लिये छापकर यहाँ प्रकाशित किया ।

विज्ञापन ।

विदित हो कि शान्तरसप्रधान गौणतया शृंगारादि अखिलरसोंसे संयुक्त अध्यात्मविद्या विरोधि नानापाखण्डमतोंके सिद्धांतोंको उच्छिन्न करताहुआ संस्कृतमें प्रबोधचन्द्रोदय नामा नाटक इस धरामण्डलमें सर्वोपरि वर्तमान है सो संस्कृतमें अतिकठिन होनेसे भाषाके अभिज्ञजनोंको दुर्विज्ञेय जानकर कवि गुलाबसिंहजीने भाषामें दोहा सवैया कवित्त खोरठों करके अनुवाद किया है-इस नाटकमें प्रायः वेदांतका सर्वस्व सन्निविष्ट है और इसमें ऐसी सुगमरीतिसे ब्रह्मात्म्यैक्यत्वका प्रतिपादन किया है कि, मन्दवैराग्यवाले पुरुषभी इस ग्रन्थके विचारसे अध्यात्मतत्त्वका लाभ कर सकते हैं-यद्यपि उक्त कविजीकी भाषा बहुत सुगम और साधारण पुरुषोंकोभी समझने योग्य है-तथापि-कहीं कहीं स्थलविधे विषयको अतिकठिन होनेसे गुरुओंके विना स्वयं समझना अशक्य है ऐसा जानकर और अधिकारीजनोंको विचारपूर्वक इस ग्रन्थके अवलोकनसे बोधोत्पत्तिके अर्थ भीसाधुवेलाके निवासी परमदयालु पण्डित गुरुप्रसादजीने इसग्रन्थको शुद्ध करके तथा इसके नीचे बड़े परिश्रमसे श्रुति स्मृति पुराण वचनोंको उद्धृत करके तथा तिनका अर्थ अतिसुगम रीतिसे दर्शायकर संस्कृत प्रबोधचन्द्रोदयनाटकके अनुसार संक्षिप्ताक्षरी टिप्पणीरूपसे प्रगट करके तथा पण्डित जीने इस टिप्पणीसहित ग्रन्थको तयार करके निज श्रीगुरुश्री १०८मान् परमहंसपरमानन्दजीके चरणपङ्कजोंमें समर्पण किया है । अब आशा है कि इस ग्रन्थप्रतिपाद्यविषयके मनन करनेसे अधिकारी जन आवरण शक्तिविशिष्ट अज्ञाननिवृत्तिपूर्वक परमानन्दकी प्राप्तिरूप जीवनमुक्तिके सुखका अनुभव करतेहुए पण्डितजीके परिश्रमको सफल करेंगे इति शङ्क-

भक्तजनोंका कृपाकांक्षी-

खेमराज श्रीकृष्णदास.

नाटक पात्र ।

सूत्रधार	नाटकभाचार्य.	महामोह	विवेकशत्रु.
नटी	तिसकीपत्नी.	चार्वाक	मोहकामित्र.
विवेक	प्रधाननायक.	काम, क्रोध, लोभ, } ये महामोहके वजीर हैं	
मति	तिसकीपत्नी.	दम्भ, अहंकार.	
वस्तुविचार	विवेककिंकर.	मन	संकलपात्मक.
सन्तोष	तिसकासहचर.	शिंगंवर, भिक्षु. } ये बुद्धजैनादि मत्सके	
पुरुष	उपनिषद्स्वामी.	क्षपणक, कपालिक } प्रवतक हैं	
प्रबोधउदय	पुरुषपुत्र.	मिथ्यादृष्टि	मोहपत्नी.
श्रद्धा	सात्विकी, राजसी, तामसी ३प्र.	विभ्रमावती	तिसकीसखी
शांति	विवेकभगिनी.	रति	कामपत्नी.
करुणा	शांतिकीसखी.	हिंसा	क्रोधपत्नी.
मैत्री	श्रद्धासखी.	तृष्णा	लोभपत्नी.
विष्णुभक्ति	उपनिषत्सखी.	बुद्ध, शिष्य, } ये दूसरे हैं	
उपनिषद्	वेदांतशास्त्र.	पुरुष, दौवारिक.	
सरस्वती	विष्णुभक्तिकीसखी.		
क्षमा	विवेकदासी.		
वैराग्य, निदिध्यासन, } मनके पुत्र.			
संकल्प			
परिपार्श्वक, पुरुष, } ये दूसरे हैं.			
सारथी, प्रतिहारी			



श्रीगणेशाय नमः ।

ॐ तत्सद्ब्रह्मणे नमः ।

अथ श्रीमत्कवि गुलाबसिंह कृत-
प्रबोधचन्द्रोदय नाटक भाषा प्रारम्भ ।

दोहा ।

गौरीपुत्र गणेशपद, वन्दों वारंवार ॥
कार्य कीजिये सिद्ध मम, देहु सुबुद्धि उदार ॥ १ ॥
जाके नाम प्रतापते, जलपर शैल तराहिं ॥
बहरघुनायक दासके, सदा बसै मनमाहिं ॥ २ ॥
गुरुनानक गोविन्द गुरु, जासम और न कोइ ॥
अभिवन्दन पदकमल तिन, जोर सदा कर दोइ ॥ ३ ॥
भारत भूमिपुनीत पद, तपोज्ञान अवतार ॥
मानसिंह गुरुको नमो, तारण करुणासार ॥ ४ ॥

नराज छन्द ।

प्रबोधचन्द्र नाटकं, सुबोधग्रन्थ मैं करों ॥
अलंब साधु संगको, विचार चित्तमें धरों ॥
सुनै पढै सुजे जना, निवार मोह बन्धना ॥
लहै अपार मोक्षको, दुटै समस्त फन्दना ॥ ५ ॥

सवैया ।

भूपन बोध सुबोध नहीं अति कौतुक माहिं रहें लपटाए ॥
बोध बिना जगमोक्ष कहां इम संतसभै मुखवेद अलाए ॥

१ ग्रन्थकी निर्दिष्ट समाप्ति रूप । २ आदि अन्तके ग्रहणसे दशों बाद-
शाहोंका ग्रहण करना । ३ ऋते ज्ञानात् सुक्तिः । ज्ञानादेवमुक्तैव ह्यम् । इत्यादिवेद ॥

अंतसमै यम दीनकरे तिन हेर महा करुणारस आए ॥
 बोध उपावन हेत मनो नरनाहनके इह ग्रन्थ बनाए ॥६॥
 भानुमरीचि सुनीर सम पुनि जा अज्ञान जगत्त बनायो ॥
 वायु अकाश सुपावक नीर मही पुनि लोक सुतीन उपायो ॥
 जाहिं पिखेरजुसांपजिमें जग फेरस भोतिन माहिं बिलायो ॥
 उज्जल आतम बोध महा हम आनंद सो उर माहिं धियांयो ॥७॥
 प्रेत्यकूज्योति सनातन जो जग व्याप रही सभ माहिं सुहाई ॥
 रिदशांत विषे अति भासत है कृत संयम को जिह आनन्द ताई ॥
 विधु चूड निरोध सुवायु भले ब्रह्मरन्ध्र हते अति ऊँच चलाई ॥
 दृगती सरव्याज सुभाल विषे शिव संयम वन्त सु आप दिखाई ॥८॥

दोहा ।

कीरतिवरमा नाम जिह भूपति बडो रसाल ॥
 ताहि सभामें विमलमति, आहि प्रधान गुपाल ॥ ९॥
 वर्ष एक नाटक तहां, भयो सुसभामंझार ॥
 जाको हेर सुज्ञान लहि, भये भूप भवपार ॥ १० ॥
 याकों सुने जु कानमें, नीके चित्त लगाइ ॥
 आसुर संपति दूर तज, वेगज्ञान बहु पाइ ॥ ११॥

सूत्रधार उवाच स्वपत्नी प्रति ॥

सवैया ।

बहुबातनको कछु कामनहीं अब आय सुमोहिं गुपाल दई ॥
 सभ भूपति जांमुकुटामणिके पदपंकज आरती आनि कई ॥

१ अविद्या तत्कार्यमलरहितस्वप्रकाशरूप । २ सेवते हैं अर्थात् उपासते हैं ।
 ३ अन्त जड दुःखरूप अहंकारादिकों से प्रतिकूल होय कर अर्थात् सत्यज्ञानान्दादिरूप कर
 जो प्रकाश सो कहिये प्रत्यक सोई होवे ज्योति कहिये प्रकाशरूप सो कहिये प्रत्यक ज्योति ॥

प्रबलारिसमूहमहीपनके उरपाटनको नरसिंहमई ॥
 बलभूपतिसिंधुधसी धरनी इन फेर वराहउधारलई ॥ १२ ॥
 दिगनारविलासनिकाननमें जिहकीरतिके श्रुतिटंक बनाए ॥
 सभदिग्गजकानमुतालबडेविधताहिसफालनपौनउपाए ॥
 तिहसंगमिले अतिनाचत है भवताहिप्रताप सुज्वालबढाए ॥
 तिन आप गुपाल सुएहकह्यो वहुनाटक भूपति देहु दिखाए ॥ १३ ॥

दोहा ।

सहज सुहृदस्वभाव यह, कीरतिवरमा भूप ॥
 ताहित उदम थोकियो, दिग्जयपरमअनूप ॥ १४ ॥
 ताव्यापारअंत्रतभयो, परमानन्दहमार ॥
 विविधविषयरसपरसकर, भये मनोजविकार ॥ १५ ॥
 ताव्यापारदूषितमनो, वासर दये विताय ॥
 कृतकृत्यभये सुआजहम, भूपतिराजदिवाय ॥ १६ ॥

सवैया ।

प्रसिद्ध अमातनभूपतिके सुविपक्षवलीनृप मारगिराए ॥
 रक्षपालकरी सगली धरणी पुनि याहिकि सीसह छत्र फिराये ॥
 सुपयोनिधिमेखलयाहधराशिर भूपनके इनराज ठराए ॥
 रस शांति प्रयोग निवेदनकै जग आपविनोदकरेइमभाए ॥ १७ ॥

१ दिग्गजोंके कानोंरूपीतालोंकर उत्पन्नभया जो बहुत पवन । २ तिसपवनके साथ वृद्धिको प्राप्तहोयकर संसारमें प्रवृत्तहोरहाहै प्रतापरूपअग्निजिसका । ३ गोपाल । ४ शत्रु । ५ शांतिरसहै प्रधानजिसमें ऐसाजोनाट्यानुकरण तिसके निवेदन कहिये जनावनकरकै ॥

कवित्त ।

प्रबोधचन्द्रनाटकं सुआहिनटतोहिदिग,
 कृष्णमिश्रआपजोईपूरबबनायोहै ॥
 कीरतिवरमके समीप सोई नाटकरो,
 हेरनको भूपतिको मन उमगायोहै ॥
 सुनो सूत्रधार तुमप्रगटविचारकरो,
 सभाहूसमेतरिदेकौतकसुहायोहै ॥
 सुनिकै गुपालवाक सूत्रधारचारवाक,
 नाटककेहेत निजनारिको बुलायोहै ॥ १८ ॥
 नेपथ्यकीओर तिनहेरके पुकारकह्यो,
 आयेंसुआउ इततवी नटी आई है ॥
 आर्य्य सुकौन काज मोहिको बुलायो आज,
 कीजिये सुकाज अब बेर क्यों लगाईहै ॥
 सूत्रधार ताहिको उचार पुनिएहु कह्यो,
 आयें अजान नाहिं जाहितबुलाईहै ॥ १९ ॥
 नाटकप्रबोधचन्द्र चन्द्रमासमान जग,
 दीजिये दिखाइ यों गुपालमन आयोहै ॥
 भूपति विपुलबल सोईतू अरण्यजान,
 पावक प्रतापवनसंगते बढायोहै ॥
 ताहिकी सुज्वाल तीन भौनमें बिसाल बढी,
 कीरतिको पुंज लोकतीनहूंमेंगायोहै ॥

लीनेचन्द्रहास प्रतिकूलनृपनासकर,
 जीतिके गुपालसुनरेशढिगआयोहै ॥
 सामंराज राजकोभिषेक जिन फेर जग ॥
 कीरति वरमदेवभालमें करायोहै ॥ २० ॥

सवैया ।

रणरंगमहीपिसताशनिआ अबलौं नरसुंडनतालबजावैं ॥
 अलिकैकचपिंगकपौललटीसुपिशाचनियांतिहनृत्यदिखावैं ॥
 करिकुंभमृदंगनपौन बली धसि नाद अनेक सुपीथ सुनावैं ॥
 इहभाँति सुनो नटनीजगमें रणरंगमही अबलौं यशगावैं २१ ॥
 रसशांत प्रसन्न विनोदनके हित हेनटनी सुगुपाल बुलाये ॥
 अब याहि सभा बहुनाटकजो धर स्वांग भले हम देहिदिखाये
 नटनी तब एह कह्यो भरताहित स्वांगन मानवलेहु मगाये ॥
 इह आहि अचंभ बड़ो मनमें, सुन आर्य्य एहु गुपालसुभाये २२
 निजप्राक्रमके रणरंगमही जिन मंडल भूपनके सुभगाए ॥
 पुनिकानलौं तानकठोरधनुंरणमंडलमें शरओघचलाए ॥
 तिन बाणनकै अरिखेत विधे सुतुरंगमके बहु पुंज गिराये ॥
 निज आयुधधारमहीधरसे गजकोटिनकोटि सुभूमिरुलाए २३
 पैदलसैन सुक्षीरनिधी भुजमंदरघात सुव्याकुलकीनी ॥
 श्रुतसैनपयोनिधिको मथिकेवलभावैं विजयलक्ष्मीजिनलीनी ॥
 जिनके रणकी मुनिबृंदसभै अबलौं जसकीरति गाहि नवीनी ॥
 रसशांतविषेतिनकीमतिआर्य्यमोहिकहोकिहभाँतिसुभीनी २४

सूत्रधार उवाच स्वपत्नीप्रति-

दोहा ।

ब्राह्मणज्योतिस्वभावते, समस्वरूप जगआहि ॥
कारणपाइ विकारभज, पुनि निज रूप समाहि ॥२५॥
नृपकुल प्रलय कृशानुसम, चेदिपती जगआहि ॥
चन्द्रवंशनृपराजको, दूरकियोपुनिताहि ॥ २६ ॥
चन्द्रवंशनृपराजहित, उद्यम कियो गुपाल ॥
मार विरोधी थिरकियो, राज गुपाल रसाल ॥ २७ ॥

सवैया ।

कल्पांत प्रभंजनक्षोभभयोसरितापतिज्यों सबशैलदबाए ॥
कृतकार्य फेर गहे थिरता निजवेलकी भीतर आय ठराए ॥
भगवंतके अंशैजयेनरजे सभ भूतनकेहित प्रेम बढाए ॥
नरमंडल ले अवतार मही कृतकार्यते रस शांति लगाय ॥२८॥
भृगुनन्दनरामको भामनीपेख सुबाहुजबारइकीसखपाए ॥
नृपशोणितनीर सुमांसवँसाबहु पंकमई तटनी भटनाए ॥
नृपनारिकुमार सुबूढनलों करुणाबिन धारकुठार चलाए ॥
घरभार उतार उखार कुलं नृप शांति भये तपमाहि लगाए ॥२९॥

दोहा ।

परशुराम जिम आहि यह, कृतकार्य गोपाल ॥
परम शांतिनिष्ठा भजी, रसमें बडो रसाल ॥ ३० ॥

१ चेदिदेशाधिपति राजाकर्णसेन ।

२ कीर्तिवर्मा राजाके राज्यको ।

३ अवतार स्वरूप ।

४ अस्थितगतांश ॥

जीत विवेक सुमोह जिम, बोधउदै जगकीन ॥
जीत करण बलराज तिम, कीरतिवरमा दीन ॥ ३१ ॥

अथ नेपथ्ये कलकला शब्द ।

सवैया ।

बीच कनातके बात सुनीसुमनोजबलीयह काननमाहिं ॥
कोपभरे मुख एहुकही नटनीचसुबोलतयोंमुखमाहिं ॥
जीवतहींहमरे जगमें तुम मोहकि हार कहें जनमाहीं ॥
पांपि शिलूषविवेकहिकी जड मूल उखारदयोभवमाहीं ॥ ३२ ॥
सुनबातशिलूषडरयो मनमें पुनि संभ्रमहेर सुनारि अलायो ॥
रतिकंठभुजा घनपीनकुचालहिसंगरोमांच अनंग सुआयो ॥
जगमादन सोभ अपार बनी मदघूमतनयन चले अलसायो ॥
अब भागचले इह ठौरहिते सुनिकै ममवाकमनोषुनशायो ३३
इमभाखतजीरंगभूमि तिनोतब आय मनोज प्रवेश कयो ॥
अलिकै कच नील कपोल लटी रतिकंठविषे हँसहाथदयो ॥
दृगकंज चढाइ उठाइ भुजा रतिनाथ महा उर क्रोध छयो ॥
भृत्ताऽधम पापि सुजीवतमें रति नाहि विवेक सुकौनभयो ३४
तबलौं मनमाहिं विवेक रहे सभ आगमते उपजा इह जोई ॥
जबलौं नहिं नीलसरोरुहिसैं दृगनारिकटाक्षलगे सर कोई ॥
नृप जीत तजे नवखंडमही घरनारि भजें कर जोर सुदोई ॥
चतुराननलौं जगमाहिं पिखे दृगनारि अजीत नहीं भटहोई ३५

धौल जहाँ गृह ऊचबने गजदंतनमंच सुसेजसवारी ॥
 मध्यबिराजत चंद्रकलासम वारिजनैन सुनूतननारी ॥
 भूषन चंपकहार घने तनु चन्दन कुंकुमगंध उदारी ॥
 चंदउदै तम दूरभये निशिमाहिं खिरी सुमनोजकीबारी ॥३६॥
 इह आयुध मोहि जेयंत सदा इन धारमलेजगआहिवलीको ॥
 इन होवत कौन विवेक अहै पुनि बोध उदै नहहोत कलीको ॥
 जन औरनकीजगकौन कथा धृत संयम जोजन जाइ गलीको ॥
 दृगकंज फिराय पिखे युवती चित यों तरफै जनमीनथलीको ॥३७

रतिरुवाच ।

दोहा ।

आर्यपुत्र सुअतिबली, भापैं मुनी अनेक ॥
 महामोह भूपालको, याजगशत्रु विवेक ॥३८॥

काम उवाच ।

सवैया ।

तवनारि सुभावते संकभई प्रतिपेक्षनते हमनाहिंडरें ॥
 पिखयद्यपिफूलशरासन औसरमें करभीतर आपधरें ॥
 जन तदपि आयसु मोहिं उलंघ मुहूरत धीरज नाहिं धरें ॥
 सुन वामउरु सुरदैत्यसभै जगभीतरहै वसमोहि करें ॥३९॥

दोहा ।

जानत काम न नारि कछु, शृङ्गीऋषि वन माहिं ॥
 मोसरचीत्तभ्रमाइयो, गयोभूप गृह माहिं ॥ ४० ॥

ताकी कथा संक्षेपते, कहों सुनो चितलाइ ॥

वामउरु संसामिटे, तोहिं निखल डरजाइ ॥ ४१ ॥

चौपाई ।

लोमपाद इक भूपति भारा । जाकोयश सबभौन मँझारा ॥
 दरशथको बहु मीत कहीजे । जाको हेर अमंगल छीजे ॥ ४२ ॥
 ताके देशको बहु विस्तारा । वर्षा होइ न ताहि मझारा ॥
 ताकी प्रजा दुखी सभ ऐसी । तपतअल्पजलमछलीजैसी ॥ ४३ ॥
 विप्रजोतिकी भूप बुलाए । वर्षा होइ सुकौन उपाए ॥
 विप्रनबहुविधिकीनविचारा । भूपतिको इह भौंतिउचारा ॥ ४४ ॥
 शृङ्गीऋषिवन भीतर जोई । आइ इहाँ तब वर्षा होई ॥
 वहनिरपेक्ष महामुनिज्ञानी । आवैकिहप्रकार रजधानी ॥ ४५ ॥
 लेन न ताको कोई जावै । शापअग्निते सभ डर पावै ॥
 तब तिन बारवधू सुबुलाई । दानमानकर पासबिठाई ॥ ४६ ॥
 शृङ्गीऋषिवनजाहि अगारा । ताको लियावो नगरं मझारा ॥
 सुनकर बारवधू अकुलानी शाप अग्निते अति डरपानी ॥ ४७ ॥
 पर भूपतिकी आयसु जोई । मेटि न सके कदाचित सोई ॥
 तब तिन एकउपायसुकीनो । नौकाबांधस्थंडेलकीनो ॥ ४८ ॥
 तामै रंभापुंज जराए । लाडूकरणपूरफललाए ॥
 कहुं जलेबी कहुं अपूपा । कहुं सुबूदी रची अनूपा ॥ ४९ ॥

दोहा ।

क्रिंतम बेल तामैरची, फूल पात बहु भाइ ॥
लाचीदाणेकी तहां, रची सुदाख बनाइ ॥५०॥

चौपाई ।

याविधधार अडंबर बाला । गई तहां जहँ विविन विशाला ॥
मुनिआश्रमते किंचित दूरा । नाका थापी नारगहूरा ॥५१॥
षोडशबरसनकी बहु बाला । गई तहां जहँ मना विसाला ॥
लाडूकरणपूर फल जेते । पात पलाश धरे सभ तेते ॥५२॥
शृंगीऋषि तह नैन मिलाए । ध्याननिष्ठ मुखवद अलाए ॥
पगनूपुरधुनि सुनी सुजबहीं । नैन उघारे मुनिवर तबहीं ॥५३॥
मुनि उर जान वन्दना धारी । अरघ पादहित लियायो वारी ॥
गणिका तब मुख एह बखाने । हम ऋषिवर नहिं छुहे सआने ॥५४॥
थाफो नीर न चरण पखारो । हमरे तपबनफल मुख डारो ॥
करणपूर अरु लाडूखाए । शृंगीऋषिके मनविगसाए ॥५५॥
खाइ जिलेबी लाचीदाने । अहो स्वाद मुनिमुखो बखाने ॥
मिलकर गणिका गायन करें । मुनिवर जाने वेद उचरें ॥५६॥
तुमरे मुखसरोज मकरंदा । वेदधुनी उर जने अनन्दा ॥
पद क्रम जटाअर्पूवथारी । आप पढाई जो मुखचारी ॥५७॥
याविधिनिरखे तामुखओरा । ज्योंनिशचिते सुचन्दचकोरा ॥
अहो हमारे भाग सुनए । यह मुनि ब्रह्मलोकते अए ॥५८॥

१ करीहुई । २ पदक्रमजटा वैदिक मन्त्रोंके उच्चारण विशेषका नाम है ॥

याके बलकल ऐसे सोहै । तडितपुंज जन में मनमोहै ॥
 बनफलमिष्टमधुरधुनिवेदा । मनकोनिरखिलमिटावैखेदा ॥ ६१ ॥
 सुंदर शीशजटा अतिकारी । मनो बिरंचि स्वहाथसँवारी ॥
 तपको तेज भालमें दमकै । किरणासहितमनोशशिचमकै ६०
 हेमजनेऊ याके अंगा । स्वर्गफूल सोभे सरबंगा ॥
 अहोपिताफलहित बनगए । याकेदरशन ताहि न भए ॥ ६१ ॥
 ऋषिआगमनऔसरकोजान । बारबधू तह कियो पयान ॥
 बहु आई नौकाके पाही । मुनिवर आयोआश्रममाही ॥ ६२ ॥
 शृङ्गीऋषि सुतआइ निहारा । रंचककरे न वेद उचारा ॥
 अग्निहोत्रकी अग्नि सुजोई । नाहिजगाईनिशिकोसोई ॥ ६३ ॥
 बारबधू जिहपंथ पधारी । दृष्टि तहाँ शृङ्गीऋषि धारी ॥
 पूछ्यो पिता कहां मति गई । पढे न वेद नहीं कृतकई ॥ ६४ ॥
 शृङ्गीऋषि तब बैन उचारे । पिताहुते कछु भाग हमारे ॥
 ब्रह्मलोकते मुनिवर आए । नाहिसमंश्रुमुख निरमाण ॥ ६५ ॥
 ताकोरूप निहाज्यो जोई । अबहौ चीत चितारों सोई ॥
 कोमल बलकल तनमें सोहैं । दोदो शृंग उरन मन मोहैं ॥ ६६ ॥
 शीशजटाकोमलअतिश्यामा । भाल तिलक हाटकढिगदामा ॥
 नाककरणमें छिद्र सुकीने । स्वर्गफूल तामें गुहिदीने ॥ ६७ ॥
 नयनसरोज दयारसभीने । सिंच सुधा श्रम करे सुखीने ॥
 मेरीओर कृपाकर निरखे । प्रेमडोर मानो मनकरखे ॥ ६८ ॥
 याविधि वेद सुकीन उचारा । सुनिकर हज्यो सुचित्त हमारा ॥
 ऐसे शृंगीऋषिहिअलायो । पितालख्योअबलाभरमायो ६९ ॥

शृङ्गीऋषि बहुभाँति डराए । हेसुत ऋषि नहिं राक्षसआए ॥
 ताके गीत सुनी नहिं काना । नातर तेरे हरहैं प्राना ॥ ७० ॥
 याविधि मुनिवर बहुत डराए । पर शृंगी वहु रूपहि ध्याए ॥
 मुनिवर भये प्रातपुनिकाला गयो जबै बहु विपिन विशाला ७१ ॥
 तब पुनि गणिका झुंड सुआयो । शृंगी ऋषि पिख मोल झुकायो ॥
 तुम अपने तप विपिन मझारी । मोहि ले चालो करुणा धारी ७२ ॥
 तब संग चल्यो मुनिवर ऐसे । प्राणन संग जीव जग जैसे ॥
 नैन कटाक्ष सुछ बिहिक पोला । निरखि भयो ऋषिको मन लोला ७३ ॥
 ताकी मंद गती झुनकारा । सुनि सुनि ऋषि मन भजे विकारा ॥
 नौका भीतर बैठो जबही । पहुँचो लोमपाद पुरत बही ॥ ७४ ॥
 मुनिवर नगर जबै पग धारा । बरषा भई सुतहाँ अपारा ॥
 यह विधि तपको जाहि प्रभाऊ । अबलाऽधीन भयो मुनिराऊ ७५ ॥
 शांता भूपति दुहिता जोई । ताहि वरी पुर भीतर सोई ॥
 याकी कथा बहुत विस्तारा । कहाँ लगे मम करों उचारा ॥ ७६ ॥

दोहा ।

मानवकी गनती कहाँ, देवनमें प्रधान ॥
 त्यागे धर्म क्षणेकमें, रंच लगा वो बान ॥ ७७ ॥

सवैया ।

गौतम नारि सुजार सुरेश्वर जाइ भयो सर मोहिंच लायो ॥
 वेद पढे चतुरानन जोरतिको हित सो दुहिता प्रति धायो ॥

इंदु भंजीगुरुकी अबला बुद्धसो सुतताहिके बीच उपायो ॥
कौन अपंथनपांधरेजगमो सरजाहिकोउ चीत भ्रमायो ७८॥

दोहा

याविधिके अबलाहने, तपी बडे बलवान ॥
गुलाबसिंह वैरागको, करें मूढ अभिमान ॥७९॥

रतिरुवाच

सवैया ।

सुत आर्य यद्यपि तूभुजमैं जगजीतनको बल आपधरें ॥
जग होइ सहायक जाहिबली पुनितां अरिते बलवंत डरें॥
सुनिये यमआदिक आठ बजीर विवेकसहायक वेदरें ॥
बहु जंग उपाय करेंसुनियो इहते उरमैं हम नीतडरें ॥८०॥

काम उवाच ॥

सवैया ।

भामिनि राय विवेकहिकेयमआदिकआठ अमात सुनाये ॥
तेरणरंग महीपहिले हमने सबठौरन ठौर दबाए ॥
कौन अहै जगभीतर सो हम जीवत ताहिको नाम अलाये॥
वामउरू तज चितसदा तुमक्योंमनमैं अरिते डरपाये॥८१॥

दोहा

कोप आगारीरहे जो, कौन अहिंसाँनार ॥
ब्रह्मचर्यको मैं सुनो, क्षणमहि डारों मार ॥ ८२ ॥

१ गुरु बृहस्पतिकी स्त्रीको चन्द्रमा सेवताभया । २ यमनियमाऽऽसन
प्राणायामप्रत्याहार धारणा ध्यानसमाधि । ३ क्रोध । ४ पर प्राणिवियो-
गालुकूल व्यापारका नामहिंसा ताका अभाव अहिंसा । ५ आठप्रकारके मैथुनका
त्याग ब्रह्मचर्यहै ॥

लोभं जबै करमै धरे, चन्द्रहास बलधार ॥

सत्य असतेय अपरिग्रह, भामिनि मुएनिहार ॥ ८३ ॥

सवैया ।

यमनेमसुआसनप्राणयमं प्रत्याहारबली जगध्यान अलाये ॥
धारणा और समाधिसुनो चितहोइ इकाग्रतौ उपजाये ॥
चितभीतर रंच विकारकरौ इनको जडमूल सुदेहु उठाये ॥
इन जीतन हेतुरची अबला यमनेम तबै हमरेवशआए ॥ ८४ ॥
दूरबिलोकन नारिनिको अरु ताहि संभाषन दूर रहे ॥
हास बिलास सकैल अलिंगन नाहि इकंत सुबात कहे ॥
जन संयमवंत कहावतजे तजसौध तपोवन जाइवहे ॥
चित्तमाहि चितारतजोयुवतीक्षणमैमनताहि बिकारगहे ॥ ८५ ॥
मोह अमातसुमाँसरमद दंभ तथा पुन लोभ अलाए ॥
फारयमादि बजीर लय वहिकान इकंत सुमंत्रदिटाए ॥
मोहमहीप अधर्म बजीर यमादिक गोप लगे तिनपाए ॥
जो यमनेम करेजगमै, हरिकेहित नाहि सुलोक दिखाए ॥ ८६ ॥

रतिरुवाच ॥

दोहा

शमदम और विवेकलौ, कामक्रोध मद मान ॥

मैं सुनियो निजकानमै, एको जनम अस्थान ॥ ८७ ॥

१ पर द्रव्यके हरणकी इच्छा का नाम लोभ है। २ यथार्थभाषण का नाम सत्य है। ३ चोरीके अभावका नाम अस्तेय है। ४ खोटेप्रतिग्रहके अभावका नाम अपरिग्रह है। ५ घृतदिक्रीडा। ६ मन्दर। ७ पर गुणोंमें ईर्ष्या और मद कहिये मनका गर्व ॥

काम उवाच ॥

सवैया ।

उत्पत्तिकोस्थानसुएकअहेमनसोजगभीतर तातअलाया ॥
 हम हैं पुनभ्रातविमात सुनो बहुगोप प्रकार बने अबगाया ॥
 सुन पूर्व ईश्वर संग कीयो, निजनारिबखानत ताहि सुमाया ॥
 जिनते उत्पत्ति भई हमरी मननाम वहीसुत ताहि उपाया ८८ ॥
 मन तीनहु लोकसु आपरचे पुन ताहि विषे कुल दोइ उपाई ॥
 मन एक प्रवृत्ति कहे पतिनीसुनिवृत्ति तथा जग दूसरिगाई ॥
 मोह प्रधान प्रवृत्ति रची कुल तीनहु लोकनमाहिं फिलाई ॥
 सुविवेकप्रधाननिवृत्तिजनीकुलसो बिरलीजगमाहिचलाई ९८

रतिरुवाच ॥

सवैया

सुत आय जो इहभाँति अहे जगभीतर ऐक सुताततुमारा ॥
 किय कारण बैरभयो तुमरो धुजमीनकरो ममएहु उचारा ॥
 तिह भ्रातनमें इहभात सुवैरन मोहि सुन्यो यह कानमझार ॥
 कविसिंहगुलाब कहे रति नाहसुनो रतिवैरकोकारणभारा ९९ ॥

काम उवाच ॥

सवैया ।

जे इक आमिषते निपजे तिन वैर प्रसिद्ध कन्यो जगमाही ॥
 भूमिनिमित्त लरे कुरुपांडव भूप खपे जिनके रणमाही ॥

भारत खडकी नूतन नारि भई विधवा जिन संगरमाही ॥
 होवतहीं यह बात आई कछु नाहिं भई सुनई भवमाहीं ॥ ९२ ॥
 हमरे मनतात सुपूर्व एरति तीनहुलोक सुआप बनाए ॥
 हमहैं अतिवल्लभ तात हिके इहते हम तीनहुलोक दबाए ॥
 शम औ दम और विवेक पिताबलहीन पिखे वनवासपठाए ॥
 अबते अघवंत उपाय करें पितभ्रातनमूलसु देहु उठाए ॥ ९२ ॥

रतिरुवाच ॥

सवैया ।

सुत आर्य क्यों पुनि पाप इसो मतिहीनकरें बहुसंग तुमारे ॥
 उर द्वेष बध्यो तिनके अतिहीं इहभाँति चहें जगपापकरारे ॥
 अथावा इह कौन उपाय सुनो धुजमीन तुम मन माहिविचारे ॥
 इह भाँति सुने रतिवाकजबैतबबोल उठे रतिप्राणपियारे ॥ ९३ ॥

काम उवाच ॥

दोहा ।

भामिनि गूढ सुबीजइक, है पुन कह्यो नजाइ ॥

रतिरुवाच ॥

आर्य सुत क्यों नाकहें, मोको तूं प्रगटाइ ॥ ९४ ॥

काम उवाच ॥

दोहा ।

रति तूं नारिसुभावते, भीरु अतिडरपाइ ॥

वैपापी दारुणकरम, तोपै कह्यो नजाई ॥ ९५ ॥

रतिरुवाच ॥

दोहा ।

आर्यसुत सोकौन बहु, कैसोकरम कमाइ ॥

बिनभाखे थल मीनसम, मेरो चित्त तरफाइ ॥ ९६ ॥

काम उवाच ॥

सवैया ।

भामनि नाहिडरें उरमैं हत आशविवेक सुआश ठराई ॥

याकुलमैं निसकालसमाविद्यांजिह नाम सुराक्षसी काई ॥

लेवहिगी अवतार सही उरभीतर नाहिं दया कछु राई ॥

होवतसत्य भविष्यकथा जनकी श्रुति याजग एहु अलाई ॥ ९७ ॥

रतिरुवाच ॥

दोहा ।

हा धिग हमरे कुलविषे, पिसताशीसुमहान ॥

उपजेगी उर कंपहै, चलदलपत्रसमान ॥ ९८ ॥

काम उवाच ॥

दोहा ।

भामनि क्यों उर कंपहै, लोककई यह बात ॥

जनमु राक्षसी होइगो निश्चैनहिं बिख्यात ॥ ९९ ॥

रतिरुवाच ॥

दोहा ।

नाथ बखानो एहु तुम, जो उपजे पुन सोइ ॥

याजगमैं अवतारलै, कामकरेगीकोइ ॥ १०० ॥

१ नष्ट होवे आशा जिसकी । २ ब्रह्मसाक्षात्कार औ क्रूर कर्मके कारणेते राक्षसी कहीहै । ३ पुरुषोंकी वार्त्ताहै निश्चय नहीं ।

काम उवाच ॥

सवैया ।

भामिनि बों सुनिये जगमें इहवाकअहै विधिब्रह्म अलाया ॥
पुंस अंसंगकहें जिहको तिहनारि अहे जगभीतर माया ॥
नाहिं छुहे तिह संग कबी मन वल्लभ ताहिंविषे सुत जाया ॥
तां उपरंत सुनो गजगामनि नाथै इहे पुनलोक बनाया १०१ ॥

दोहा ।

कन्या ताते होइगी, विद्यानाम कहाइ ॥

तातमात पुन भ्रातकुल, लए सकल बहुखाइ १०२ ॥

कविरुवाच

दोहा ।

त्रास कंप रतिको भयो, बोली अतिभय आहि ॥

भरताके गलसों मिलीं, आर्यसुत परिपाहि ॥१०३॥

सवैया ।

रतिसंगमकोसुखआहिजोईसुखस्वागतिकैपुनकामदिखाए ॥
तनमाहि मनोजरुमंचभये युगतारैक नैननकै तरलाए ॥
घनपीनपयोधर नारि मिले शिवके रिपुतौ मनमें हरषाए ॥
मणिगुंजत कंकण हाथविषेरतिकंठभुजामनमेंविगसाए १०४ ॥

१ असङ्गोद्भयं पुरुषः । इति श्रुतेः । २ शंकाः—पुरुषके साथ संबन्ध रहित हुई, माया-मनको कैसे उत्पन्न करेगी। समाधानः—पुरुषके साथ संबन्ध रहित हुई भी माया मनको उत्पन्न करे । दृष्टान्तः—जैसे चुम्बकपाषाणके साथ लोहशिलाकाका संबन्ध नहीं भी है तौ भी चुम्बककी क्रियाके पीछे क्रिया करे है यह लोकमें प्रसिद्ध है तैसे पुरुषके साथ संबन्ध रहित हुई भी माया इच्छा (मात्रसे) मनको उत्पन्न करे है—कहेतै (अघटित घटना-पटीयसीमाया) है याते मायामें सबकुछ बन सक्ते है । ३ मनने । ४ मनमें प्राप्त । ५ नय-नोंके दो तारे श्यामतरकहिये अति चंचल लगाये दीये ॥

काम उवाच ॥

सवैया ।

तव संगममोद जने मनमें, अरु मोह महा उरमें उपजाए ॥
 इमभाष मनोज प्रमोद बढे रतिको दृढ कंठ सुफेर लगाए ॥
 हम जीवत कौन बली जगमें पुन आत्मविद्या जो उपजाए ॥
 जग कौन विवेकको नाउलए रतिभीरु कहो तुम क्यों हर पाए

रतिरुवाच ॥

दोहा

विद्याकन्या राक्षसी, ता उत्पत्ति जोइ ॥
 तुमरे वैरी जगतमें, किहविधि चाहै सोइ ॥ १०६ ॥

काम उवाच ।

सवैया ।

साहुँहिता श्रुतिनारिविषे, खलराय विवेकप्रिये उपजाए ॥
 संगप्रबोध शशी पुन भ्रात, सुहंसगते तिहमाहि उपाए ॥
 ताउत्पत्तिविषे पतिनी सुशमादिक आप सहाइक आए ॥
 ते उपवास करें तपसाधृत उद्यमतीरथ देव मनाए ॥ १०७ ॥

रतिरुवाच ।

दोहा ।

आत्मनाशक विद्या, ता उत्पत्ति जोइ ॥
 काहिसराहै दुष्टमति, शंका पापन होइ ॥ १०८ ॥

१ विषयांतरके विस्मरणको उत्पन्न करता है । २ अनावृत ब्रह्माकारान्तकरणवृत्ति
 रूपाकन्यानाम विद्या । ३ अनावृतब्रह्माकारान्तःकरणवृत्त्युपहितचैतन्यरूपप्रबोध-
 चन्द्रमा भ्राता ।

काम उवाच ॥

सर्वैया ।

रतिजे कुलनाश प्रवृत्तिभये, बहुपापकरें नहिं पाप डराए ॥
 मुख नीत मलीन रहे तिनको, उपजे निजतात सुआतमघाए ॥
 बलि पावकधूम सुमेघभयो फिर धूमधुजंहन आप खपाए ॥
 कुलकंटक आहिविवेक सुनोनितपापकरेनहिं रंच लजाए १०९
 (अथ नेपथ्ये कलकलाशब्द)

विवेक उवाच ॥

सर्वैया ।

आहिदुरातमकामकलंक सुतूं धरमातम आप अलाए ॥
 ते अववंत सुपाप करें इम भाष अधी हमको सुठराए ॥
 नाहिलयो मन तातमतो जिम मूढ मनोज सुनो चितलाए ॥
 तातभयो सुतमोह अधीन सुमारग वेदको दूरभुलाए ॥ ११० ॥
 कार्य औ अकायको गुरु जोन पिखे उरमें गरवाए ॥
 वेदविरुद्ध सुपंथविषे मनकें मदकें जब पांड टिकाए ॥
 ताहिं त्याग सुवेद कहे मनुस्मृतिमें पुन एहु बताए ॥
 बीच पुरानन व्यास कहे ऋषि पूर्वले पुन एहु अलाए ॥ १११ ॥

दोहा ।

पिता गुरु मत त्यागकर, बडभागी प्रह्लाद ॥

मुक्ति पाइ बन्धन तजे, हरिके सेवसु पाद ॥ ११२ ॥

१ अग्नि । २ मन । ३ श्लोक-गुरोरप्यवलिसरय कार्याऽकार्यं मजानतः । उत्पथ
 प्रतिपन्नस्य परित्यागो विधीयते ॥ अर्थयह:-जोगुरु अहंकारादिकदोषोंकरकें उन्मत्त-
 भावकें प्राप्तभयाहै तथा जो शास्त्रकरणेयोग्य अर्थकूं तथा शास्त्रनिषिद्ध अकरणेयोग्य
 अर्थकूं जाणतानहीं तथा शास्त्रनिषिद्ध मार्गमें प्रवृत्तहोवैहै ऐसे गुरुका शिष्यने परित्याग
 करना ।

कवित्त ।

तात जो हमारो सुहंकारके अधीन भयो,
कार्य अकार्यन रंचक विचारियो ॥
जगतको पति जो परमात्मासु तात निज,
ताहिको सुबाध जगशृंखलमें डारियो ॥
मोहमदमान निसदिन सनमान कर,
छोड़िनो सुदूरबंध दृढ बिसतारियो ॥
ऐसो मन तात जोई हतएन दोष कोई,
कन्यो हमत्यागनहिं ताहिमतो धारियो ॥ ११३ ॥

सवैया ।

इहऔसर कामविलोकनकै रतिकेप्रतिएहु सुवाकअलायो ॥
हमरेकुलमेंसुप्रधानबडो मति संगिमिल्योसुविवेकहिआयो ॥
गजगामनि आवतहै इतऔर चलेमृगकेपतिज्योंहुलसायो ॥
शिवज्यों तुहिनाचलकीतन्या,मतिसंग मिलेइहभांतिमुहायो ॥

दोहा ।

रागादिक जिन बस किये, कीरतिवंत उदार ॥
उरअतिकोप्यो मानधन, मनो निरादर धार ॥ ११५ ॥

सवैया ।

तन दूबर एहुविवेक पिखो रतिचित्त कठोरमहादुःखदाई ॥
कलंषीमतिमाहि सुयोंलसकैतुहिनाचलज्यों शशिदेतदिखाई ॥
इहकारणते हम योग्यनहीं इहठौर निवासचले सुपलाई ॥
रतिसंग मनोज सुभागगए,मतिसंग विवेक बरे तिहआई ॥ ११६ ॥

विवेकभूषातिरुवाच ॥

दोहा ।

सुने प्यारी कान तव, कामबडेमदबैन ॥

हमै बखाने पापकृत, दुष्टात्मयहमैन ॥ ११७ ॥

मतिरुवाच ॥

दोहा ।

आर्यसुत निजदोषको, जानत नाहि सुकोइ ॥

दोष बखाने औरको, मूढ जगतके लोइ ॥ ११८ ॥

राजोवाच ॥

सवैया

चित आनंदनीतनिरंजनजो जगनायकजाहिसुआगमगाए ॥

मदकामहंकारपरायणने तिनको जगभीतर बन्धन पाए ॥

अतिदीनदशा तिनकी सुकरीपुन सुकृतवंतसु आप कहाए ॥

हम ताहि छुडावन माहि लगे अघवंत अहो खल मोहि अलाए ॥

मतिरुवाच ॥

सवैया ।

सुत आर्य जो परमात्महै सहजानंद सुंदरवेद उचारे ॥

बहुनित्यप्रकाश महारविसों सुत्रैभौनन माहि सुजाहि प्रचारे ॥

इहभांति सुनो परमेश्वरमैं किहभांति इने तिनबन्धन डारे ॥

दुःखसिंधुपरात्मडारदयो किम ताहितजे गुण आपउदारे १२०

राजोवाच ॥

सवैया।

अति धैर्यवंत उदारबडो उरसत्य सदा गुणसिंधु सुगाए ॥

स्वाच्छसदा उरनीतबसे सुमहालक्ष्मी सिर छत्र झुलाए ॥

मति धैर्य शीलतजेक्षणमें सुन भामिनि नारिन जाहि भ्रमायो ॥
अब और की बात कहा कहिये निजनारि परात्म आप भुलायो ॥

मतिरुवाच ॥

सवैया ।

सुत आर्य्य जो तम होइ बडोर बिकोनहि छाद सकै पुन सोई ॥
तिम आत्म नित्य प्रकाश महा जिनकै सम दूसर और न कोई ॥
सुख सागर नीत उजागर है अज्ञान कहो किह भांति सुहोई
अब दूर करो करुणा करकै इह शंक बडी उर अंतर पोई ॥ १२२ ॥

राजोवाच ॥

अनंगशेखर छन्द ।

विना विचार सिद्ध ए प्रसिद्ध वारयोषिता;
समान नाम माया विलासिनी बखानिए ॥
मणिसफाटकं यथा सुदेव ऊजलो मृषा,
सुहाव भावकै तथा प्रवचना सुठानिए ॥
ताहिके सुसंगत असंगत जु देवकी,
स्वरूप सिद्ध नित्य है मनाक नाहिं हानिए ॥
तथापि गाँठ संगके प्रसंग विक्रिया भई,
छुटी सुधीरता तबै अधीरता सुजानिए ॥ १२३ ॥

मतिरुवाच ॥

दोहा ।

कारण कौन सुभाषिए, जाकर करे विकार ॥
पुरुष पुरातन सों वधू, जाको चरित अपार ॥ १२४ ॥

१ नाम अनिवचनीय है । २ क्रीडादिविलासोक्तेकरनेवाली । ३ मिथ्या हावभाव करके
असत्य पदार्थोंको सत्यरूप दिखावती दुयी पुरुषोंको वचन करती ठगती है । ४ अत्यंत
संगसे विकार प्राप्त भया ।

राजोवाच ॥

दोहा ।

माया कारण काजंको, चाहितनाहिंसुकोइ ॥

नारी जान पिशाचनी, यही सुभाव सुहोइ ॥ १२५ ॥

सवैया ।

मोहतहै कबहू अबला मदसोंसु बिडंबन फेरकरे ॥

कबहू पुन ताडतहै अबलाकबहू हँसके पुन अंकभरे ॥

सुविखादकरे कबहू कबहू अतिदीन मनोरिद माहिबरे ॥

दृगवामकटाक्षनकै अबला कहुकौनहकौननचीतहरे ॥ १२६ ॥

दोहा ।

है कछुकारण कौन पति, कहों सुनों अब सोइ ॥

दुराचारइन चित वियो, करयो विचारसुकोइ ॥ १२७ ॥

मायोवाच ॥

सवैया ।

अब जोबन मोहि बिलाइगयो पुनदेव पुरातनहै जरठायो ॥

अब मोहि विषेरस आहिकहारस बेमुखजोबनमें नरसायो ॥

अब और उपाय बनेनकछू मन पूत बने अबराजदिवायो ॥

इहमातमतो सुविचारमनेमन पूत तबैनिज तात मिलायो ॥ १२८ ॥

नवद्वारनके पुर ताहिरचे मन आप सुनो तिनबीच बसाए ॥

इकरूपहुतो परमात्मजो बहुभांतिनकै पुरमाहि फसाए ॥

सुकरे मनकार्य आपजितेपरमात्मके पुनमाहि ठराए ॥

सुजपाकुसमंमणिमाहियथाहनश्वेतगुणगुणलालदिखाए ॥ १२९ ॥

१ कार्य । २ इस प्रकार मनने माताके मतको विचारकर तथा मनरूपपुत्र तात परमेश्वरके साथ अभेद संबन्धवाला होकर ।

मतिरुवाच ॥

दोह ।

आर्यसुत यालोकमें, जैसी मात प्रवीन ॥

ताको सुततैसो भयो, कहो देव कतकीन ॥ १३० ॥

राजीवाच ॥

सवैया ।

तबचीतको पूतहंकार बडो नपिता परमात्मकोजगगायो ॥

अतितोतलबैनगयो ढिगजो हसके परमात्म कंठ लगायो ॥

तब भूलगयो परमात्म आप भवमोहभयो इम आप अलायो ॥

इह तात इहै मममात अहै इहखेत इहे सुकलित्रसुहायो १३१ ॥

यहपुत्र सुमित्र अरात बडो पुन यावसुधा बल आहिहमारे ॥

गज अश्वपशू यह कोशैं अहे पुनएहुसुहृदसुबन्धुपियारे ॥

चितको फुरणों जिहभांति भयो तिमदेव परात्म आपन धारे

अज्ञान मईबहु नींद भई स्वप्ना बहु भांतिन भांति निहारे १३२

मतिरुवाच ।

दोहा ।

आर्यसुत परमेश्वर, दीरघनींद बिकार ॥

बोध जनम किह भांति पुन, होवे मोहिउचार ॥ १३३ ॥

कविरुवाच ॥

दोहा ।

सुनत विवेकमहीपको, लाज भई उरभार ॥

कीन अधोमुख तासमें, धरणीओर निहार ॥ १३४ ॥

मतिरुवाच ।

दोहा

आर्यसुत किहहेतते, गुरुतरलजातोहि ॥
नम्रसुकंधर तेभई, भाषो कारण मोहि ॥१३५॥

राजोवाच ।

दोहा ।

नारिनको बहु ईर्षा, होवत जगतमझार ॥
साऽपरारधजन आप पिख, कहों न तोहि उचार ॥१३६॥

मतिरुवाच ॥

दोहा

रसप्रवृत्तिकै धर्महित, करे कछू पति प्राण ॥
बहुऔरे जगयोषिता, करे कांज तिहहान ॥१३७॥

राजोवाच ॥

दोहा ।

मति प्यारी इक औरहै, मानन मेरी नार ॥
उपनिषत सुनामबखानिये, सुंदररूपउदार ॥ १३८ ॥

चौपाई ।

बहुदिनकी बिछरीहै प्यारी । मोहि असूया दुःख उर भारी ॥
शमदम जो अनुकूलह होई । तौ उपनिषत संगमम होई ॥१३९॥
हेमति तू जगविषे निवारे । एक महूरत मोन सुधारे ॥
जाग्रत स्वप्नसुखोपतविलाई । मैं प्रबोधसुत लेहु उपाई ॥१४०॥

१ दूसरी स्त्रीके संगसे अपनेको अपराधसहित देखकर । २ पतिके मनवांछितकाया ।
३ स्त्रियोंको ईर्षाकृत जोकोपहै ताका नाम मान है तिसमानवालीका नाम मानन है ।

दोहा ।

उपजतही प्रबोधसुत, करे बन्ध सभहान ॥

बन्धनमुक्ति विराजही, परमात्म भगवान ॥ १४१ ॥

सवैया ।

सुत आर्य्यजो प्रभको दृढबंधनहैं दृढग्रन्थि महादुःखदाई ॥
ताअबला तव संगमते सुतबोधभये बहु बन्ध मिटाई ॥
पति नीतभजो तिनसंगमको अब वेगिमिलोकिमवेर गाई ॥
सुतआर्य्यनीतरमोतिनसोंममचीतप्रसन्नभयोहुलसाई ॥ १४२ ॥

राजोवाच ।

सवैया ।

भामिनि जो यह बातिभई तबे सिद्धमनोरथआज हमारे ॥
हैजगआदि सुएक विभू परमात्मजा श्रुतिपुंज उचारे ॥
ताहि करे बहुखंडजिनोपुरदेहनमै बहु बन्धनडारे ॥
चिदईशदयोमृतकोपदहा अबतेईबनेजगभीतरमारे ॥ १४३ ॥

कवित्त ।

ब्रह्मकेजोंभेदकहैंखेदकअनेकविधि,
प्राणअंतप्राश्रित ताहि करवाइये ॥
विद्यासरूप प्राश्रितयों अनूपहोइ,
जीवब्रह्म एकता सु तबी मोक्ष गाइये ॥
कार्यके सिद्धहित शांति औ दमादिजेई,
ताहताह तीरथमै बेगसु पठाइये ॥

ऐसेमतिमान मति पति तौबखानकर,
गणभौनऔरपिखजाहिसुखपाइये ॥ १४४ ॥

सवैया ।

मतिसंग विवेक विचारकियो जगभीतरजोजनकोसुखदाई ॥
जिहसों सभजीवकी बन्धमिटे परमात्मसंग सुबेग मिलाई ॥
तपसातटतीरथजोगभजे उपजे सुतबोध बडो जसदाई ॥
कविसिंहगुलाबसु एहकथा प्रथमै यह अंक निरंतरगाई १४५ ॥

दोहा ।

गुलाबसिंह मति पति मतो, जानमोहभूपाल ॥
दंभकलादिक पठेगो, तीरथहनन विसाल ॥ १४६ ॥

इति श्रीमन्मानसिंहचरणशिक्षितगुलाबसिंहविरचिते प्रबोधचन्द्रोदयनाटके
प्रथमोऽंकः समाप्तः ॥ १ ॥

इति श्रीमदुदासीनवर्त्य परमानंद शिष्य गुरुप्रसादविरचिता प्रबोधचन्द्रोदय नाटक
प्रथमाऽंकटिप्पणिका समाप्ता ॥ १ ॥



ॐ श्रीगणेशाय नमः ।

श्रीगुरुभ्यो नमः ।

अथ द्वितीयोऽङ्कप्रारंभः ॥ २ ॥

दोहा ।

असुरविदारे जाहि जग, देवनकियो उधार ॥
तारघुनायक विमल पद, बन्दों वारंवार ॥ १ ॥

सवैया ।

तब दंभको स्वांग भयो अतिसुदर जाहि पिखे जग शीश निवाए ॥
कर सैननहीं समुझावत है सभ पेखत राजसभा महि आए ॥
मुख एहु कही महा मोह बली सिरहाथ धरे जग माहि पठाए ॥
सुत दंभ अमातन संग बिचार विवेक कियो बहु होन न पाए २ ॥
महामोह उवाच ॥

सवैया ।

इह विवेक विचार कियो सुप्रबोध बली सुत लेहि उपाए ॥
ताहि निमित्त सुतीरथ मै, शम औ दम आप विवेक पठाए ॥
है हमरे कुलनाश निमित्त इहै जग माहि विरंचि बनाए ॥
तुव होइ सुचेत उपाय करो जिहते इहनाश निमित्त मिटाए ॥ ३ ॥
तिन तीरथ माहि बनारस जो बहु मोक्ष निमित्त विरंचि बनाई ॥
शिवकी नगरी सुत दंभ बरो सुकरो तुम जाइके एहु उपाई ॥

१ विषयोंमें अत्यंत आरुक्तिका हेतु जो अहंमम अभिमान हैं ताका नाम महामोह है।

चहूं आश्रमकी कल्याणमिटे जिहते नह मोक्ष सुहोवनपाई ॥
बस मोहि बनारस एहुकही सभस्वामी कह्यो सुकरचो मम आई ४

दम्भ उवाच ॥

दोहा ।

जाहि निवास सुमै करों, सुनो तिनोकी गाथ ॥
मनमथके उत्सवभजें, लोक निवावें माथ ॥ ५ ॥
कवित्त ।

वारवधू भौननिसबसमदपानहास
कामके कलोलनिसों जामिनी बिताइ है ॥
चाँदिनीसुरात मनमथके हुलासभए,
नारिनके संगसुअनंगसुख पाइहै ॥
नाइ प्रातकालमले अक्षत लगाइ भाल,
धूरत सुबडो सबलोगनि रिझाइहै ॥
दीषत सर्वज्ञ पुन तापसी ब्रह्मज्ञ यह,
हव्यवाहहोमहम कदीनचुकाइहै ॥ ६ ॥

दोहा ।

योँदिनम वचत जगत, निसमैं रसकरसाल ॥
महामोह भूपालको, मै कृतकीन बिसाल ॥ ७ ॥

कविरुवाच ।

दोहा ।

धाम बनारस गंगतट, बैठे दम्भ उदार ॥
कोइक आवत देखिकर, बोले वचन विचार ॥ ८ ॥

१ आपने महानुरागे की सिद्धि वास्ते लोकोंके समीप आपणें अत्यंत धर्मात्मापणे करके जो प्रसिद्ध करणा है ताका नाम दम्भ है । २ निरंतर हमारा अग्रिहोत्र है ।

दम्भ उवाच ॥

सवैया ।

कौन उलंघ भगीरथिको इत आवतहै सरितातटमाही ॥
 ज्वाल मनोअभिमानहकी जन तीनहु लोक ग्रसेमुखमाही ॥
 वाक कहे इहभांति मनो सुदवावतहै सभको जगमाही ॥
 बुद्धि बढी दमकै उरमें सभको उपहास करे मनमाही ॥ ९ ॥

कवित्त ।

राठा जो प्रसिद्ध देशदक्षकलेश हर,
 तिन हीते आयो यह ऐसे मनआइहै ॥
 आर्य्य अहंकार सुहमारो तहांनीतबसे,
 समाचार लेहु कछु मोहिको सुनाइहै ॥
 ऐसे मन दम्भ सुविचार नीके करे तब,
 आयो सुहंकार चाल हंससी सुहाइहै ॥
 अहोबहुमूरख जगत यह छायो सभ,
 ऐसे सुहंकार मुखबैनन अलाइहै ॥ १० ॥
 भटपाँद मतको नजानत अजानलोक,
 नाहि प्रभाकरको मरम पछानई ॥
 तोताँतिकगंभीर मत धीरनहीं पारलैहे,
 सालंकको ततज्ञान कोई नहीं जानई ॥

१ मीमांसकभट्टपाद-देहादिकोंसे भिन्न जडचेतनरूप आत्मा मानेहैं । २ पूर्वमीमांसाका एकदेशी प्रभाकर-देहादिकोंसे भिन्न ज्ञानगुण विशिष्ट हुआ आत्मा चेतन मानेहै । ३ कौमारिल शास्त्रके तत्त्वको नहीं जानतो । ४ शारिकनामग्रन्थके तत्त्वज्ञान कहिये सिद्धांत-को अर्थात् शांतत मुनिके मतमें वासुदेवही प्रथम प्रकृतेरू । ५ ही तत्त्व है ताके ज्ञानसे शून्य है ।

वेदव्यास वाकपति कपिलकणादमत,
 और जो महोदधिको मत कवि भानई ॥
 महावृत्तिना निहारे पुन ब्रह्मकोविचार,
 कहा नाम नरपशु सभ ऐसे हमजानई ॥ ११ ॥
 एह जो पेखये महानमान बोझभरे अति,
 महापशु बुद्धिकछु अरथकी नाइहै ॥
 कटिमैं पीतांबर अडंबतोखूबकरै,
 सामवेद धुनि पुन ऊँचे सुर गाइहै ॥
 पूछिये जु बात तु रिसात मन क्रोधभये,
 फेरफेर मूढ वेदपाठन सुनाइहै ॥
 वेमुख आचार श्रुतिचारको विचारकदा,
 जीव काके हेत मूढ वेदन बहाइहै ॥ १२ ॥
 औरठौर गयो पुन कौतुक सुनयो पिख,
 बोलियो हंकार सुगुलाब पहिचानिये ॥
 नामतो सन्यास मार्गभिक्षा विलासकरें,
 यही जतीनाम लोक माहितो बखानिये ॥

१ वेदव्यासका वेदांतमत तथा वाचस्पतिक मत और कपिलकृत सांख्य शास्त्र का मत तथा कणादकृत न्यायशास्त्र का मत तथा महोदधि कहिये शेषप्रणीत भाष्यकाम ज्ञ । २ पाशुपत शास्त्र संहिता नहीं देखी तो ब्रह्मका विचार सूक्ष्म होनेसे अति कठिन है । ३ सर्व मनुष्यरूप पशु है सो शास्त्रमेंभी कहा है:-

श्लोक-आहारनिद्राभयमैधुनानि, सामान्यमेतत् पशुभिर्नराणाम् ॥ ज्ञानेन नराणामधिको विशेषो, ज्ञानेन हीनाः पशुभिः समानाः इति । इन सर्वमतोंका अर्थ विस्तारभयसे लिखा नहीं ४ शुद्ध वेदपाठी ब्राह्मण । ५ भिक्षामात्रवास्ते यतीपणको ग्रहण किया है नही मुक्तिके वास्ते ।

मूढ तो मुडाए नाम पंडित कहाए कछु,
 ज्ञानहुंन पाए करवेदभाष्यठानिये ॥
 कीनेहैं व्याकुल विदांतके प्रकरणसभ,
 आवतहैं हास मुहियहि सुनि वानिये ॥ १३ ॥
 प्रत्यक्षतेविरुध अरथ भाषत वेदांतसभ,
 एकही अखंड ब्रह्म दूसरो न गायोहै ॥
 ऐसे जो विदांतशास्त्र मानतप्रमाण मूढ,
 बौद्धनके ग्रन्थनमें प्राध कौन आयोहै ॥
 सेवरा सन्यास बौद्ध ग्रन्थ औ विदांत एक,
 भिन्न भिन्न नामइक छलके चलायोहै ॥
 तिनहुंके संग पुन बोले महापाप चढें,
 ऐसै मुख भाष पांड आगे सुउठायोहै ॥ १४ ॥
 एही शैव पाशुपत आगम सुशैव रति,
 रासभसमानतन भसम लगाइहै ॥
 पशुहै अदंड लोकमाहिं सुरखंड करें,
 इनसों प्रभाष नर नरकसुजाइहै ॥
 शैव पाशुपतके निहारे होइ पाप अति,
 पेखिये सुनाहि इन ऐसे बुद्धि गाइहै ॥
 गुलाब सिंह देखिकै हंकारकी विसाल छवि,
 लोगनिके पुंज पुन आगेही पलाइहै ॥ १५ ॥

१ नहीं मनको मुण्डाया-पण्डित कहाते है परन्तु पण्डित नहीं है । २ प्रत्यक्षादिप्रमा
 सिद्ध जो अर्थहैं तिससैं विरुद्ध अर्थके कहनेवाले वेदांत शास्त्र यदिप्रमाणरूपकर मान-
 तेहैं तो बोधके ग्रन्थोंमें क्या अपराध है अर्थात् तिनोकोभी प्रमाणरूप मान्या चाहिये
 यह तात्पर्य है । ३ शैव प्रधान पाशुपत व्रत है जिन उपासकोंको तिनका नाम शैव
 पाशुपत है ।

औरठौर गयो पुन पेखि मुछकानो अति,
 अहो बकध्यान पटऊजल सुहाइहै ॥
 गंगनीर धारतट शीतलसिलासवार,
 प्रोक्ष प्रोक्ष आप कुश आसन बिछाइहै ॥
 लए अक्षमाल मुख मंत्रतो बिसाल जपे,
 अंगुलकैमाहिं कुशमुद्रे सुबनाइहै ॥
 एही दंभवंत धनवंतनिके वित्त हरे,
 बीच मंत्र न्यासकर अंगुली हलाइहै ॥ १६ ॥

सवैया ।

हंकार तबै पुन पांइ उठाइ चलयो मुछकाय पिखेजनआना ॥
 है कर माहिं त्रिदंडधरे मुख छूत बकै सुलदे अभिमाना ॥
 द्वैत सुनाहि गहै उरमैं पुन नाहि अद्वैतको रंचपछाना ॥
 पंथै उमै इह भ्रष्ट भये भनि आश्रम और पिखे मुछकाना १७ ॥
 किहको इह आश्रम पावनहै ढिग द्वारन ऊच सुवंस गडाए ॥
 सुमनो तिम ऊपरनाचतहैं सित अंबर पुंज हजार तनाए ॥
 इतहै कृष्णांजिन यूप शिला इतते चमसा बहुभाँति सुहाए ॥
 इत मूसल और सऊषलहै इत केशरकुंभ सुचीत बनाए ॥ १८ ॥
 घृतहोम सुंगध सुधूम बडो तिन श्याम सभोनभमंडलकीनो ॥
 यह गंगसमीप सुआश्रमहै पिख मोहि सभो श्रम होवत खीनो ॥
 ग्रहमध्य बडो धरमात्मको तिनको यह आश्रम आहि नबीनो ॥
 सुभलो यह आश्रम पावनहै दिनदोइसुतीननिवास सुखीनो ॥

१ रुद्राक्ष माला । २ द्वैताद्वैत उभै । ३ काले मृगकी त्वचा-यूप थंभा-चमसा
 यज्ञपात्रविशेष ।

दोहा ।

ऐसे धार हँकार उर, बन्योचहै तिहमाहि ॥
पुरुष निहारयो एक तिह, रूप सुनीजे ताहि ॥ २० ॥

सवैया ।

मृदलांछततां तनु सुंदरहै, पुन भाल विषे घसि चन्दनलाए ॥
भुज औ उदरे उर कण्ठ उर पुन ओठन चन्दनटीक बनाए ॥
दृग जानु कपोल सुपीठविषे चिविकेबहुचन्दनटीकसुहाए ॥
कुश चूडकटे कर काननमें सुमनो यह दंभइ सोचमकाए २१
सुभले अब याहिसमीप चलों इमधार चले मन सूष घनेरे ॥
ढिगजाइ उठाइ भलेकरको मुख एहुकही कल्याण सुतेरे ॥
पुन दंभ हँकार कियो मुखते इम वारतहै नहि आउ सुनेरे ॥
इतनेमहि आइगए बटुबालक बामनवाकसुनोतुममेरे ॥ २२ ॥
दूरहि ठाढरहो द्विज जू इह आश्रमकी गति तोहि नजानी ॥
पादपछालन आप करो घरभीतरऊ जल लेइ सुपानी ॥
तो इमआश्रम पांउधरो इम कोन बरो बटु एहबखानी ॥
क्रोधभयोसुहंकारबड़ो इहभांति सुनी बटुकीजबबानी ॥ २३ ॥

हँकार उवाच ॥

सवैया ।

हाविधि कौन कुदेशअए जिहदेशन याविध लोक बसैहै ॥
कोविदलोक प्रसिद्ध बडे हमसें जिनदेशन आतिथऐहै ॥

१ मृत्तिकाके बिंदुकर चिह्नित है शरीर जितका । २ शिख । ३ दम्भका शिष्य । ४ आपणे ननेष्टकरणे विषे तथा परके अनिष्ट करणे विषे प्रवृत्ति करावणेहारा जो अभिज्वलनरूप अंतःकरणकी वृत्ति विशेष है ताका नाम अहंकार है ।

आसन पाद जल अर्गा तिनके हित नाग्रही पुन लैहै ॥
नाहिछुहे जल मंडलको हम और सुदेशहि जाइ वसैहै ॥ २४ ॥

कविष्वाच ॥

दोहा ।

करकी सैनी दंभकर, कीनो ताअस्वास ॥
इह जनावत थिररहो, काहेभये उदास ॥ २५ ॥

सवैया ।

तब बोलमुखोबटु एहकही गुर याविधिते द्विज कीनबखाना ॥
भयो तव आगम दूरहिते हम ना कुलशीलसुतोहि पछाना
सुनि यह बात हंकार बली मुखभाषत है उरमें सुनसाना ॥
हमरो कुल शील परीक्षणकै अबलायकमूढ सुतोहिप्रमाना ॥ २६ ॥

दोहा ।

सुन मूर्ख अबतैं कहों, गौड प्रसिद्ध सुदेश ॥
राठापुरी प्रसिद्धहै, पेखत हरे कलेश ॥ २७ ॥

कवित्त ।

भूरश्रेष्ठनाम पुन ताहिमै प्रसिद्धधाम,
ताहिपति तात मम लोकमें बखानैहै ॥
ताहिके जुपूतहैं सुपूतऔ कुलीन बडे,
देशनप्रसिद्ध लोकलोकमाहि जानेहै ॥
तिनमे विवेक विनयधैर्य अचार शील,
प्रगट उदार मम कोविद प्रभानैहै ॥

सोई हम आए विधिलोककिधोनएभये,
भयोसु अंचभजनमोहि न पछानेहै ॥ २८ ॥

दोहा ।

सुनत बात पुनदंभयह, बटुकी ओरनिहार,
सैननहीं समझाइयो, देहु पादहित वार ॥ २९ ॥

सवैया ।

ताम्रघटी बटुले करमैं पुन उज्जलवारि सुपूर लियायो ॥
ताम्रघटी करले भगवंत करो पदक्षालन एहुअलायो ॥
हंकार कह्यो हम रोंवकरैं, जगकाहूँको नाहिबनेसुदुखायो ॥
धोइकिपांउ सुआश्रममें बरनेहितताहि सुपांउ उठायो ॥ ३० ॥
दंभ तबै पुन दंतचबाइ चढ़ाइ भुंए मुख एहु अलाए ॥
दूरहि पांइ गडायरहो द्विजमूढकहाढिग आवत धाए ॥
तेतन स्वेतकी बिंदुसुनो पसरैं इतते उत वायुचलाए ॥
ब्रह्मण्य अपूर्व एहु पिखी सुहंकार कह्यो मनमै खुनसाए ॥ ३१ ॥

दोहा ।

बहुर बटुमुख बोलियो, ब्रह्मण्यइ सोही होहि ॥
उत्तम द्विजयालोकमैं, कबकब पेखे तोहि ॥ ३२ ॥

सवैया ।

भवभारतखंड महीप जिते पदपंकज नाहि छुहैं डरपाए ॥
पदकंजसिंहासन भूतलकेढिग आसनभेनिज मोलझुकाए ॥

१ दम्भने दन्तोंको दबाय ध्रुको चढाकर बटु बालकके प्रति देखा तब बटुने अहं-
कारके प्रति कहा । २ दम्भके चरणकमलको ।

मुकटामणिकी सुमरीचिनकै पद वारजआरती दीपजगाए ॥
इनके ढिगजाइ निशकसुनो मतिभूलगईद्विज तूं सुनसाए ३३ ॥

दोहा ।

सुन हंकारः सुमनविषे, कीनो इहै विचार ॥
मनो सुयाही देशमें, हंभ लयो अवतार ॥ ३४ ॥
भवतु तथा इह आसने, मैं अब करों निवास ॥
उरुनिवावेताहिने, आसनबैठनआस ॥ ३५ ॥
मैंवं मैंवं बोल बटु, ऊंचे कीन प्रकाश ॥
आराधपाद आसनइहै, और न करे निवास ॥ ३६ ॥

सवैया ।

तब बोल हंकार सुएडुकही मनभीतरकोप भयोअतिगाढा ॥
दक्षिणदेश प्रसिद्ध बडो तिह भीतर शुद्धपुरी इकराढा ॥
सुनहोतिनमाहि प्रसिद्धबध्योगुरुके कुलवासकरयोअतिपाढा ॥
हमजो नहिं आसन लायकहैं कहु तैगुरु कौन ब्रह्मांडतेकाढा ॥
सुन मूर्ख कान भले धरियो इक और प्रसिद्धकहौतव बाता ॥
द्विजकोविद लोकप्रसिद्धबडेसुबरीतिनकी दुहितां बिष्याता ॥
कुलउज्जैलजानि मरालनकी, तिनके सम नाहिं अहे मममाता
तिसतेहम लोकनमांहि बडे हमरे सम नाहिं अहे ममताता ३८
ममः सालकमित्र सुमातुलकी दुहिता इक और भलीजगगाई ॥
तिनकेव्यभिचारकीझूठकथा शठलोकननेजगमाहिं अलाई ॥
तिनके निजमाहिसंबंधपिखे मति ताहिसमे अतिमे खुनसाई ॥
निज नारि मनोगत जीषिणमें सुमूढबटू घर नाहि टिकाई ३९

मुनिके यह बात सुदंभ बली मनभीतरसों अतिसैखुनसाने ॥
 द्विज तूं निजऊजलता अपनीजगभीतरयाविधिमोहिबखाने ॥
 सुन मोहि महात्मलोकनमें द्विजरायसु तोहि न रंच पछाने ॥
 कछु आहि अपूर्व उजलता ममभीतर सो चतुरानन जाने ॥ ४० ॥
 हम एकसमेबिधलोक गए मुनि मो पिख आसनते सुउफाये ॥
 इह ठौर बसो मुनिबृंद कहें बहु आसन ना हमरे मनभाए ॥
 बिधि आप सुगंदकरी सुखते पुन गोगरसों निजजानुलिपाए ॥
 करजोर भलीविधि आदरकै तिनऊपर मोहिविरंचिबैठाये ॥ ४१

दोहा ।

बहुर हंकार सुबोलिया, दांभिक ब्राह्मणजान ॥
 कह विरंच पुन नर कहां, कीनो झूठबखान ॥ ४२ ॥
 अथवा यह द्विजदंभहै, ताहीकीन उचार ॥
 ऐसे मने विचारकर, भयो क्रोधहंकार ॥ ४३ ॥

सवैया ।

कौन सुरेश्वरको विधिहै, ऋषिकौन सुनो कहते उपजाए ॥
 मे तपको फल जानत ना सुन बामन तूं मनमें गरबाए ॥
 कोटिसुरेश्वर विरंचिमुनीपद पंकज मोहि परे डरपाए ॥
 रिषिकी उत्पत्तिकीभूमिकही सुपुराननमाहि सुनोमनलाए ॥ ४४

१ शपथकरी । २ इंद्र अहिरयागामिहोनेते कछु नहीं तथा ब्रह्मा स्वकन्यागामी होनेते सोभी कछु नहीं । ३ यद्यपि पुराणोंमें ऋषियोंकी जन्मभूमि उत्तरीतिसे कही है। तथापि अहंकारको आसुरी संपत्तमें होनेकर गर्वसे तथा अपनी सामर्थ्यके जनावने अर्थात् सर्व ऋषियोंको नीचस्त्रियोंसे जन्मरूप हेतुकर निकृष्टता(न्यूनता)सूचन करी है ताको सुन-के आस्तिकपुरुषने कुतर्क नहींकरना चाहें, जैसे प्रपंचकी उत्पत्तिसेलेकर प्रलयपर्यन्त इंद्रादि देवता परमेश्वरने संसारमर्यादार्थ स्थापन किये हैं तैसें व्यास वसिष्ठादि-

ऋषिशृंग मृगी कुशकौशिकऔगजनीहस्तामलजुं उपजाए ॥
 बारवधू सुबसिष्ठ जए दुहिता पुन झीवरव्यास उपाए ॥
 शशिनारिविषेऋषिगोतमजे पुन मांडवमेंडकिते निकसाए ॥
 तन्या सुचंडाल पराशर जूरिषिऔर मतंग मतंगनिजाए ४५॥
 तब दंभ विलोक अनंद भयो, यह आर्य मोहि पितामहआए॥
 नामहंकार कहें जिनको, इन पेखनते मनमें बिगसाए ॥
 आर्य लोभकोमें सुतहों, मम दंभकहें तब लागतपाए ॥
 हंकारधरियो सिर हाथ तबै, सुतदीर्घआयुबडेसुखपाए॥४६॥

सवैया ।

द्रापरअंत सुमोहि पिखेतव बालहुते तव अंग मलाने ॥
 काल वितीत भयो बहुतो सुत याजगमें हम हैं सुबुढाने ॥
 नैनन मंद सुडीठ भई इहिकारणते सुत नाहिं पछाने ॥
 आज अनंद भयो पिखते सभ अंगनमो तुम हो चिलकाने ४७॥

—महान्ऋषिभी परमेश्वरने संसारमर्यादार्थ स्थापनकीयेहैं इसीवास्ते अनेक जन्मकर्मोंकरके लोगोंको अपनेअपने धर्ममें नियुक्तकरें तथा आपभी आचरण करें परन्तु तिन जन्मकर्मादिकोंकरके आत्मज्ञानका बाध होवैनहीं तथा मोक्षभी अवश्यहोवैहै याअभिप्रायवाला व्यासभगवान्का सूत्रहै तथाचसूत्रम्—(यावदधिकारमवस्थितिराधिकारिकाणां) अर्थ यहः—सृष्टिके आदिकालविषे जगत्व्यवहारके चलावणेवास्ते परमेश्वरने स्थापनकथे जे इंद्रादिदेवता तथा वसिष्ठ भृगु नारदादिक अधिकारी पुरुषहैं तिनअधिकारीपुरुषोंकूं जितनैकालपर्यन्त सोअधिकारहोवैहै तितनैकालपर्यन्त तिनोको स्थिति होवैहै औ मध्यकालविषे किसी वर शापके वशते तिनअधिकारीपुरुषोंकूं जन्मांतरकी प्राप्तिहुएभी आत्मज्ञानका बाधहोवैनहीं तथा ताअधिकारीकी समाप्तकालविषे तिनोंकूं मोक्षभी अवश्य होवैहै इति।इससूत्रप्रमाणसे महान्ऋषियोंका जन्मकर्म संसारमर्यादार्थ होनेतें अहंकारकृत निकृष्टता (न्यूनता) नहींहै; किंतु, वत्कृष्टता अधिकता है यह तात्पर्यार्थहै ।

तब आहि कुमार सूजूठ बडो कहु आनंदसों जग भीतर सोई॥
 तब दम्भ कह्यो इह ठौर बसैं बिन ताहि नमेंजग जीवन होई॥
 तव मात पिता तृष्णा पुनलोभ कहो सुखसों जगभीतर दोई॥
 पुन दम्भ कह्यो महामोहकी आयसु पाइ बसैं इह ठौरसुओई॥४८
 आप कहो किह कारणते इह ठौर प्रसाद कियो तुम आए ॥
 हंकार कह्यो सुत मोह महीपको गोप संदेश सुहै हम ब्याए॥
 चाहत ताहि विवेक हते निज कान सुने सभ लोक अलाए ॥
 ता बिरतांत सुनावनके हित आवनमोहि भयो समुझाए॥४९॥
 तब दम्भ कह्यो सुखसंग अएतव पेखनते मम देह सिरानी ॥
 मोह महीप सुआइ इहाँ सुरलोकहिते जन एहु बखानी ॥
 मोह महीप शिरोमणि जूंशिवकी नगरी सुठई रजधानी ॥
 सभलोक कहें सुखपंकजमेंमम आपसुनी यह बातसुकानी॥५०
 हंकार कह्यो किहकारणतें बहु लोकपती इह ठौर बसाए ॥
 दम्भ कह्यो इहि कारण है सुविवेक कहूं जग होन न पाए ॥
 बोध उदे यह भूमि बनारस वेद पुराण इहै मुखगाए ॥
 कुलनाशकबोध निवारणको इह ठौर निवाससुमोहिठहराए॥५१
 हंकार डरे सुनि बात इहै शिवके पुर बोध सुकौन मिटाए ॥
 तिनठौर बसैंसब जीव जितेसुखसों शिव ताहिकेबन्धछुड़ाए॥

१ तथाचाथर्वणश्रुतिः-सुमूर्षोर्दिक्षणे कर्णे यस्य कस्यापि वा स्वयम् ॥ उपदेश्यसि तं
 मंत्रं स मुक्तो भविता शिव । २ तच्च ज्ञानं भवेत्पुंसां सम्यक्काशीनिषेवणात् । अर्थ यह-
 -श्रीरामचन्द्रजी कहतेहैं:-हे शिव!जिसकिसी मरणइच्छु पुरुषके कर्णमें स्वयं (आपही)
 तिस मंत्र(तारक)का उपदेश करोगे सोपुरुष तारकमंत्रोपदेशजन्य ज्ञानद्वारा मुक्त होवै-
 गा । १ । ब्रह्मात्मैक्यलक्षण जो ज्ञान सो पुरुषोंको सम्यक् काशीके सेवनसे होवै-
 गा । २ ।

अंतसमें करुणाकरके सभ कानन तारक मंत्र सुनाए ॥
 सभ पाप मिटे शिव पेखनतें क्षणभीतरजीवन बोध उपाए ५२ ॥
 तबदम्भ कह्यो इह वात सही पर होवतना सभजीव मझारा ॥
 तिनको नहिबोधकदाचितहैजिनके उरकाम सुक्रोधविकार

१ श्रुतिः । देहान्ते देवस्तारकमुपदिशति स्मृतिरपि-सुमूर्षो मणिकर्ण्यन्तर्धोदक निवासिनः ॥ अहं दिशामि ते मंत्रं तारकं ब्रह्मसंज्ञकम् ॥ अर्थ यह:-देहांतकालमें महादेवजी तारकमंत्रका उपदेश करतेहैं ॥ तथा महादेवजी कहतेहैं:-हे प्राणी! मणिकर्णिकाके अन्तर अर्ध जलमें निवास करनेवाले अर्थात् आधेशरीरको जलमें रखनेवाले तथा मरणकी इच्छावाले तुमको मैं ब्रह्मसंज्ञक तारकमंत्रका उपदेश करताहूं इति ॥ इस कहनेकर यह अर्थ सिद्ध भया कि काशीमें मरण जन्तु मात्रको साधारणतया मुक्तिका हेतु है यह अहंकारने दम्भके प्रति कहा-तारकमंत्रका अर्थ यह है:-संसारसे भयभीत पुद्बोंको जो तारे (मुक्तकरे) सो तारक मंत्र कहिये है ।

२ तब दम्भने अहंकारप्रति कहा येवार्तासत्य है परन्तु भारत औ पुराणमें यह लिखा है:-श्लोक-यस्य हस्तौ च पादौ च मनश्चैव सुसंयुतम् ॥ विद्यातपश्च कीर्तिश्च सतीर्थफलमश्नुते ॥ १ ॥ अदाम्भिको निरालंबो लब्धाहारोजितेन्द्रियः ॥ विमुक्तः सर्वसंगैर्यः सतीर्थफलमश्नुते ॥ २ ॥ अर्थ यह:- जिसके हाथ तथा चरण निषिद्ध क्रियारहित हैं तथा जिसको तीर्थ माहात्म्यका ज्ञान है औ कृच्छ्रचान्द्रायणादि तपसहित है तथा निष्पाप कीर्तिवाला है सो तीर्थमाहात्म्योक्त फलको प्राप्त होवै है ॥ १ ॥ जो पुरुष दम्भरहित है तथा आश्रयरहित है तथा अलपाहारी है तथा इन्द्रियजित है औ सर्वसंगसँ रहित है सो तीर्थमाहात्म्योक्त फलको प्राप्त होवै है ॥ २ ॥ यद्यपि भारतपुराणमें ऐसे लिखा है तथापि श्लोक-नाविमुक्तो मृतः कश्चित्तरकं यातिकिल्बिषी ॥ ममानुग्रहमासाद्य गच्छत्येव परांगतिम् ॥ १ ॥ वाराणस्यां स्थितो यो वाकामरोषरतः सदा ॥ यो निप्रय्यापि पैशाचीर्वर्षाणां प्रयुतत्रयम् ॥ २ ॥ पुनस्तत्रैव निवसज्ज्ञानं प्राप्नोत्यनुत्तमम् ॥ तेन ज्ञानेन संपन्नो मोक्षं प्राप्नोत्यनुत्तमम् ॥ ३ ॥ अर्थ यह:-महादेवजी कहतेहैं:-अविमुक्तसंज्ञक काशीक्षेत्रमें मराहुआ पुरुष पापी भी है हौभी नरकको प्राप्त होवै नहीं किन्तु मेरे अनुग्रहकूँ प्राप्त होयकर परमगति(मोक्ष)को ही प्राप्त होवै ॥ १ ॥ तथा जो पुरुष काशीमें स्थितहुआ सदाकामक्रोधादिकोंमें ही प्रीतिवाला है सो पुरुष तीनअयुत ३०००० तीसहजार वर्षपर्यन्त पैशाचयोनिको प्राप्त होयकर ॥ २ ॥ पुनः तिसकाशीमें बसवाहुआ अनुत्तमज्ञानको प्राप्त होवै है तथा तिसज्ञानकर संपन्नहुआ अनुत्तममोक्षको ही प्राप्त होवै है ॥ ३ ॥ अयुतप्रमाण पैशाचयोनिको प्राप्त होवै है याकाभाव-

जिनकेकर पाद मनो बस है, तपकीरतिसों जगहै उजियारा॥
बहुतीरथको फलपावतहै, यह भारत और पुरान उचारा॥५३॥

दोहा ।

वेत्रपाणि आएतबै, कंचुक पाग अनूप॥
नागरजन आए सुनो, महामोह जगभूप ॥५४॥

सवैया ।

चन्दनके छिणकावकरोमणि फाटक हेम सुबेद बनावो ॥
जलयंत्र सभै ग्रहखोलिदिजे तिनभीतर कुंकुमगंध मिलावो ॥
स्रभ द्वारन बन्धनवारकरो मजमोतिनहारलडी लटकावो ॥
शक सरासन चित्रधुजासभसौधनकेसिरमाहि झुलावो॥५५॥

कवित्त ।

फेर दंभकह्यो महाराज हैसमीप आए,
चलिये अगारी सनमान अति कीजिए ॥
कह्यो है हंकार तुम भलोही उचारकियो,
हूजीए तयार सुउपायन को दीजिए ॥
जाइके उपायन सुपायनके माहि धरी,
जोरकर कह्यो यों बनारस पिखीजिए ॥
आए महामोह भूप पुरीमें प्रवेशकियो,
विविध विभूति प्रवारसो सुहीजिए ॥५६॥

—यह है:—काशीमें मरेहुए पुरुषको भैरवीयातनासैं पापका फल थोडेकालमें भोगाया जावैहै ॥ काशीसे बाहरमें पुरुषकोयमयातनासैं पापका फल चिरकालमें भोगाया जावैहै यह विशेषता है औ(नाविसुक्तोमृतः)इस श्लोकमें(ममानुग्रहमासाद्य)इस पदकरभी ज्ञानप्रदान रूपानुग्रहण है याते(ज्ञानादेवतुकेवश्यम्)इत्यादिश्रुतिबोसिंभी विरोध होवै नहीं इति । १ चोला । २ भेट ॥

महामोह भूपसु अनूप पिख हसै अति,
 अहोजडबुद्धि सभलोक बौरानेहै ॥
 लोक परलोकमाहि भोक्ताअनूपसुख,
 देहते विभिन्न मूढआत्मा बखानेहै ॥
 आकाश तरुफूल नविसालफलआश,
 करें कहो नभफलहूँको स्वाद किनजानेहै
 भयेखोटे पंडितपखंड सुचलाए जग,
 बोलसुकपोललोग सगरे ठगानेहै ॥५७॥
 जोई जग नाहि ताहि वस्तुको सुआहिकहैं,
 भयेहै बचालवाक मृषावेद मानई ॥
 चारवाकनके वाक सत्य ताहिको असत्यकहैं,
 भये मूढलोग ताहि निंदाको बखानई ॥
 अहो तत्त्व सारको बिचार तुम आपकरो,
 काटे तनशीश दृगवाही ओर ठानई ॥
 तनते न्यारो जो पधारे जीवपिखे कोई,
 तबी तनु भिन्न यह आत्मसु जानई ॥ ५८ ॥
 लोगनिको वंच पुन वंचो निज आत्मको,
 शीतजलनाइवृत आत्मतपाइ-है ॥
 नाक मुख पाद पान देह हैं समान सभ,
 मनमै न आइ कर्म वर्णको बताइहै ॥
 आपनी पराई नारि संपदा बताई श्रुति,
 नाहि हम जाने सठ भेदको अलाइहै

नारि धन भोग पुन पापको विभाग यह,
 आपनो परायो बलहीन मुख गाइ है ॥ ५९ ॥
 आत्मा शरीर यह धीर चारवाक कहै,
 आगम प्रमाण एकताहिको सुलेखिये ॥
 भूमि जल तेज वायु तावसो बताइदए,
 जाहि मै प्रमाणसु प्रत्यक्ष एकपेखिये ॥
 नारिनको भोग और द्रव्यको संयोग जोई,
 यही पुरुषार्थ न और कछु देखिये ॥
 चेतन सुभूत होई नाहि पर लोक कोई,
 मोक्षविनमृत और दूसरो न पेखिये ॥ ६० ॥

कवित्त ।

यही मनधारमुख बुद्धने उचारकीयो,
 उत्तमसिद्धांत चारवाकको पढायोहै ॥
 चारवाक शिष्यनपर शिष्यन पढाइ सभ,
 यही सुसिद्धांत लोकभीतर चलायो है ॥
 ऐसे सुन चारवाक चारवाकशिष्यलिये,
 पेखत समाज राजसभामांहि आयो है ॥
 शिष्यको बुलाय समुझाय बात एहुकही,
 दडनीति विद्या और कछु गायोहै ॥ ६१ ॥

१ पुरुषार्थहीन कहतेहैं । २ अर्थकामौ परमपुरुषार्थौ न धर्मो नापिमोक्षः । अर्थ यह है-धन तथा काम दोनोहि परमपुरुषार्थ हैं चारवाकके मतमें न धर्म है न मोक्ष है ।
 ३ देहपातही मोक्ष है । ४ राजनीतिही विद्या है ।

शिष्य उवाच ।

दोहा ।

वेदत्रयी गुरुईशकृत, विद्या कहें उदार ॥

वेदनसों कन्यो जजन, पाए स्वरग अपार ॥ ६२ ॥

चारबाक उवाच ।

सवैया ।

धूरतको परलाप सुनो यह वेदत्रयीजगमाहि बखानी ॥
 याचंक यग सद्रव्य विनाशक एस्वरलोक जिवावन प्रानी ॥
 तौ बहु दाह दहे दुमजे फल भूरलहैं बहुरीति समानी ॥
 है न कछू सुकपोलकही धनवंचनके हित एह कहानी ॥ ६३ ॥
 कृतश्राद्ध इहां मृतजीवनीको पुनजो परलोकविषे तृप्ताये ॥
 जलगंगदए तबही जगमें कुरुजांगलखेतनको विगसाए ॥
 मृतदीपशिषा बहुतेलदीये बिनपावक सोग्रहमैनिकसाए ॥
 कृतबिँयो तनकै जगलोगठगेसु एहुकहे विधिबेदबताए ॥ ६४ ॥

शिष्य उवाच ।

सवैया ।

गुरुखान सुपान हिप्राणप्रिया सुखसो पुरुषार्थ आपअलाए ॥
 इह तौ पुन तीरंथकार जिते किहकारण भोगनते डरपाए ॥
 जग सुखतजे बनजाइ बसे, तप दीरघसो निजदेहतपाए ॥
 जगभोगनत्यागसुयोगभजेसुखहेत इहैविधिआगमगाए ॥ ६५ ॥

१ वञ्चकका अनर्थवचनयेवेद तीनो हैं । २ ऋतिवजः-यज्ञ, होमादि-द्रव्य पुरोंडाशा-
 दि-प्राणि यजमान । ३ निर्वाण । ४ बहानेको कत्ते वा वञ्चनप्रकार करके । ५ अन्य
 कार ॥

चारवाक उवाच ॥

सोरठा ।

धूरत कीन प्रलाप, आगमनाम सुताधरे ॥

आशामोदक थाप, मूर्ख तृप्त सुहोवई ॥ ६६ ॥

सवैया ।

हृग दीर्घ अंजनशाम खिरेजन नील सरोरुह है विगसाए ॥

नवनागरचानवनाग कला अलिकै अलि सीसुकपोलसुहाए ॥

कह ताहि अलंगनसे जनमें कह पावक पंच सुदेहतपाए ॥

कह विजन भीष अहार कहां उपवासनकै सठ देह सुकाए ६७ ॥

शिष्य उवाच ॥

चौपाई ।

हे गुरुग्रंथकार हैं जेते । ऐसे वचन बखाने तेते ॥

दुःखविमिश्रित सुख संसारा । ताते ताको करो प्रहारा ॥ ६८ ॥

कवि उवाच ॥

दोहा ।

सुनत शिष्यकी बातको, हसे सुबालक जान ॥

चारवाक पुन युक्तियों, आगे करे बखान ॥ ६९ ॥

चारवाक उवाच ॥

सवैया ।

दुःखसंग मिले जगके सुख जेवहि दूर तजो इहभांति बखाने ॥

ते निरबुद्धि महापशु हैं हम जीवन के परतारक जाने ॥

सिततंदुल जे, दुखसंग मिले तिह नाहि तजे जन जें सुरज्ञाने ॥

इहभांति लोकायत वाकसुने महामोहबली मनमें विगसाने ७० ॥

महामोह उवाच स्वपत्नी प्रति ।

सवैया ।

माननि काननमाहि सुनो यह वाक प्रमाण महासुखदाई ।
माहि निदाघ मनो बरषा तिमकाननको सुख शीतलताई ॥
सानंद ताहि विलोकनकै नृपमोह बली इह बात अलाई ॥
आहि लोकायत सज्जनमें इन वाकनकै उरमें हरषाई ॥ ७१ ॥

दोहा ।

तिह औसर आयो तवै, चारवाक प्रधान ॥
पेखि समीप सुजाइकै, कीनो एहु बखान ॥ ७२ ॥

चारवाक उवाच ॥

चौपाई ।

जयजय महाराजजगकारण । तुम त्रिभुवनके हो प्रतिपारण ॥
चारवाकपद करे प्रणाम । सेवक सदा पछानो नाम ॥ ७३ ॥

महामोह उवाच ।

चौपाई ।

चारवाक सुखसों तुम आए । बहुत कालकै दरशन पाए ॥
सतयुगत्रेता भयेबितीत । तुमरी सारन पाई मीत ॥ ७४ ॥
द्वापर अंतभई कछु सारे । कीटभदेस बसतहैं प्यारे ॥
बैठो इहाँ समीप हमारे । समाचार कछु करो उचारे ॥ ७५ ॥

१ ग्रीष्मऋतुमें । २ पृथ्वी, अप तेज वायु इन चारोंको जों माने तिसकानाम
चारवाकई ॥

चारवाक उवाच ।

चौपाई ।

समाचार सुनिए सभदेव । प्रभुकोउ निखिल बतावो भेव ॥
पश्चिम देश बसे सुखधाम । सौष्टांग कलि कीन प्रणाम ॥ ७६ ॥

महामोह उवाच ।

चौपाई ।

चारवाक मम करो बखाना । सबविधिहै कलिको कल्याना ॥
मम प्रतापमै अति अनुरागी । कलियुगहै जगमें बड़भागी ७७ ॥

चारवाक उवाच ॥

चौपाई ।

तव प्रसाद सबविध कल्याना । तेजवंत जैसे भगवाना ॥
कीनेकाज करन नहिं रहै । तव पदमूल दरसको चहै ॥ ७८ ॥
तुमरे वाक सु सिरपर धारे । दुष्टनके तिनमूल उखारे ॥
तुम प्रसादमुदित अतिभयो । दरसनसुंदर अतिहरषयो ॥ ७९ ॥

दोहा ।

धन्य कलि तव दासहै, करे तुमारे काज ॥
तव पद पंकज वंदना, करे जगतके राज ॥ ८० ॥

महामोह उवाच ।

दोहा ।

चारवाक अतिमित्र मम, मोको करो उचार ॥
कौन कौन कार्यकरे, कलियुग जगतमझार ॥ ८१ ॥

॥ दोपाद । दोजानु । दोहस्त । हृदय । शिर ॥

चारवाक उवाच ।

सवैया ।

वेदनके पथदूर तजे सुयथेष्ट चेष्टमै नरपागे ॥
 आज वैरागकी कौन कथा त्रिणलोष्ठ कंचनसें जनलागे ॥
 ना कालिना हम कारणहैं, प्रभुके प्रताप भये बडभागे ॥
 जो धवंत महंत महाजन तेरतिनाहकि पांड परागे ॥
 दिशिउत्तर औ पुनपश्चिममै यह बेदत्रई कलि दूर निवारी ॥
 दिशि दक्षिण पर्व वेदत्रयी तनपालनकेहित हैं द्विजधारी ॥
 सम औ दमकी तह कौनकथा जिह देवसमान भई ग्रहनारी ॥
 अबकाज संपूर्ण सिद्धभये, सुविवेकहिकी जड मूलउपारी ८३॥

चौपाई ।

अग्निहोत्र पुन बेद विसाला । औरत्रिदंड भसम पुनभाला ॥
 बलमतिहीनजीवकाकारण । धरे बृहस्पतिकीनउचारण॥८४॥
 जीवनहित जन बेदबिचारे । ताते कारज भये हमारे ॥
 कुरुक्षेत्रादि तीरथ के माही । प्रबोध उदे स्वप्नेहू नाही॥ ८५॥

महामोह उवाच ।

चौपाई ।

चारवाक कलिमहा प्रवीन । मम हित भुजबल धरे नवीन ॥
 ताभुजदंडकाज मम सरे । तीरथबडे व्यर्थ तिनकरे॥८६॥
 अब मोको निह चिंताभई । तीरथबोध संक उर गई ॥
 ग्रहमहि नारि सुतनकेसंगा । कहाहोइ तह बोधप्रसंगा॥८७॥

१ परस्त्रीगमन मद्यपानादिरूप अविहितचेष्टामें नर प्राप्त हैं ।
 पिण्ड । ३ मन काय । वाणिरूप ॥

२ मृतका

चारवाक उवाच ।

दोहा ।

तव पदपंकजकोलिखी, कलियुग पातीआप ॥
याको आप बचाइये, राजन रविप्रताप ॥ ८८ ॥

चौपाई ।

याविधिसुन्योभूपति जबही । पातीलगो बचावन तबही ॥
वाचक कहे सुनो जगभूपा।कलियुगपाती लिखी अनूपा ८९

कलियुग उवाच ।

दोहा ।

तव बसकीनो निखलजग, सुरनरमुनीमहान ॥
कलियुग पद बन्दनकरे, महामोह भगवान ॥ ९० ॥
समाचार सभदेशको, सुनो जगतसिरताज ॥
तव प्रताप तव दासजग, एहु करे सभकाज ॥ ९१ ॥

छप्पयछन्द ।

जग तजेनमायामोहनाम अतीत कहावैं ॥
घरमैं लेहिकुसीद भीष पुन मागन जावैं ॥
रैनकरैं रसभोग दिने तन भसमलगावैं
आपकरैं सभपाप और को धर्म बतावैं ॥
इहभांति अतीतसुमैं करे नखशिषलौअभिमानअति-
उर निसवासर दमडाचहैं कबहुन होवैं रामरति ॥ ९२ ॥
हरिकोपंथसुदूर पंथ, बहु आपचलावैं ॥

रही फकीरी दूर मांगपुर पेटअघावैं ॥
 कह इकंत बनबास संगबहु दुंदुभवावैं ॥
 सबै निरंतर रातिदिने पुन ध्यानलगावैं ॥
 पुनधनमद मसीमलानमुख भूपसौध पुरैपौलपर ॥
 धनलिपसों व्याकुलमहा शरमापतिसभरहेपर ॥ ९३ ॥
 नीतिनिपुण नहिभूपन्याय मन उक्तविचारैं ॥
 निजप्रजापर दंडकाज भवभीतर सारैं ॥
 राजधर्मकी स्मृतिभूप न नैन निहारैं ॥
 पानाशक्त निरंतरधर्म न चीत सुधारैं ॥
 जग प्रावडवाक पुराणबिन, बैठन्यायभूपतिकरैं ॥
 राजाधिराजमहामोह प्रभुभद्र सदापश्चमधरैं ॥ ९४ ॥
 भयो उपद्रव एक सुनो नीके मनलाई ॥
 बहुनाम नारायणमांहि प्रतीत सुजनकोआई ॥
 कहुंकहुं मनलाई महाजन प्रेमलगाई ॥
 प्रातिभजैं हरिनाम नैनते नीद मिटाई ॥
 यह हरिभक्त सुबीज प्रभुजनखोटे उरपरधरैं ॥
 यहभूपआवाचनकहिसकोंतबमूलगुप्तक्रितनकरैं ॥ ९५ ॥
 चारवाकसभ और बातप्रभु मुखो बखाने ॥
 महाराज नहिजूठगहैं उरसत्य पछाने ॥
 एक पापिनी नारि भई बहु मंत्र सुजाने ॥
 यह नाम नारायण दुष्ट ताहिके संग मिलाने ॥

१ दुंदुभीवाजा ॥ २ श्याही ॥ ३ देहली ॥ ४ पुराण कहिये पुरातन तथा
 म्यायके वेत्ता जो प्राक्किवाक कहिये वकीलहैं ॥ ५ राजे बैठकर म्यायकरतेहैं या
 भावहैं ॥ ६ नाश ॥

प्रभुअपराधनीतें डरें महायोगिनी प्रबलअति ॥
जगचारवाकके वचन सुनि, करोउपाय सु यथामति ९६
महामोह उवाच ॥

छप्पयल्लन्द ।

अब कलिकी मतिबौरानी यों हम जानिओ ॥
लघु नाम नारायणमात्र जिन डरमानिओ ॥
इह राजसूयकोकरणो याजग भानिओ ॥
अश्वमेध मख मौलकच्यो जगहानिओ ॥
इह ब्रह्महत्या मातबध परपतिनी गुरुदाररति ॥
अबकरैनिडरजगमांहिजनडरनाम नाराणयभयोक्त ॥
कुबुद्धिमांघ्रिवाच ॥

छप्पय ।

नाम नारायण महादुष्ट भूपति जगगायो ॥
अजामेल इकबार लयो तिन बंध मिटायो ॥
गनिकातें पददासीतां मनतें मललायो ॥
नामदुष्ट तिह मिल्यो सुतिह वैकुंठ पठायो ॥
सुगजपति व्याकुल बारइक नाम नारायण लयो जब ॥
राजाधिराजमहामोह प्रभुताहिछडायोनिष्णुतब ॥ ९८ ॥
महामोह उवाच ।

नाम कुबुद्धि तेरो बडो सुबुद्धि पछाने ॥
जननी नाम कुबुद्धि धरचो मृतते डरमाने ॥
ते यह निखल सुवचनमोहि प्रति सत्यबखाने ॥
नाम नारायण नीच चहै जगमेरोहाने ॥

अबताहि बिनासनहेत कछु होइ उपाय सुप्रगटकरि ॥
 कुत्संत विपारप्रभुनिखलजन पठोभजें कहनामहरि १९
 धनी धर्म धन दान न रंचक मनमैं आने ॥
 निरधन भजे न नाम दानहित उद्यम ठाने ॥
 धार फकीरीभेस मूढ़ कृतारथ माने ॥
 बिनुसंतोष श्वानवृत्ति आप उत्तमकर जाने ॥
 इह तरुणअवस्थामाहि जनतजे बिषे सुउपरति अति ॥
 पुनि उमैभ्रष्ट जरठापने धनसुतदारा विषेरति ॥१००॥

कविरुवाच ॥

दोहा ।

याअवसर इकआइयो, पत्रहस्त नरआन ॥
 महामोहभूपालको, जयजयकीन बखान ॥ १०१ ॥
 उत्तर दिशाते आइयो, अनाचार प्रतिहार ॥
 यह प्रभुपत्रपठाइयो, लीजे आपबिचार ॥ १०२ ॥
 सुनकर पत्र सुपठनहित, प्रेरयोताहि सुआन ॥
 बहुपातीपठनलंगो, सुनो प्रभु देकान ॥ १०३ ॥

अनाचार उवाच ॥

छप्पय छन्द ।

उत्तरके सभ लोक करे, मैशिलापरायण ॥
 समुझे ईशानतत्त्वबकै, मुखसैल नारायण ॥
 नारिधर्मतेहीनभई बहुधा गिरडाइण ॥
 कहांधरमकीकथारसैं, व्यभिचार रसाइण ॥

प्रभुइत उत्तरदेशते, अनाचार बन्दनकरें ॥

यम अचौरता विनाप्रभु, भद्र सदामनमें धरें ॥ १०४ ॥

चारवाक उवाच ॥

चौपाई ।

और सुएक बेनती अहे । चारवाक संकत नहिकहे ॥
तुम भवपतिसबके सिरदारा । तुमरेचे निखल संसारा ॥ १०५ ॥

महामोह उवाच ॥

कौन बेनती नहीं संकावो । चारवाक तुम प्रगट सुनावो ॥
तुम मेरे अतिसै हितकारी । तुमको कहा भयो डर भारी ॥ १०६ ॥

चारवाक उवाच ।

चौपाई ।

विष्णुभक्ति नाम इकहैये । महाप्रभाव योगिनी पैये ।
कलियुगविरणप्रचारसुकीनी । तदपि अहै बलबुद्धि प्रवीनी ॥ १०७ ॥
ताऽनुग्रह नर वंस उदारे । हमें संकीटनासके निहारे ॥
देव सदा रहीयो सवधाना । विष्णुभक्तिहै ये बलवाना ॥ १०८ ॥
एकवार जहँ पाद टिकावे । मेरे न मूलन बहुरपलावे ॥
ताहि विराग तहां सुविवेका । सनेसने दिढबाँधे टेका ॥ १०९ ॥

कविरुवाच ।

महामोह यह सुनियो जबही । अतिभय भयो सुमनमें तबही ॥
मनहीमै यह गटी सुहोई । महाप्रभाव योगिनी सोई ॥ ११० ॥

१ तिसविष्णुभक्तिकर अनुग्रीतहै वल जिसका ऐसैं उदारपुरुषको हमारे जैसे कीट देखिनहीं सके तो साक्षात् विष्णुभक्तिके भक्तको देखना तो दूरहै यह भावहै ॥

दोहा ।

सदा द्वेष हमसों करे, मारी मरेन सोइ ॥
सनेसने हमको हने, महापापिनी जोइ ॥ १११ ॥

दोहा ।

महामोह यों मन डरचो, प्रगट कहे कछु और ॥
गुलाबसिंह योंहीभने, मान तजे सिरमौर ॥ ११२ ॥

महामोह उवाच ।

कवित्त ।

कहां भई संक सुनिसंक चारवाककहो
कामक्रोधआदिबीर ताहिको निवारहैं ॥
कामके भयेविकार भक्तिको बिचार कहां
होइगीनउदेकहूं बेदयों उचारहैं ॥
बैरीहोइ छोटोतौ मोटोकर जाने बुद्धि-
जामत बबूलकोसुमूलते उषारहैं ॥
जीवनकेहेत बलबुद्धिके निकेतजेई
भूपति सचेतसु उपाइको बिचारहैं ॥ ११३ ॥

दोहा ।

लघुअरिअवसर पाइके, दुःखदाइक अवनीस ॥
अहिकैंटक पगमै गडे, पीडादे नखसीस ॥ ११४ ॥

कवि उवाच ॥

चौपाई ।

महामोह तब ऊँच पुकारा । है रे को मम भवन द्वारा ॥
द्वारपाल इतने चलि आया । आज्ञाकरो देव जगराया ११५ ॥

महामोह उवाच ॥

चौपाई ॥

काम क्रोध लोभ मदमतसर । सूर नहीं जिनके को समसर ॥
तिनको आयसु यों ममदीजे । विष्णुभक्तिको हिंसनकीजे ११६
द्वारपाल तब शीश निवाए । ज्यों प्रभुकहो करो तिमजाए ॥
इमकहि द्वारपाल जबगयो । पत्रहस्त नर आवत भयो ॥ ११७ ॥

पत्रीहार उवाच ॥

चौपाई ।

उतैकलदेशहिते हम आए । प्रभुपदपंकज पास पठाए ॥
तहपुरुषोत्तमको अस्थाना । सागरतट जँहहै मदमाना ११८ ॥
यहहै बनारस जह जगराया । जाकोकुल बहु भांति सुहाया ॥
कीन प्रवेशन लाइ सबेरा । दूरहिते तिन भूपति हेरा ॥ ११९ ॥
यह भूपति कछु मंत्र बिचारे । चारवाकसो बैठ किनारे ॥
चलों समीप सुपत्र दिखाऊ । कारज बेग नबेर लगाऊ ॥ १२० ॥
गयो समीप सुपत्र दिखायो । जयजय शब्द सुमुखो अलायो ॥
मदमानपद चंद चकोरे । पत्रलिख्यो पढियो प्रभुमोरे १२१
सुनिकर मोहभयो निजलीना । है कछु दुःकर भयो मलीना ॥
चारवाकप्रति एहु अलाई । अब नहिबने सुबेर लगाई ॥ १२२ ॥

जातै कारजहोइ नहानी । चारवाक रहियो सबधानी ॥
चारवाकमुख तथा अलाई । गयो बेग भूपति सिरनाई १२३ ॥

दोहा ।

महामोह तब पत्रको, बैठ पढावे आप ॥

गुलाबसिंह याजगतमैं, जिहछायो प्रताप ॥ १२४ ॥

मदमान उवाच ।

छपप्यछन्द ।

स्वस्ति बनारसधाम विषे पदपंकज सुहाए ॥

जीत सदा ब्रह्मंडपरे सुरनरमुनिपाए ॥

सदाऽधीन धनवंत द्वेषिगनबनहिपठाए ॥

अडिग सिंहासनवैठ शीसपर छत्र फिराए ॥

राजाधिराज महमोहपद मदमान बंदनकरैं ॥

प्रभु इत पुरुषोत्तम आयतनभद्र सदा मनमें धरैं ॥ १२५ ॥

और बेनती नाथ सुनो नीके मनलाई ॥

श्रद्धामातसमेत शांतिदूति सुबुलाई ॥

दयोविवेक सुमान श्रुतिके पासपठाई ॥

ज्यों त्यों करो संबोध मोहि सँग देहु मिलाई ॥

प्रभु वह दिन रैन संबोधकर जिह किह बिधि डिग आन है

बल इत पुरुषोत्तम आयतन पत्रपठे मदमान है ॥ १२६ ॥

और कहैं विरतांत नाथ नीके मनधारो ॥

काम सहित जो धरम कहूं कहि होत न्यारो ॥

विराग विवेक सुगूढ मनो कछु मंत्र दृढायो ॥

कहूं कहूं हरि हेत होत हमहूं लख पायो ॥

यामैप्रमाण प्रभु आपतुम जानेभले मनमाहिधरो
प्रभु जिहबिध मिटे अरातिगन सोउपायशीघरकरो १२७

महामोह उवाच ॥

छप्पय छन्द ।

महामूढ बहुभये शांतिते जिन डरकीनो ॥
कहांहोइगी शांतिभयोजग कार्यलीनो ॥
ब्रह्मा निसदिन करे पुनः पुनः जगतनवीनो ॥
दक्षमखविनाशक शंभुरहे गोरी सुखभीनो ॥
कमलकपोल मकरीलिखतउर हरिपयोनिधिशैनकर ॥
पुन और जगतके जीवमै शांतिकहा कहहोइडर ॥ १२८ ॥

महामोह उवाच पुरुष प्राति ॥

सवैया ।

जालम जाह सिताब अबै ममकामको एहु संदेसह दीजे ॥
धर्मबिहीनभयो हमसों इनकी क्षणनाहि बिसाहु सुकीजे ॥
जिहभांति भजेन मतो हरिको तिमयाहि भलेदृढबंधगहीजे ॥
मूल इहै दृढ याहि गहो बस याहि भये नकछू मम छीजे १२९

दोहा ।

भूपमौलमणि जो कहो, देवकरों बहु जाइ ॥
ऐसै पुरुषबखानकै, गयो बेग सिरनाइ ॥ १३० ॥

१ अर्थयह:-अन्तःकरणमें महामोह तथा धर्मदोनो रहते हैं याते धर्मकी निष्कामताके ज्ञानमें आप्रमाणहो अर्थात् आपमानतेहो ॥ २ लक्ष्मीके कपोल कहिये गण्डस्थलमें मकरी कहिये मत्स्यकी आकृतिकीन्याई पत्रलेखा रेखा कार चिह्नतहै उरस्थलजिसको ऐसाजोहरि । ३ दूत विना विचारसँ कार्यकरनेवालेका नाम जालमहै ।

चौपाई ।

महामोह पुन चितनकरहै । कौनउपाय शांति जगमरहै ॥
 अथवा और उपाइन कैये । असंतनसंग सुबोलमंगैये १३१ ॥
 क्रोधलोभलो मम भट जेते । बेगबुल्यै सगले तेते ॥
 जिम प्रभुकहैं बने तिमकयो । ऐसेभाष पुरुष इक गयो ॥ १३२ ॥

दोहा ।

क्रोधलोभ दोनों तबै, आए सभामझार ॥
 गुलाबसिंहनृपबंद पद, लागेकरन उचार ॥ १३३ ॥

क्रोधउवाच ।

सवैया ।

प्रभु मोहिसुनीयहबात कहैं, तुम्हरे सँगशांति विरोधकमाए ॥
 श्रधा हरिकी पुन भक्ति तथा, तिनकी यहदोनभई सुसहाए ॥
 ममजीवत शांतिकी बाति कहां, यहचाहतीतीनहुप्राणगवाँए ॥
 भुजकोबल नाथ कहांकहिये, कछुभाषतहो सुसुनो मनलाए ॥
 अंधकरों दृगवंतनको श्रुतिवंतनकोबधरोंकरडरों ॥
 धृतवंतनकोसुअधीरकरों, पुन चातरकी मति दूर निवारों ॥
 हितकार्य नाहिपिखे कबही, जिनकै उर भीतरमै पगधारों ॥
 हितआत्मको नसुने कबहीपढ्यो, जितनो क्षणमाहि बिसारो ॥

लोभ उवाच ॥

सवैया ।

जिनके सिरऊपरहाथ धरों तिनकी सुदशा सुन मीत बतावैं ॥
 सुमनोरथकी सरिता परकूलहि नाहि कदाचित तेनर पावैं ॥

तिनके उर अंतर शांति कहां, नरजोधनको दिनरैनहिध्यावै ॥
 अब क्रोधसखेसुनिये सुकहों, जिह भांतिनतेधनमैमनलावै ॥
 इह मत्तगयंद सुझूलतहैं मम एहु तुरंगम भोन सुहाए ॥
 लिखपत्र सुभूपतिमोहिदयो, धनख्यावोंऔर बंगालहिजाए ॥
 इहगांउदयेकछुऔरकहे नरजे इह भांति सुचीतचध्याए ॥
 तिनके उरशांतिकीकौनकथा, इमचिततही जगमाहिबुढाए ॥

क्रोध उवाच ॥

मोहि प्रभाव सुमीत सुनोमसंगहते जन एहुकमाए ॥
 तुष्टाद्विजपूत हने मघवा शिव शीश विरंचिकेकाटबगाए ॥
 बाहजमारसुश्रोणतमैभृगुनंदनआपभलीबिधनाए ॥
 सुवसिष्ठ मुनीश्वरके सुतजे मुनिकौशिक आपसुताहिंहताए ॥

दोहा ।

विद्याकीरतिवंत पुन, सदाचार दातार ॥
 मेपदके प्रताप नर, क्षणमै भजे विकार ॥ १३९ ॥

लोभ उवाच ॥

चौपाई ।

तृश्रे आउ बेग इतओरा । मेरो बैन सुनो श्रुतभोरा ॥
 तृश्राबैठ समीप उचारे । आज्ञा करो सुप्राणप्यारे ॥ १४० ॥
 लोभकहे सुन प्राणप्यारी । क्षेत्रग्राम पुन नगर उदारी ॥
 पुरअरु दीप भूमिको चहे । आशापाश जिनके मनगहे १४१
 तिनपर कृपासु ऐसी करियो । ब्रह्मांडलाषनहतामन भरियो ॥
 तृष्णे जांउर चरन टिकेहैं । शांतिकहाजगतेनर पैहैं ॥ १४२ ॥

तृष्णावाच ॥

दोहा ।

आर्यसुतमै अरपहीं, सदाचहों सभभौन ॥
अबआयुसु तुमरीभई, मम तृप्तावै कौन ॥ १४३ ॥
ब्रह्मांडकोटको पाइ नरमें उर संगति होइ ॥
मेरो उदर नपूरई, तामहि शांति नकोइ ॥ १४४ ॥

क्रोध उवाच ।

चौपाई ।

हिंसेआउ तूइत मम ओरा । भाषत बैन सुनो तुम मोरा ॥
इतनेमे हिंसा ढिग आई । आर्यसुत मम देहु बताई १४५ ॥
तूमम धर्मचारणीनार । यहतव संगतिको उपकार ॥
मातपितादिक बंधहै जोई । करें सुषन डरें नहिकोई ॥ १४६ ॥

सवैया ।

कौन पिसाचनी मात अहेपुन कौन सुमकंड तात हमारे ॥
भ्रातसभे ममकीट समा, अब बाधव पुंज बने सभमारे ॥
जात जये खलहै सभही, इमबोलतहैं जनकीस पुकारे ॥
मीज दोऊकर क्रोधबली, कविसिंहगुलाबसुएहुउचारे ॥ १४७ ॥

नराज छन्द ।

सुगर्भलौंइनेकुल समस्तआज मारहों ॥
युवासुबाल बृद्धलौं, नएकको उगारहों ॥

१ मेरे वचनके करनेवाली । २ तेरे संगतिसे जीवको यह उपकार होनाचाहिये । ३ मकडनाम पक्षवालेजीवविशेषकाहै तथापिशाचकाहै तथा पाखंडीकाहै तथा कंजर (वेश्यासबन्धी पुरुष) काहै यह प्रसंगसे जान लेना । ४ जितनेउत्पन्नभयेहैं ।

समस्तभूमिके विषे नयाहिकोठराइहै ॥
सुक्रोधज्वाल नैनकी, विरामतो सुपाइहै ॥१४८॥

कविरुवाच ॥

दोहा ।

हिंसा तृष्णा क्रोध पुन, लोभ मिले यह चार ॥
जाइ समीप सुमोहके, जयजय कीन उचार ॥१४९॥

महामोह उवाच ॥

दोहा ।

श्रद्धापुत्रि शांतिहै, हमसंग वैरकमाइ ॥
तुम तिह ल्यावो बांधिकै, आयसु मेरी पाइ ॥१५०॥
श्रद्धापुत्रीबंधहित, गए मान नृप बैन ॥
गुलाबसिंह साचीकहे, भयो अखाडेचैन ॥ १५१ ॥

चौपाई ।

महामोह पुन कीन बिचारी । श्रद्धापुत्री शांति बिचारी ॥
तानिग्रहको और उपाइ । सोमेरे उर भास्यो आइ ॥१५२॥
शांतिमातश्रद्धाहै जोई । रहेपरतंतर सदा सुसोई ॥
उपनिषतविषे श्रद्धा नरजेती । प्रथम हटैयेसगली तेती ॥१५३॥
मातवियुक्त जबै बहु होई । मरे शांति क्षणभीतर सोई ॥
श्रद्धाबेग हटावनकाज । मिथ्यादृष्टि बुलैये आज ॥१५४॥
इतउत भूपति दृष्टिपसारी । विभ्रमवती सुताहिनिहारी ॥
विभ्रमवती प्यारी जैये । मिथ्यादृष्टिसुबोललिअये ॥१५५॥

विभ्रमवत्युवाच ॥

देवकरी जो आयसु मोको । मिथ्यादृष्टिमिलावों तोको ॥
इमकहि त्याग आखाडोगई। मिथ्यादृष्टिसहित पुनअई १५६ ॥

अथ प्रश्न उत्तर मिथ्यादृष्टीविभ्रमवतीका ॥

मिथ्यादृष्टिवाच ॥

चौपाई ।

पेषेबहुदिनभये बितीत । निकटिजात लाजत मम चीत ॥
महाराज उपलंभनकरे । ताते चीत सखी ममडरे ॥ १५७ ॥

विभ्रमावत्युवाच ॥

सखी तोहिमुखकंज निहारे । तोभूपति निज आप सँभारे ॥
तूं वाको है अतिसै प्यारी । ताते डरो चीत मझारी ॥ १५८ ॥

मिथ्यादृष्टिवाच ॥

सखी अलीक सुभाग हमारा । काहेको तैं बहुत उचारा ॥
भूपति मोमै चीत नधरई । तूं ममकाहि वडंबन करई १५९ ॥

विभ्रमावत्युवाच ॥

सखी अलीक सुभाग हमारे । अबही तूं निजनैन निहारे ॥
तेरो तनु जब भूप निहारे । तोमै रमैं न और चितारे १६० ॥
और सखी इक बाति उचारों । घूमतनैनसु तोहि निहारों ॥
कारणकौन न निद्रा कीनी । घूमतनैन सखी रसभीनी ॥ १६१ ॥

मिथ्यादृष्टिवाच ॥

एकपतीकी जो बहुप्यारी । तिनके नींद न नैनमझारी ॥
मोको सगललोक जग गहें । नींद नैन मम किहविधिलहें १६२

विभ्रमवत्युवाच ॥

दोहा ।

सखी प्यारी लोक बहु, मोकों करो उचार ॥
जे तोकों निशिदिन भजे, जासो करें प्यार ॥ १६३ ॥

मिथ्यादृष्टिरुवाच ॥

चौपाई ।

सखी मोह मम नाह पछानो । काम क्रोध लोभ पुनजानो ॥
अथवा सुनो तत्त्वनिजसार । एकएक कहि करों उचार १६४ ॥
याकुलभीतर जेनृप जाए । मोहिबिषे सगले मन लाए ॥
बालक बृद्ध युवा पुनिजेई । मोबिन रहे न निशिदिन तेई १६५

कविरुवाच ॥

दोहा ।

काम क्रोध पुनि लोभ यह, गुलाबसिंह मदमान ॥
तनमै अत्मदृष्टि बिन, होत नहीं पहिचान ॥ १६६ ॥

विभ्रमवत्युवाच ॥

चौपाई ।

कामहिकी रति परमप्यारी । हिंसा क्रोधकी सुनी सुनारी ॥
तृष्णा लोभहिकी जग गैहै । याविधनारिसु औरबतैहै ॥ १६७ ॥

दोहा ।

तूं सभके पतिसो रमहि, इहै बतावो मोहि ॥
तेचुपकी क्यों होइरही, करे न ईर्षा तोहि ॥ १६८ ॥

१ शरीरमें आत्मबुद्धि बिना इनकी प्रतीति होवे नहीं किंतु शरीरमें आत्मबुद्धिसे ही इनकी प्रतीति होवै है ।

मिथ्यादृष्टिरुवाच ॥

चौपाई ।

कैसे सखी ईर्षा करई । मोहि बिन प्राणनते क्षण धरई ॥
रति हिंसा तृष्णालौ जेती । मेरो भलो मनावैं तेती ॥ १६९ ॥

कविरुवाच ॥

दोहा ।

मिथ्यादृष्टि सुमरे जब, गुलाब सिंह इम जान ॥
हिंसा तृष्णा आदिलै, होइ सगल पुन हान ॥ १७० ॥

विभ्रमवतीत्युवाच ॥

चौपाई ।

याहिते सखी मोहि बखानी । तोसम सुभग न दूसरी रानी ॥
तोहि सुभाग जबै बहु लहे । तेगतिरूपप्रसादहिचहे ॥ १७१ ॥

सवैया ।

सखि औरकहों निशिनींदबिना जुगनैनसरोजसुतेंअकुलाए ॥
युगनूपुरकी धुनि चीतहरे परभूमिबिषे पदते खिसलाए ॥
गजगामनि तूं गति मंद चले उर चाहतहैंनिजनाहरिझाए ।
इहलक्षण जोतवनाहपिखे डरहों उरसंककरेखुनसाए ॥ १७२ ॥

मिथ्यादृष्टिरुवाच ॥

सवैया ।

सखि काहेतेसंकभई तुमको हम नाहिकीआयसमेंसुखपाए ॥
इंक औरकहोंमुनमोहिअलीजिहतेसगलोडरतोहिमिटाए ॥

१ मिथ्या जो देहइंद्रियां अन्तःकरण इनमें जो दृष्टि कहिये इनमें जो आत्माका तादात्म्याभिमान मरे कहिये निवृत्तहोवैं जब तब । २ स्वस्थानसे भ्रष्टहोवैं ।

युवती मुख चंद निहारतहीं नरचित्तचकोर महा हरषाए ॥
दृगकंज फिराइ पिखे युवती कहितां गतिजो नरताखुनसाए ॥

दोहा ।

इम भाषत दोनों चली, आवत मोह निहार ॥
देवी मिथ्यादृष्टियहि, ऐसे कीन उचार ॥ १७४ ॥

सवैया ।

कदलीसमजंघ बिरंचि रची, पुनफूलनमाल सुकंठसुहाए ॥
कर चंचलचीर उँभारतहै, कुचमंडल चन्दन लेपलगाए ॥
जनु नीलसरोज बनी अँखियाँ, पिख दीर्घमें मनकोतृप्ताए ॥
कर डोलत कंकण बोलतहैं, धुनि नूपुरकामसिखीहरषाए १७५
मुख चन्दसरोज मनो अँखियाँ दुतिदाडमदंतनहेर लजाई ॥
जग कामनिदाघंतपे जन जे दृगसिंचसुधातिनताप मिटाई ॥
नभचन्द कलाजन भूमिआई इन पेखनते मनमें बिगसाई ॥
सुगुलाबपिखेमधुमूरतिसी मलमूत्रता नहिदेत दिखाई ॥ १७६ ॥

विभ्रमवत्युवाच ॥

दोहा ।

यहमहामोह सुप्राणपति, तू अति प्यारीनारि ॥
चलो समीप प्रसन्नकर, भाष्यो मान हमार ॥ १७७ ॥
सुनिकै मिथ्यादृष्टितब, जाइ समीप निहार ॥
महामोह महाराजप्रति, जयजय कीनउचार ॥ १७८ ॥

महामोह उवाच ॥

दोहा ।

पीनउरू कुच अंकमिल, कीजे मोहि निहाल ॥
हरणाक्षि शिवशिवाकी, शोभा हरो बिसाल ॥१७९॥
हसी सुमिथ्यादृष्टि तब, मिली सुभुजा पसार ॥
महामोह सुखताहिको, निजमुखकरे उचार ॥१८०॥
अहोप्यारी संग तव, लयो रसायन सार ॥
जराइकाग्रमेदि पुन, यौवन भयो उदार ॥१८१॥

सवैया ।

पूर्वजो नव जोवनमें, सुमनोजविकार भयो बलकारी ॥
चीत मत्थेउर आनंदथे सभ औरपदार्थ थे सुखकारी
चीत इकागर ताजरठापनते मुखचन्दअमी सुनिवारी ॥
संगमते नवजोवनमें, अब फेर भयो तव प्रेम उदारी ॥१८२॥

ॐ
७

कविरुवाच ॥

दोहा ।

तरनापन तज विषय सुख, बहु दिन भजे मुरार ॥
जरठापनबिन भागसठ, युवती मदनविकार ॥ १८३॥

मिथ्यादृष्टिरुवाच ॥

सवैया ।

महाराज कहों इकबात सुनो जिह ऊपरहोत कृपाल पियो ॥
जग पूरन ताहि मनोरथहै कछु चाहत नावहु औरवियो ॥

। याकाभावयहहैं:-उमा महादेवकी न्याहं हमतुम दोनों निर्वाध निर्भय स्थितहोवै ।

नव जोबनते संग मोहि लयो बिनसेवनते किह काम जियो॥
कुरुआयसुबेग करों भरतामम जाहि निमित्तसुयादकियो १८४

महामोह उवाच ॥

तोहि चितारतहैं निशिवासर वामउरु सुनि मोहि प्यारी ॥
मांहिदिवार यथा पुतली तिम नीत बसो मम चीत मझारी ॥
चीतबिषे तव प्रेम रहो मम नीतखिरे सुमनोजकी बारी ॥
सुन मिथ्यादृष्टि प्रसन्नभई, सुप्रसादकियो मुख एहु उचारी १८५

महामोह उवाच ॥

दोहा ।

औरकहों दासी सुता, श्रद्धा शांति सुजान ॥
दूतीभई बिबेककी, पत्रलिखे मदमान ॥ १८६ ॥
उपनिषत विवेक मिलापहित, भई कुटुणी सोइ ॥
जिहविध होइ मिलाप नहिं, करो उपाय सुसोइ ॥ १८७ ॥
एक उपाय सुमैंकहों, वही करो मनधार ॥
श्रद्धा जो उपनिषतकी, सो अब देहु निवार ॥ १८८ ॥
अकुलीनी प्रतिकूल मम, श्रद्धा पापिन नारि ॥
केशनते गहि ताहिको, देहु पखंड मतडारि ॥ १८९ ॥

मिथ्यादृष्टिरुवाच ॥

चौपाई ।

याहिकाजकी चित न कीजे । मम वचनते भयो पिखीजे
मेरा वचन सुने जब रंडी । तजे वेदपथ भजे पखंडी ॥ १९० ॥

१ जीवना । २ मेरी दासीकी सुता यह गाली प्रदान है । ३ स्त्रीपुरुषके मिलाप
करावनेवालीका नाम कुटुनी है । ४ नियामकरहित ।

मेरो जीवन जबलग होई । बसै पखंड ग्रहते पदधोई
पिथ्याधर्म मिथ्यामुक्ति । मिथ्यावेद मिथ्यायुक्ति ॥ १९१ ॥

दोहा ।

याबिधि मेरो वचन सुनि, तजे वेदपथसोई ॥
जनवेदन श्रद्धा मिटे, कहि उपनिषदमै होई ॥ १९२ ॥

सवैया ।

जह खाननपाननती सुखहै बहु मोक्ष कहो कत आवत कामा ॥
परलोक नहीं सुखहोई कहां उलटे सुत नारि तजावत धामा ॥
जगबंचनके हित व्योतरची जन धूरत वेद धरे तिह नामा ॥
श्रद्धा सुन यों पथ वेद तजे सुपखंडनके वसहै बहु वामा ॥ १९३ ॥

महामोह उवाच ॥

चौपाई ।

ऐसै करें पियारी जबही । मेरो इष्ट सिद्धजग तबही ॥
इम कहि प्रेमभयोअधिकाई । मुखचूम्योगहिकंठ लगाई ॥ १९४ ॥

मिथ्यादृष्टिरुवाच ॥

चौपाई ।

भूपति यह नहिं रीति सुहैहै । मेरो चीत सुबहुत लजैहै ॥
महामोह तब कीन उचारा । धस्योबनेअववासआगारा ॥ १९५ ॥

दोहा ।

ऐसै मुखो बखानके, गयो अखाडो त्याग ॥
पिख भूपति विसमै भयो, गुलाबसिंहबडभाग ॥ १९६ ॥

दोहा ।

करुणा सखीसमेत पुन, शांति सुशील उदार ॥

जैहै श्रद्धाशोधहित, जगसभ पंथमझार ॥ १९७ ॥

इति श्रीमन्मानसिंहचरणशिक्षितगुलाबसिंहविरचिते प्रबोधचन्द्रोदयनाटके
द्वितीयोऽंकः समाप्तः ॥ २ ॥

इति श्रीमदुदासीनवर्य परमानंद शिष्य गुरुप्रसादविरचिता प्रबोधचंद्रोदय नाटक
द्वितीयोऽंकटिप्पणिका समाप्ता ॥ २ ॥



ॐ श्रीगणेशाय नमः ।

अथ तृतीयोऽङ्कप्रारंभः ॥ ३ ॥

दोहा ।

माया जिहि जग मोहियो, ब हु कुपंथ भरमाइ ॥
बहु रघुनायक दासके, होवै नीत सहाइ ॥ १ ॥
जिहि बिधि कलियुग फैलियो, सकल भ्रमायो लोइ ॥
गुलाबसिंहनृप सभामें, प्रगट दिखावत सोइ ॥ २ ॥

सवैया ।

ते इहभांति गए जबहीं तब शांति तथा करुणा तहँ आई ॥
ऊँच बुलावतहैं जननी मम उत्तर देहु कहा मम माई ॥
शांति सुनयनननीर बहै कहँ मात गई नहिं देत दिखाई ॥
तोबिन जीवन मोहिं कहां अब प्राण तजों सुलगे दुखदाई ॥
मृगरंजतकाननप्रीतिहुती जल शैलनमें तवप्रीति नई ॥
अति पावन थानन प्रीति हुती तपसा तनमें लवलीन भई ॥
जिम भौनचंडालन गौकंपिला तिममात पखंडन थाथ गई ॥
अब जीवनमातको होत कहां तनडारइहांयमधामगई ॥ ४ ॥
बिन मोहि पिखे नाहिंनावतथी अरु नाहिकछू जननीमुखपाए
नहिंसोवत मोहिविना कबहीं नहिंमोहिविनापथमाहिसिधाए

■ जैसे सर्वगौओंके मध्यमें कपिष्ठा गौ उत्तमहै; तैसे शांत्यादिकोंके मध्यमें श्रद्धा उत्तमहै ।

श्रद्धाबिन मोहिपिखे मरती, नहिं एक महूरत प्राण रहाए ॥
 अब तांबिन जीवन मोहि विडंबन, प्राणबने यमधाम सिधाए ॥
 करुणे सजनी अब शांति मरे, जगतूं मम देहु चिता सुबनाई ॥
 अब मोहि बिलंब सुहातनहीं, तन देहु हुताशनमांहिं जलाई ॥
 जनचित्त निवासतजों सजनीं, तहें जाउँ जहां सुगई मम माई ॥
 सुन शांति विलापमहाकरुणा, दृगनीर बह्यो सुलईगललाई ॥

करुणोवाच ॥

सवैया ।

सजनी इह भांति कहे मुख अक्षर, ज्वाल मनो सुदवानलकी ॥
 तन प्राण बिलातठरातनहीं, उरमोहि भयो मछलीथलकी ॥
 सुमहूरत प्राण धरो न मरो, मुखकंज प्रसन्न नहो हलकी ॥
 अब सोध लहे जगमें श्रद्धा, न मुई कछुबाँत भई कलिकी ॥
 इत औ उत पुन अरण्यपिखे मुनि आश्रमजे सुतपोबनमाहीं ॥
 तटगोमतिकै यमुना तटमें कि बसी सुभगीरथिकेतटमाहीं ॥
 कदाचित मोहमहीप डरी, छपिजाइ बसी गिरि कंदरमाहीं ॥
 कुरुजांगलकै मखसावनमें श्रद्धा कहूं जाइबसी जगमाहीं ८

शांतिरुवाच ॥

दोहा ।

सखी निहारेगी कहां, श्रद्धा कथा न लेश ॥
 मैकुरुक्षेत्र सुगोमती, औरपिखे सभदेश ॥ ९ ॥

१ मोहि पिखे विन श्रद्धा मरती, इस कहनेकर श्रद्धा शांतिकी व्याप्ति प्रतीत होवै ३
 अर्थात् जहां श्रद्धा है तहां शांति है । २ अग्नि । ३ वनकी अग्नि । ४ कलिका विडंबन है ।

सवैया ।

सरितातटमें बहुभांति पिखे तपसी जिनमाहि अनेकसुहाए ॥
 पुन मोहि मीमांसकधाम पिखे चमसाँकर थूपसुथान बनाए ॥
 पुन आश्रम चार निहाररहीदिनकोटिनकोटन जातगिनाए ॥
 नहिंबात सुनी कहूं काननमेंश्रद्धासजनी किहठौरवसाए १० ॥

करुणोवाच ॥

चौपाई ।

सखीकहों श्रद्धाहै जोई । पखंडनके वसपरे नसोई ॥
 जे अतिपुण्यवती जगनारीतै यों बिपति न लहे प्यारी ॥ ११ ॥

शांतिरुवाच ॥

दोहा ।

सखीकहों इकबात सुन, जो धाता प्रतिकूल ॥
 कहो असंभव कौनगति, वेसभ अपदा मूल ॥ १२ ॥

सवैया ।

जनकात्मजा गृह रावणके सुबसी दुःखभांति अनेकभरे ॥
 वस दानव वेदत्रयी सुभई तिनजाइ रसातल बासकरे ॥
 पुन गंधर्वकी दुहिता पतिदैत्य हरी सुमदालस रूपवरे ॥
 बिधिबासभयेजगमें सजनी कहुआपदकौनन शीशधरे ॥ १३ ॥

१ पात्र विशेष । २ कार्यासिद्धिमें क्या आश्चर्यहै । ३ सीता । ४ मदालसा नामक
 कन्या पातालकेतु नामक दैत्यने हरली यह गाथा तुलसीदासकृत रामायण, तथा
 श्रीमद्भागवतमें प्रसिद्धहै इसप्रकार श्रद्धाका पाखण्डोंके हस्तमें जाने का दैवही मूलहै
 वेदवाहकानाम पाखण्डहै ।

दोहा ।

तातैं चले पखंड ग्रह, श्रद्धा तहां जिहोइ ॥
करुणा कह्यो सुचलु सखी, इम कहि चाली दोइ ॥ १४ ॥

सवैया ।

करुणा तहैं अग्रविलोक डरी सजनी मम राक्षसनैन निहारे ॥
पुनि शांतिकह्यो कहि राक्षसहै करुणा तब पीठहि पीठ उचारे ॥
मलपंक गिरे सुखदंतनते तनमें दुरगंध भयानक भारे ॥
मुक्ताकटिकच्छ मलीन महा इह मूड पिसंग सुझंड खिलारे ॥ १५ ॥

दोहा ।

पूछ सिखंड सुकरविषे, आवत है इत ओर ॥
नैन निहार न मैं सकों, चित्त डरत है मोर ॥ १६ ॥
शांतिकह्यो राक्षसनहीं, पुदंगल है बलहीन ॥
करुणा कहे सुकौन पुन, ऐसो परम मलीन ॥ १७ ॥
शांति कह्यो सुपिशाच यह, ऐसे मेमन आइ ॥
करुणा कहे पिशाचनहिं, बहु निसमें प्रगटाइ ॥ १८ ॥
सूर्य आहि आकाशमें, किरणप्रकाशे लोइ ॥
ऐसे समै पिशाचका, कहि अवकाश सुहोइ ॥ १९ ॥
शांति कह्यो सुपिशाचनहिं, तो यह पापी आहि ॥
निकस्यो अबहीं नरकते, आवत है पथमाहि ॥ २० ॥

१. खुलावख कटिमें कच्छा है लाया है । २. मस्तकमें भूसरंगकी जटा सरीसी ।
३. मोरछल । ४. (पुद्गल वपुरात्मनः) अर्थ यह:-आत्माके शरीरका नाम पुद्गल है यह कोषमें कहा है, याते बलहीन कोई पुरुष है ।

बहुरोशांतिविचारकर, अब मैं लखियोनृतांत ॥
 महामोह पठयोअयो, यह जग जैन सिद्धांत ॥ २१ ॥
 याको दर्शन दूरतज, यह अति पतित मलीन ॥
 ऐसे शांति बखान कै, फिरिचाली मुखदीन ॥ २२ ॥

करुणोवाच ॥

दोहा ।

सखीमहूरत थिररहो, श्रद्धा लेहु निहार ॥
 यही पखंडी भाखिये, मत या भवनमझार ॥ २३ ॥
 गुलाब सिंह इम भाषकर, दोनों खरी इकात ॥
 तब नृप सभा प्रवेशकर, बोल्यो जन सिद्धांत ॥ २४ ॥
 नमोनमो अर्हन्तपथ, जे जन चले उदार ॥
 भुक्तिमुक्ति दोनो लहै, मैं अब करो उचार ॥ २५ ॥

कवित्त ।

नव है द्वारतन भौनके मझार पुन,
 आत्मा प्रकाशदीप ताहिमें सुहाई है ॥
 जैन वरभाख्यो सिद्धांतसुइकांत यह,
 गहे जनजोई जगसूख मोष पाइ है ॥
 अरे सुन श्रावक सुवाकमें बखानो तुम,
 मलमय पमाणुते सुदेश उपजाइ है ॥
 मूढनर शुद्धकरें शीतजल शीशधरें,
 होवत न शुद्ध जलकोटन नवाइ है ॥ २६ ॥

दोहा ।

आत्म विमल स्वभाव है, रिषिसेवा तिहज्जान ॥
रिषि सेवाकैसीकहो , सुनहोकरों बखान ॥ २७ ॥

सवैया ।

दूरिहिते पदपंकजको अभिवन्दनशीश निवाइ करो ॥
भोजन जो मिष्टान्न महा नित ताहि जिवावहु जोरकरो ॥
घरभीतरजो रिषि बासकरे, मनमै नहि रंचक रोष धरो ॥
गोपहुतो मत खोलिकह्यो इहभांति करो भवसिंधुतरो ॥ २८ ॥
पुनि नेपथ्य ओर बिलोकी कह्यो श्रद्धे इतआउ कहां चिरलाए
करुणा तिह शांति निहारतथी, इनपेखत कोन कनात हलाए ॥
श्रद्धा तहँ आइ समाजबरी पुन जैनसमान सुवेख बनाए ॥
कहि आयसुमोहिसुबेगिकरों, सुन शांति दुःखीसुभईमुरझाए ॥ २८

क्षपणक उवाच ॥

दोहा ।

स्वावग निखिल कुटंबको, श्रद्धे तूं गहि आज ॥
कबहुं महूरत नातजी, सिद्धहोइ मम काज ॥ ३० ॥

दोहा ।

जो आयसु सोईकरों, राजकुलीन महान ॥
इम कहि निकसे वै दोऊ, करुणाशांति बखान ३१ ॥

करुणोवाच ॥

दोहा ।

सखी प्यारी धीरधर, काहे तूं डरपाइ
नाममात्र श्रद्धा कहैं, है कछु और बलाइ ॥ ३२ ॥

चौपाई ।

अहिंसा देवी मोहिं सुनाई । पखंडधाम श्रद्धा इक आई ॥
परवहु अंबातेहै आन । तामस श्रद्धा कहै बखाना ॥ ३३ ॥

दोहा ।

ताते श्रद्धातामसी , यह तूं क्यों डर पाइ ॥

ऐसे करुणा भाखियो, अब पुन शांतिअलाइ ॥ ३४ ॥

शांतिरुवाच ॥

चौपाई ।

सावधान सजनी मैं होई । जैसैं कहें बातिहै सोई ॥
यह अतिदुराचारणी है ये । अंबा सदाचार रतिपै ये ॥ ३५ ॥
यह दुर दर्शनरूप मलीनी । अंबा प्रियदर्शन सुखभीनी ॥
ऐसो रूप ताहि नहिं होई । संसामनमें करो न कोई ॥ ३६ ॥
अंबा याके बस नहिं होई । जो तूं कहे बात है सोई ॥
चलैं अगारी सौगत धामा । तहाँ मिलै जो बहुअभिरामा ३७
यों कहि चली अगारी जबहीं । भिक्षुक एक निहायो तबहीं ॥
पुस्तक हाथविषे दर्शायो । बौद्धसिद्धांत सभामहि आयो ३८

भिक्षुक उवाच ॥

चौपाई ।

क्षणभंगुर सकल पदार्थ हैये । है भीतरबाहर समपैये ॥
अहे निरात्ममाहि ज्ञान । दर्पणसममुख होवै भान ॥ ३९ ॥

१ बुद्धशास्त्राभिमानिदेवता । २ घटादिक्रयिष्य बुद्धिमें कदिरत होनेवे अन्तरवर्ति-
हुएभी भ्रांतिसे बाहरकी न्याई प्रतीत होवै है । अहे निरात्ममाहि ज्ञान । दर्पणसममुख
होवै भान । याका अन्वय यह है :- ज्ञानमाहिनिरात्मअहे अर्थात् ज्ञान कहिये बुद्धिरूप-
आत्मामें प्रवृत्तिविज्ञानधारारूप अनात्मस्थितहैं सो आत्मरूपातिसंबाह्यप्रतीत होवै है
जैसैं ग्रीवा स्थितमुखदर्पणमें भासे है तैसैं ।

सो बहुज्ञान वासना हीन । फुरे विषय विनु लखैप्रवीन ॥
 यों कहि पोथी आगे धरी । शीशनिवाइप्रकरमाकरी ॥४०॥
 अहो साधु यह धर्म सुहायो । जो निजमुखते दुद्ध बतायो ॥
 यामैं सुखमोक्ष जगदोई । खेदबिना जनपावै सोई ॥ ४१ ॥
 सेवकके निज भौनमझारे । सुंदरवास सुमाहि चुबारे ॥
 मनअनुकूल बनककी नारी । बहुविधि भोजन धरेसवारी ४२ ॥
 कोमलसेज सुवणक बिछाए । जोर दोऊ कर देइ बैठाए ॥
 श्रद्धासहित उपासक जेते । युवतीसहित भजे पदतेते ॥ ४३ ॥

दोहा ।

अंगराग तनलाईकै, वणक मनोहरनारि ॥

भजे निशाशशिऊजली, पद निजपाणि मझार ॥४४॥

करुणोवाच ॥

सवैया ।

सजनी यह कौन सुआहिइहा तनुतालसमान सुजाहिलबायो ॥
 सुपिसंगकषाय धरेतनअंबर सूक्ष्मजो धरमै लटकायो ॥
 पुन भाल सुकिंचित मुंडतहै किपिखो कचमूलहुतेउखडाय ॥
 दुमछाल बिसालसुनाल धरी नयती यह जान परेरसकायो ॥

शांतिरुवाच ॥

दोहा ।

बौद्धागम सजनीइहै, भिक्षुक रूपबनाइ ॥

वंचतहै सभलोकको, यों मेरे मनआइ ॥ ४६ ॥

भिक्षुक उवाच ॥

दोहा ।

यतीउपासक औरसभ, सुनो सुनिजनिज कान ॥
वाक सुधारस बंधहर, कहे सुगत भगवान ॥ ४७ ॥
योंकहि पुस्तक लीनकर, खोलि नवायो शीश ॥
गुलाबसिंह पेखत सभे, राजसमाजमहीश ॥ ४८ ॥
दिव्यनैनसभकी पिखो, गति शुभाशुभ दोइ ॥
क्षणभंगुरसभ भौवहैं, थिर नहि आतमकोइ ॥ ४९ ॥

सवैया ।

इमजानत जो सभमोहजितोनिजदारन और अगारनमाही ॥
भिक्षुकजो घरमाहि रमे तब द्वेष न रंच करो मनमाही ॥
मनको मलतो इहभांति मिटे पुननेपथ्यपेखि कह्योमुखमाही ॥
श्रद्धे इतआउ बिलंबकहा सुप्रवेशकियो श्रद्धाक्षणमाही ५०

श्रद्धेवाच ॥

दोहा ।

देव करो आयसु प्रगट, करों कौन अब काज ॥
मैक्षणमें सोईकरो, तुम सभके सिरताज ॥ ५१ ॥

भिक्षुकउवाच ॥

दोहा ।

भिक्षुक सेवकसकलजे, ताको गहि निजहाथ ॥
मोहिमते अतिथिरकरो, सभे निवावे माथ ॥ ५२ ॥

श्रद्धोवाच ॥

जो आयसु सोईकरों, ऐस बखाने बैन ॥
निकसि चले वै सभाते, शांतिनिहारे नैन ॥ ५३ ॥

शांतिरुवाच ॥

सजनी यहभी तामसी, श्रद्धा जानी मोहि ॥
करुणा कह्यो सुऐवहै, भली पछानी तोहि ॥ ५४ ॥
याअवसर क्षपणक अये, लाबो डीलसुहाइ ॥
भिक्षुक जातो हेरकै, ऊचेलयो बुलाइ ॥ ५५ ॥
रेभिक्षुक इतआउ तुम, कछु पूछो अब तोहिं ॥
तेरी मेधा मैं पिखों, प्रगट बखानो मोहि ॥ ५६ ॥
सुनि भिक्षुक पुनि कोपियो, भाषे वचनकठोर ॥
हापापी मलपंकधर, लेहि परिक्षा मोर ॥ ५७ ॥
क्षपणक कहे सुक्रोध तज, करो बेगि अतिरोध ॥
शास्त्रगति कछु पूँछहों, काहेकरो सुक्रोध ॥ ५८ ॥

भिक्षुक उवाच ॥

क्षपणक तू कछु जानहै, शास्त्रकथा उदार ॥
भवतु प्रतीत पूछो सुअब, भाखों क्रोधनिवार ॥ ५९ ॥

क्षपणक उवाच ॥

चौपाई ।

क्षणभंगुर तव मतआत्मअहै । काहिनिमित्त व्रततुमगहै ॥
याको उत्तर प्रथम उचारो । क्षणक आत्मा किहबिधितारो ६० ॥

१ अरेक्षपणक शास्त्रमपिबेत्ति । भवतुप्रतिक्षामस्तावत् उपसृत्यकिंपृच्छसि । यह संस्कृतका पाठहै अर्थ यह:-भवतु कहिये जैसातू जानताहै तैसा जाणो परंतु मैंभी तेरी परीक्षा करताहूं ऐसे कहिकर भिक्षुक क्षपणकके समीप जायकर कहनेलगा कहुं क्या पूछता है क्रोधरहित होय कर मैं तेरेको उत्तर कहताहूं यह दोहाका भावहै ।

भिक्षुक उवाच ॥

अरे अरे अब करों बखान । मेरो मतो सुनो निजकान ॥
विज्ञानलक्षण आत्महै जोई । रहे संतान मरेक्षण सोई ॥ ६१ ॥

दोहा ।

अस्मत्पंक्तिपरो पुनः, कश्चित्ज्ञान सुहोइ ॥
नष्टवासना ऊजलो, मुक्ति लहेगो सोइ ॥ ६२ ॥

क्षपणक उवाच ॥

चौपाइ ।

सुन मूर्ख जन्मान्तरमाही । जो आत्मको मुक्ति लहाही ॥
तो अब नष्टकलेवर थारा । कौनलाभको तव उपकारा ॥ ६३ ॥
पूछों और सुनो मनलायो । किन तव ऐसो धर्म बतायो ॥
ननु सर्वज्ञ बुद्धहै जोई । ताहि कब्यो यह धर्म सुसोई ॥ ६४ ॥

दोहा ।

बुद्ध भयो सर्वज्ञ जो, कैसे जान्यो तोहि ॥
याको उत्तर होय जो, प्रगट बखानो मोहि ॥ ६५ ॥

भिक्षुक उवाच ॥

चौपाई ।

बुद्ध बनायो आगम जोई । तामैं कब्यो सर्वज्ञ सुसोई ॥
तातैं तां सर्वज्ञ सुजाने । बुद्धवाक यह प्रगट बखाने ॥ ६६ ॥

१ अस्मत्पंक्तिकहिय विज्ञानसंततिमें विज्ञानपरंपरामें कश्चित्कहिये कोई विज्ञानलक्षणपुरुष प्राप्तज्ञानवाला तथा ऊजल तथा वासनारहित हुआ सोई मुक्तिको पावेगा ।
२ यदि मन्वन्तर कालान्तर में कोई आत्मा मुक्तिको पावेगा तो अब तेरे शरीरके नष्ट होयां तुमको लाभ उपकार करेगा न कबुभी करेगा यह चौपाईका भावहै ।

क्षपणक उवाच ॥

सवैया ।

बुद्धवाकनते सर्वज्ञ सुबुद्ध जबै, रिजुबुद्धि सु ताहि पछाने ॥
 लो सर्वज्ञ सुमोहिलखो जगमैं, सबभूत भविष्यत जाने ॥
 पितरपितामह सातकुलीलग, तू मम दासनही ममछाने ॥
 सुनके यहबात दिगंबरकी, पुनि भिक्षुक चीत्त बडे खुनसाने ६७

भिक्षुक उवाच ।

दोहा ।

हा पिशाचपापी बडे, मोको कहे सुदास ॥
 दंतपंकधर मलन अति, बुरीसुतें तनबास ॥ ६८ ॥

क्षपणक उवाच ।

चौपाई ।

रे विहार दासीके पियारे । यह इक मम दृष्टांत उचारे ॥
 कोपनतू मनभीतर आन । तेरो हित अब करो बखान ॥ ७९ ॥

दोहा ।

बुद्धअनुसासन दूरतज, अर्हतमतो सुधार ॥
 मोहि दिगंबरपद लहो, देहु सुवसन उतार ॥ ७० ॥

भिक्षुक उवाच ॥

चौपाई ।

हा पापी तू भयो सुनष्ट । औरन नाशवहैं अतिदुष्ट ॥
 मनो मशान पिशाचहि आयो । यों तब देख लो क डरपायो ॥

१ वेश्याके भर्ता यह हमने दृष्टांत कहाहै ।

लोकअनिंदत जो बड भागी । अपनो राजसुख बहुत्यागी ॥
तेरो बेस पिसाच सुजोई । कौनचहे भवभीतर सोई ॥ ७२ ॥

दोहा ।

अहंत नहि सर्वज्ञथो, धर्म कहे किह सोइ ॥
तो बिनश्रद्धा ताहि मत, कहो सुकांको होइ ॥ ७३ ॥

क्षपणक उवाच ।

चौपाई ।

ग्रहनक्षत्र सकल सोजाने । चंद्र रविको ग्रहण बखाने ॥
नष्ट लाभ पुन भावीज्ञान । पाछे भई सु करे बखान ॥ ७४ ॥
गणनामहि अंतर नहिरहे । अतीन्द्रियवस्तुज्ञान वहुकहे ॥
तातेहै सर्वज्ञ अहंत । ऐसैं माने जे जगसंत ॥ ७५ ॥

कविस्वाच ॥

दोहा ।

सुन भिक्षुक अतिशयहँस्यो, भूपति सभामझार ॥
गुलाबसिंहगति औरही, लागोकरन उचार ॥ ७६ ॥

भिक्षुक उवाच ।

चौपाई ।

अनादिकालका ज्योतिषजोई । अतीन्द्रियज्ञान कहे सबकोई ॥
तांपरैतारक तुम जग भये । कष्टव्रत शिरपर धरलये ७७ ॥
और कहों इककरो बखान । तव मतजीवशरीर प्रमाण ॥
बिनासबंध त्रिलोकीज्ञान । ताको किहविध होइसुभान ७८ ॥

१ अहंत तो सर्वज्ञ था नहीं तिसने धर्म विसप्रकार कहा सो कहिये । २ वश्वक । ३ विज्ञानरूप ।

कुंभोपहित दीपक है जोई । यद्यपि शिषा बडीतिह होई ॥
 ग्रहमें अहै पदार्थ जेते । कबी प्रकाश सके नहिं तेते ॥ ७९ ॥
 ताते अर्हतदर्शन जोई । उभै सुलोक विरोधी सोई ॥
 सौगतदर्शन अति सुखकारे । बहु हम सुंदरनयन निहारै ॥ ८० ॥

शांतिरुवाच ॥

दोहा ।

सजनी श्रद्धा नहिंइहां, चलै ठौर अब आन ॥
 करुणा कह्यो सुएवकर, आगे कियो पयान ॥ ८१ ॥
 शांति सु आगे देखकर, बोली वचन उदार ॥
 सोमसिद्धांत सुयह खडो, आगे सखी निहार ॥ ८२ ॥
 भवतु तथा करुणा कह्यो, चले समीप सुयाहि ॥
 मत श्रद्धा तह होइ पुन, अबलौ पेखी नाहिं ॥ ८३ ॥
 तबै कपाल करूप धर, सोमसिद्धांत प्रवेश ॥
 कीनो सभामझार तह, जह कीरति वरम नरेश ॥ ८४ ॥

सवैया ।

नरहाडनकी गल मालधरी, शैवदंतनके श्रुति कुंडल छाए ॥
 भुज अंगदहाडनके सुधरे, निशको सुमशाननमाहि बसाए ॥
 मञ्जन छारविषे सुकरे, तनमें, सुमशानकी छार लगाए ॥
 अतिभीषन आहि अकारबडो, नरमूडकपाल सुभोजन पाए ॥ ८५ ॥

कपालक उवाच ॥

दोहा ।

योगांजनसों मैं पिखों, जो कछु जगत मझार ॥
भिन्नाऽभिन्ना सो ईशते, लीनो जगत निहार ॥ ८६ ॥

कविरुवाच ॥

क्षपणक ताहि बिलोकिकर, भिक्षुक कीन उचार ॥
एहु कपालक बृतीनर, पूछे ताहि विचार ॥ ८७ ॥
क्षपणक भिक्षुक पूछियो, ताहि समीप सुजाइ ॥
कपालकरे नरमुंडधर, हमे सुदेहु बताइ ॥ ८८ ॥
हमरे उर संशयभयो, धर्मसुतेँ मत कौन ॥
तबै कपालक बोलियो, महा अमंगल भौन ॥ ८९ ॥

कपालक उवाच ॥

कवित्त ।

सुन क्षपणक अब तोहिको बखानकरोँ,
सुनके हमारो धर्म चित्तमाहि धारिये ॥
भालके कपाल यह चरबी बिसाललगी,
मांसकी अहूतीगहि पावक सुडारिये ॥
भूसुर कपाल यह डारमदरा बिसाल पुन,
कीजे मुखपान इम वृतको उपारिये ॥
काट नरमुंड हम भैरवसुझुड भजेँ,
श्रोणतकी धार पांव भैरवपषारिये ॥ ९० ॥

सुनकै सुभिक्षुक दबाइ दोऊकानलए,
 क्षपणक ओर पुन ऐसो तो अलायो है ॥
 सुनो बुद्ध बुद्धवंत संत हो महंत बडे,
 दारुण सुधर्म कपालक बतायो है ॥
 क्षपणक ताहिको पुकार जनमाहि कह्यो,
 घोर पापकारी किने याहिको उगायो है ॥
 गुलाब सिंह सुनत कपालक कराल अति,
 कीने दृगलाल मनमाहि सुनसायो है ॥ ९१ ॥

कपालक उवाच ॥

कवित्त ।

मुंडत सुमुंडरे चंडाल भेषपापी बडे,
 बडेही पखंडी शिर केसन पुटाइ है ॥
 लोकनके ठागरे सुभागते पलाइ गए,
 शिवको महानपथ ताहिमें न आइ है ॥
 चतुर्दश भौन जोई क्षणमें उपाइलए,
 करे प्रतिपाल पुन क्षणमें खपाइ है ॥
 वेदांतके सिद्धांतमें प्रसिद्ध प्रभाव जाहि,
 पूरन भवानीपति लोग वेद गाइ है ॥ ९२ ॥
 ताहिको सुमतलयो जाहिको प्रभावनयो,
 धर्मको महात्म सुनैन देखि लीजिए ॥
 विष्णु दिजेश औ सुरेश आदिवडेदेव,
 नैननके निहारो कहोईहा आनदीजिए ॥

१ जैसे वैष्णवमतमें हेविष्णो हेविष्णो ऐसे वैष्णव उच्चारण करते हैं तैसे बुद्धके मतमें
 बौद्ध भी हेबुद्ध हेबुद्ध ऐसे उच्चारण करते हैं ।

नभरविचन्दऔनक्षत्रकेकदंबजिते,
 कहो याहिगतेधरबैठेहीरुकीजिए ॥
 कहो नरनागर सुभूमिजल पूरदियों,
 कहो क्षणभीतर सुतोयसभ पीजिये ॥ ९३ ॥

क्षपणक उवाच ॥

सुनरे कपालक सुभईमति बालक;
 सुमानवको मूंड तव करमै उठायोहै ॥
 काहूं इंद्रजालक सुमायाको दिखाइ तब,
 मोह मन लयो उर तोहको भ्रमायोहै ॥
 ऐसे सुन कान सुकपालक मलान अति,
 दाबि दोऊकान मनमाहि खुनसायोहै ॥
 इंद्रजालवत भगवंतको सुमूढकहैं,
 तीनलोक जाहि क्षण एकमै बनायोहै ॥ ९४ ॥
 तोहि दुष्टात्मता सुमोहिते नसहीजाइ,
 काढिके सुखडग अब करमै डठाइहों ॥
 कालकरवालसों उतार भाल तेरो अब;
 कंठ तव नालते सुलोहूकोचुआइहों ॥
 डमरू बजाइ पुन भूतकिलकाय संग.
 काट तव मूंड सुभवानी को चढाइहों ॥
 श्रौणतकी धार छुटे फेन अरु बूंद उठे,
 पेखि मुखहस शिवपतनी रिझाइहों ॥ ९५ ॥

दोहा ।

ऐसे मुखो उचारकै, लीनोखडगनिकार ॥
क्षपणक पिख उर भयभयो, लागो करन उचार ॥ ९६ ॥

क्षपणक उवाच ।

दोहा ।

अहिंसा परम सुधर्महै, महाभाग इमजान ॥
बरचो सुभिक्षुक अंकमैं, ऐसे मुखो बखान ॥ ९७ ॥
तब भिक्षुक कपालकको, वारन कीनो आप ॥
महाभाग भैरव भक्त, क्षपणकहै निहपाप ॥ ९८ ॥
कौतुककथानिमित्त अब, हनो न याके प्राण ॥
कपालक ऐसे सुनतही, कीनोखडगमियान ॥ ९९ ॥
क्षपणक स्वस्त सुहोइकर, बहुर पुछे विख्यात ॥
महाभाग यद्यपि कुपें, तदपि पूछों बात ॥ १०० ॥
कह्यो कपालकपूछ अब, क्षपणक प्रश्न सुकीन ॥
मैं सुनियो तुमरो धरम, अहे सुपरम प्रवीन ॥ १०१ ॥
कैसे तव मत सूखहै, कैसे मोक्ष तुम्हार ॥
मैं उरमें संशयभयो, नीके करो उचार ॥ १०२ ॥

कपालक उवाच ॥

चौपाई ।

विषयविना सुख कहूं न पेखै । आनंद बोध विषयमें लेखै ॥
ताते विषयभोगहै जोई । वही सुख कछु और न होई ॥ १०३ ॥

आत्मस्थित मोक्ष बखाने । ते पशुबुद्धि सुमहा अजाने ॥
 उपलवस्था बहुजगअहै । बुद्धिवंत तिह किह बिधचहै ॥ १०४ ॥
 अपनीवयकी जो अनुरूपा । युवती मिले सोमोक्ष अनूपा ॥
 यापर संमत तोहि दिखाऊं । तेरो सब संदेह मिटाऊं ॥ १०५ ॥
 पार्वती प्रतिरूप नवीना । तासंगरहे सदा सुखभीना ॥
 चन्द्रचूड शिव मुक्तिभनीजे । क्रीडाकरें दरस दुःखछीजे ॥ १०६ ॥

भिक्षुक उवाच ॥

दोहा ।

श्रद्धालायक नाअहे, महाभाग यह रीत ॥
 विषयराग बीत्यो नहीं, मुक्ति कहा तिहमीत ॥ १०७ ॥

क्षपणक उवाच ।

दोहा ।

अरेकपालक रोषतजि, पूछों बात प्रसिद्ध ॥
 अर्ध शरीरी मुक्तिपुन, यह मत सकलअशुद्ध ॥ १०८ ॥
 सुनत कपालक मनविषे, कीनो इहें बिचार ॥
 याके अतः करणमैं, अहे अश्रद्धाभार ॥ १०९ ॥
 निजमतश्रद्धा आज पुन, लीजे बेगबुलाइ ॥
 मुखोंबखान्यो प्रगट तिन, श्रद्धे तूं इतआइ । ११० ॥
 तब आई श्रद्धा तहां, रूप कपालक धार ॥
 करुणा ताको हेरकर, कीनो शांतिउचार ॥ १११ ॥

१ सुखानुभवसे रहित जे जीवकी स्थिति मुक्ति मानतेहैं । २ दृष्टांत । ३ पार्वतीके सटश स्त्रीके साथ जो क्रीडाकर्ताहैं सो मुक्त कहाजावैहैं ऐसे महादेवजी कहतेहैं अर्थात् उमासहित महादेवके उपासकोंको सरूपामुक्तिकी प्राप्तिहोतीहै यहतात्पर्यार्थहै । ४ अर्धगीकी प्राप्तिही तिनके मतमें मुक्तिहै सो पूर्वकहा भी है अपनीवयकीजोअनुरूपा युवती मिलेसो मोक्षअनूपाइति ।

सखी रजोगुणकीसुता, श्रद्धा याहि पछान ॥

गुलाबसिंहकवि रूप तिह, आगे करे बखान ॥११२॥

सवैया ।

नील सरोज विलोल महादृग माग संधूर सुपूर बनाई ॥
 सुंदर भूषण आहि घने नर हाडनकी गलमाल सुहाई ॥
 पीननितंब सुपीनकुचाकटि मध्यम आननचन्द लजाई ॥
 आइ प्रदक्षण ताहि दई कहिस्वामिन आयसु देहु बताई ॥
 है अभिमान बडो इनको अब भिक्षुक को गहिलेहुँ पियारी ॥
 यों सुनबात कपालककीहँस, भिक्षुक अंकमिली भुजडारी ॥
 भिक्षुक सानँद अंकलई तन रोमखडे सुजगे शिवआरी ॥
 सुअहोमुख याहि कपालनिका हम धनभये इमबात उचारी ॥
 पीन पयोधर नारि कबू जिनके मतना मम अंक छुहाई ॥
 भूलपिखो तब मारकरें अरु दोषजनावत ग्रन्थ सुनाई ॥
 श्रावण औ तिनग्रन्थनको शतबार धिकारबडे दुःखदाई ॥
 आज कपालनिपीनकुचाछुहि मोदबडे सुबडी सुखदाई ॥११५॥
 सुअहो शुभपुण्यकपलकके जिनके मतयाबिधकोसुखपैये ॥
 सुअहो यह सोमसिद्धांत बडो, जिनके सम और नदूसरहैये ॥
 पुन है यह धर्म अचंभ बडो, बडभाग सुनो सुकहामुखगैये ॥
 अब मैं दृढश्रावण पंथतजे, कबहुँ तिनके मत भूल न जैये ॥१६॥
 परमेश्वरको यह सोमसिद्धांत, सुतांहिविषे अब मैं चलआयो ॥
 अब तू गुरुशिष्यसु मोहि पिखोगुरुसीषदिजे सुपरेतव पायो ॥
 पिख ताहि दिगंबर कोपभये, सुकपालनिसोंतव अंगछुहायो ॥
 शठभिक्षुकदूरचलो अति दूषत क्यों मम आवतहै निकटायो ॥

दोहा ।

तब भिक्षुक क्षपणक कह्यो, वंच्यो पापविसाल ॥
याहि कपालनिसंगसुख, कहां तुम्हारेभाल ॥ ११८ ॥

चौपाई ।

तब भिक्षुक पुन एहु उचारी । क्षपणकको गहुबेगप्यारी ॥
क्षपणकअंग मिली दगलोले । भयेरुमंचसुक्षपणकबोले ॥ ११९ ॥

सवैया ।

सु अहो सुन श्रावग श्रावगजू सुकपालनिसंग बडोसुखदाई ॥
अतिसुंदर देह सनेह बढे, सुहिफेरमिलो भुजदंड लँबाई ।
सुन श्रावग सुख महानभयो, यह अंशृतकी सुविरंचि बनाई ॥
अबजाइ इकंत रमोतिनसों, इमगूढतिने मनमाहि ठराई ॥ १२० ॥
घनपीनपयोधरसोभिन तूं, मृगशावकभीत सुनैन तिहारें ॥
सुकपाल निजोममसंग रमे, तब श्रावगको डरुनाहिं हमारे ॥
सुकपालक आगमधनअहो, जिनभीतर मोक्षसु सूख अपारे ॥
सुकपालक आज अचार्य तूं, हमदास भयेतव पादजुहारे ॥ १२१ ॥

दोहा ।

भैरवके अनुसारने, शिक्षा दीजे मोहि ॥
मैंसभ पंथ निहारया, पूरण पेखे तोहि ॥ १२२ ॥
कह्यो कपालक दोनको, बैठो मो ढिग आइ ॥
तब क्षपणक भिक्षुक तथा, बैठे मोल झुकाइ ॥ १२३ ॥
कपालक भांजन हाथलै, बैठो लाईध्यान ॥
श्रद्धा तबै कपालनी, ल्याई सुरा महान ॥ १२४ ॥

सवैया ।

भगवंत महंत बडे जगसंत, सुमैमदसों यह पूर्णकीयो ॥
 तब नैन उधार बिलोकि भलीबिधि, आप कपालकसोमदपीयो
 कछु शेषरह्यो मदभांजनमैं, तिनभिक्षुक और दिगंबरदीयो ॥
 यह पावन अमृत पानकरो, सबबंधतजोसुखसोंसुतजीयो १२५

तथाच तंत्रे

पीत्वा पीत्वा पुनः पीत्वा, यावत् पतित न भूतले ॥
 उत्थाय च पुनः पीत्वा, पुनर्जन्म न विद्यते ॥ १ ॥

सवैया ।

भवभेषज है पशु पाशकटे, मदपानसु भैरव आप बतायो ॥
 इतते मनमाहिं विचार करें, सुदिगंबर योंमुखमाहिं अलायो ॥
 हमरे मतमै मदपान नहीं, सुअर्हतगुरुमुहि आप छुडायो ॥
 किहभांति कपालक जूठपिवों, मदिराइहभांतिसुभिक्षुकगायो ॥
 सुकपालक पेख कह्यो श्रद्धे, सुविचारकरें मनमें सकुचाए ॥
 अबलौं मति याहि मलीनअहे, पशुभावनहीं इनके सुमिटाए ॥
 हमरे मुख संग सुदोष अपावन, याहि सुरा मनमाहिं ठराए ॥
 अब तूं मुखआसवपूरणकै, इन देहु सुराजु इने भ्रम जाए १२७ ॥
 सुसदा शुचि नारिनको मुखहै, इहभांत कहें कवि बेदबीयो ॥
 श्रद्धा सुकपालक जोरदोऊ कर, नाथ कहो सुबनै अबकीयो ॥
 मदभांजन लै मुखपानकरे, पुन शेष सुभिक्षुककै कर दीयो ॥
 मुहिआजप्रसादमहानभयो, इमभाषसुभिक्षुकसोमदपीयो १२८

१ मुखता । २ अपने मुखमें मदिरा पवित्रकरकै । ३ स्त्रीमुखं तु सदा शुचिः ऐसे कहाहै परंतु तहां अपने स्त्रीका मुख शुचिहै यह कथन है परस्त्रीके मुखका निषेध है पापका जनकहोनेते ।

सुअहे यह आसंव गंधबडी, मुखपानकरे मनमे बिगसाई ॥
 नहिं बारबधूसंग पानकरे, मुखगंध सरोजसमान सुहाई ॥
 सुकपालिनिके मुख गन्धमिली, अबपीवसुरासभमे सुधाई
 सुर सांच सुधा उर चाहतहैं, अब मोहि त्रिलोकिसुदेत दिखाई

क्षपणक उवाच ।

दोहा ।

रेभिक्षुक मतपीव सभ, भयो प्रसादसु तोहि ॥
 याहि कपालिनि जूठमद, देहु कृपाकर मोहि ॥ १३० ॥
 तब भिक्षुक मद चखकर, दीनो क्षपणकहाथ ॥
 पीवत प्रसन्न सुहोइ मन, बोल्यो झोक सुमाथ ॥ १३१ ॥

सवैया ।

सुअहो मदस्वाद महामधुरो, सुअहो मदगंध बडी सुखदाई ॥
 चिरबेमुखयासुखते सुरह्यो, सुअहंतकरी मोहि भूरिठगाई ॥
 सुन भिक्षुक मेढग घूमतहैं, सभ अंगनमै उपजी अलसाई ॥
 अबसैनकरो पुन भिक्षुकतौ, अबऐव करो मुखबात अलाई ॥ १३२ ॥

सवैया ।

बहु दोन तहां तब सोइ रहे, सुकपालक यों मुखमाहि उचारे ॥
 पिख एहु कपालिनि दोनो परै, बिनमोलभये अबदासहमारे ॥
 अब नाचकरें तब दोऊनचें, पिख ताहि दिगंबर नैन उचारे ॥
 भिक्षुकरे गुरुसंग कपालिनि, नाचत पेख महामतवारे ॥ १३३ ॥

सवैया ।

इनके संग आउ सुनाचकरें, कहि भिक्षुक ऐंवकरें बिगसाए ॥
मदघूमत नैन सुनाचकरें, थिबके पद्यों सुखमाहि सुगाए ॥
घनपीनपयोधर चन्दमुखी, मृगनैन कपालिनि तोहि लजाए ॥
कविसिंहगुलाब लहेंगतियों, जिनके उरमें महामोहभ्रमाए ॥ १३४

काविरुवाच ॥

सवैया ।

जिनके मनमें हरिध्यान नहीं, शुभपंथनते मिटजावहिगे ॥
तजि संयमनेम असंकरहें, जगभीतर सिद्ध कहावहिगे ॥
तज पंथ सनातन माहि कलू, मन बांछत पंथ चलावहिगे ॥
जग फैलेगो इहभांति कलू शुभसंत अनादर पावहिगे ॥ १३५ ॥

भिक्षुक उवाच ॥

दोहा ।

अद्भुत आगम एहहै, कहे कपालक जोइ ॥
बिनकलेश जिह मतविषे, अभिमतसिद्धसुहोइ ॥ १३६ ॥

कपालक उवाच ॥

दोहा ।

क्या अद्भुततातैं पिखी, और पिखो अब सोइ ॥
बांछित विषय सुभोगिये, बहुर सिद्ध सभहोइ ॥ १३७ ॥

दोहा ।

अणमा महिमा आदिजे, अष्टसिद्धि प्रधान ॥
तेसभ यांमतमें लहे, बिनाखेद पहिचान ॥ १३८ ॥

वशं आकर्षण मोहणी, और परमाथनि जान ॥
 परक्षोभन उच्चाटनं, प्राकृतसिद्ध पछान ॥ १३९ ॥
 योगविघन यह यज्ञको, चहें नाहि तिहधीर ॥
 परअनपंगक आइहैं, असो मतो गंभीर ॥ १४० ॥

क्षपणक उवाच ॥

चौपाई ।

अलेंकबालि यायों मुखगायो । क्षपणक बहुरविचार सुआयो ॥
 अथवा अले अजालेभाले । अपॉलपलाकमअहेसुथाले १४१
 सवैया ।

पिख भिक्षुक ताहि हसेमुखमै, सुकपालकके प्रतिएहुउचार ॥
 मदरा बहुपानकरी तपसी, मतिभूलगई सुभये मतिवार ॥
 मुखवाकसु व्याकुल एहुभयो, मदको उनमादसु देहु निबार ॥
 सुन भिक्षुक बातकपालकतौ, मुख भीतरते सुतंबूलनिकोर १४२
 मुखसीत तंबूलकपालकजो, सुदिगंबरको निजहाथ दयो ॥
 मदको मद दूरभयो क्षणमें, धरशीश तंबूल चबाइ लयो ॥
 कर जोर गयो गुरुकेढिगते, मन भीतरसो सवधान भयो ॥
 गुरु पूरणतें पदकंजलहे, इकपूछत तोहि संदेशनयो ॥ १४३ ॥

१ वश कहिये मंत्रोषधियों कर कैही अन्यको वशकरना । २ आकर्षण कहिये मंत्रोषधि
 यों कर कैही दूसरेको अपने पास खेंचिलेना । ३ मोहन कहिये मंत्रोषधियों कर कै पुरुषको
 भ्रांतिकी उत्पत्ति करनी । ४ परमाथिन कहिये मंत्रोषधियों कर कै परकै मनको दधीकी-
 न्याई मथनकरना । अथवा सकल ज्ञानका नाशकरना । ५ प्रक्षोभन कहिये मंत्रोषधियों
 कर कै पुरुषके चित्तको विशेष क्षोभकरना । ६ उच्चाटन कहिये मंत्रोषधियों कर कै स्वस्था-
 नसे पुरुषको भ्रष्टकरना । ७ इत्यादिक प्राकृतसिद्धि कही जावैं । सो अर्थसे प्राप्त होवैं ।
 ८ अरे कापालिक । ९ अरे आचार्य । १० थाले नाम थारे मस्तकमें अथवा थारे तुमारा
 अपाल कहिये अपार पलाकम कहिये पराक्रमहै ।

जिमते मदिरा मम चीतहरे, गहिबेगसु भैरवके मतलयाए ॥
 यह सिद्धि बडी निजनैनपिखी, तिम और कहीं कछुहैनरपाए ॥
 युवती सुमनोहरपेख जबै, गुरुजो तव सेवक चीत लुभाए ॥
 बहुआनसको किनहीजगमें, इहसंक बडीगुरुदेहु मिटाए १४४

कपालक उवाच ॥

दोहा ।

पूछत कहा विशेष पुन, सकल बखानो तोहि ॥
 विद्यावल सभको हरो, ढील नलागत मोहि ॥१४५॥
 बिद्याधरी सुरंगना, सर्प यक्षनी नारि ॥
 तीनभवन मनभावती, ल्यावों भौनमझार ॥ १४६ ॥

क्षपणक उवाच ॥

चौपाई ।

मैं ज्योतिष पडियो बहुबारा । कीन गणत मम एहु निहारा ॥
 हम सभ महामोहके दासा । धर्मपंथ सभ करें बिनासा ॥१४७॥

कपालक उवाच ॥

चौपाई ।

आयुषमान यथातव जान्यो । साँच अहै नहि झूठ बखान्यो ॥
 क्षपणक कह्यो भूपको काज । करें विचार भले कछु आज ॥
 कपालक कह्यो कौनबहुकाज । क्षपणक कहें बतावहु आज ॥
 शांतिसुता श्रद्धा है जोई । भूप कही गहिल्यावो सोई १४९ ॥
 कपालक कहे सुकरो उचारि । दाँसी सुता कहा बहु नारि ॥
 विद्यावल मैं अबै दिखाऊ । ताको बेग केश गहिल्याऊ १५० ॥
 क्षपणक तब धरपटाँ सुआगे । लेकर नीपुन गणन सुलागे ॥
 शांति तबै पुन कीन बखान । करुणासखी सुनो दे कान १५१ ॥

१ शांतिहै सुता जिसकी ऐसी जो श्रद्धा वा शांतिकहिये सत्वगुणकी सुता कहिये
 कन्या ऐसी या श्रद्धाहै । २ गालीप्रदानहै । ३ सिलेट । ४ परधरकीकरम ।

यह हतआश सुकरें बिचार । मम माताको नाम उचार ॥
होइ इकागर सुनो प्यारी । करुणा कह्यो सुभली उचारी १५२

दोहा ।

ते दोनों ठाढी तहां, चीत इकागर धार ॥
कर गणती क्षपणक तबै, लागो करण उचार ॥ १५३ ॥

चौपाइ ।

नहिं जल नहिं थल नाहि पहारन । श्रद्धा नाहि सुमाहि पतारन ॥
विष्णुभक्तिके संग मिलाइ । बसी महात्मजन उर जाइ ॥ १५४ ॥
करुणा सानंद कीन उचार । भलाभया सजनी सुनीसार ॥
श्रद्धा विष्णुभक्तिके पास । वसे महात्म उर सुखरास ॥ १५५ ॥
सुनिकर शांति हर्ष उर भयो । बहुर कपालकबचन अलयो ॥
कामबिहीन धर्म पुन जोई । क्षपणक कहो कहा अब सोई ॥
क्षपणक अंकमाल विसतारी । गणतीकर पुन कीन उचारी ॥
जल थल गिर पताल सोनाहीं । अहे महात्मके उरमाहीं १५७
कपालक सुनत बिखादहि भयो । मोहमहीप कष्ट अति भयो ॥
देवी विष्णुभक्ति है जोई । सभसिद्धिनि की मूल सुसोई ॥
शांतिसुता श्रद्धा है जोई । ताहिसमीप बसी अब सोई ॥
कामविमुक्त धर्म तह जव हीं । बसे अनर्थ होइ हमतबहीं १५९ ॥
विवेकभूपके कार्य जेते । यद्यपि सिद्ध होइगे तेते ॥
तदपि महामोहको काज । करें होइ जेतो कछु आज १६० ॥
जाके लौन बहुतदिन खाए । ताहित मरे जगत जसपाए ॥
तातैं प्राण जाहिं तो जैये । स्वाभिकाज बललाय सुकैये ॥

महोभैरवी विद्या सार । अबी पठै ये होइ नबार ॥
 श्रद्धाधर्म उभै हरिख्यावे । महात्मजनहु कुपंथ चलावै १६२ ॥
 दोहा ।

महामोहअनुचर सभै, गए अखाडो त्याग ॥
 गुलाबसिंह अबशांति पुन, भाषतहै बडभाग ॥ १६३ ॥
 मम माताके हरनहित, हताशन आश सुकीन ॥
 विष्णुभक्तिको जाइ अब, कहिये सखी प्रवीन ॥ १६४ ॥
 इसकहि करुणा शांति पुन, भई सुअंतरध्यान ॥
 कीरतिवरमा देव पिख, भयो शुभाशुभ ज्ञान ॥ १६५ ॥
 दोहा ।

विष्णुभक्ति आगे सुनो, श्रद्धा रक्षा कीन ॥
 विवेकसमीप पठाइगी, होइ सकल अरि खीन ॥ १६६ ॥

इति श्रीमन्मानसिंहचरणशिक्षितगुलाबसिंहविरचिते प्रबोधचन्द्रोदयनाटके
 पाखंडविडंबनो नाम तृतीयाऽङ्कः समाप्तः ॥ ३ ॥

१ महाभैरवीविद्या कहनेकर करटउपाय तिनोने रखा । २ हताशन कहिये नव होवै
 आशा जिनोकी खो कहिये हताशन ।

इति श्रीमद्गुदास्तीनवर्य परमानंद शिष्य गुरुसाद्विरचिता प्रबोधचंद्रोदय नाटक
 तृतीयांस्कटिपणिका समाप्ता ॥ ३ ॥



ॐ श्रीगणेशाय नमः ।

अथ चतुर्थोऽङ्कप्रारंभः ॥ ४ ॥

दोहा ।

पेखत जांतज मोहको, लहे प्रबोध उदार ॥
सीतावर वरकल्पद्रुम, वसे सुचित्तमझार ॥ १ ॥
कीरति वरमा देवकी, आई सभामझार ॥
मैत्री रूप निहारके, मिटे सुनिखल विकार ॥ २ ॥

सवैया ।

दृग नीलसरोरुह शोभितहै, अलिकै कच नील कपोल सुहाई
मुखचन्द अनन्द करे उरको, नति मंद मनोजन चित्तचुराई ॥
कटिसूक्ष्म पीन नितंब कुचा, दृग लाजबडी निरखे सुखदाई ॥
कविसिंह गुलाब निहारसभा, नृपकीरतिवरमाकी विगसाई ॥

मैत्र्युवाच ॥

चौपाई ।

मुदिता मोप्रति कीन बखान । मैं सुनियो सजनी निजकान ॥
महाभैरवी धरणिगिराई । श्रद्धा विष्णुभक्ति सुबचाई ॥ ४ ॥
है उत्कंठा चीतमझारी । किहविधि पेखो सखी पियारी ॥
ऐसे मैत्री भाष्यो जवहीं । प्रवेशकीयो श्रद्धातिह तबहीं ॥ ५ ॥

श्रद्धोवाच ॥

दोहा ।

मैं उर मैं अतिडर भयो, काँपत मोहि शरीर ॥
महाभैरवी मैं पिखी, धारत ना उरधीर ॥ ६ ॥

सवैया ।

घोर महा बिकराल बडी, नरसूड कपालन कुंडल पाए ॥
 बिज्जुछटा तनकी छुति है, दृगपेखनते जनु ज्वाल बर्माए ॥
 कच पिंग सुदाडहि चन्दकला, तिनभीतर दीरघजीभ हलाए ॥
 समरंभदला तन कंपतमें, जनु नैन पिखो इमचीत डराए ७॥

दोहा ।

मैत्री मनहि विचारकर. लागी करन बखान ॥ १॥
 श्रद्धा व्याकुल अतिभई, होवत ना कछु भान ॥ ८॥

चौपाई ।

एहु पियारी सखी हमारी । संभ्रमरिदेसुभई दुःखारी ॥
 कदलीदलतन कंपत सारा । कछु मनभीतर करत विचारा ॥
 याके सनमुख मै अबआई । लखै नमोहि नशुद्ध सुकाई ॥
 याको मै अब बेग बुलाऊ । पूछो जाहि संदेह मिटाऊ ॥ १०॥

मैयुवाच ॥

दोहा ।

हेश्रद्धे प्यारी सखी, कहागयो मन तोहि ॥
 मैं तेरे आगे खडी, नाहिनिहारत मोहि ॥ ११ ॥
 श्रद्धा ताहि विलोकिपुन, लांबो लीने श्वास ॥
 सखी प्यारी मैं डरी, आउ हमारे पास ॥ १२ ॥

चौपाई ।

कालनिशा सम बदन कराला । मैं ताभीतर त्रसी बिहाला ॥
 याहि जनमबिषे पुनप्यारी । तोहिपिण्योममभागउदारी ॥ १३ ॥
 मैत्री सखीसु अंग मिलीजे । मेरे दुख दूर सभ कीजे ॥
 तब मैत्री पुन अंग मिलानी । श्रद्धा लाइगले बिगसानी ॥ १४ ॥

मैत्र्युवाच ॥

चौपाई ॥

महाघोर दरशन है जाहि । विष्णुभक्ति पुन डाट्यो ताहि ॥
 महोभैरवी विपति मलीन । कहोसखीतिनकरमसुकीन ॥ १४ ॥

श्रद्धावाच ॥

सुनसजनी मैं करों बखान । जैसे बाजपरे बलवान ॥
 एकहाथमैं कच गहिलीने । दूसरे धर्मगह्यो दुःख दीने ॥ १६ ॥
 लेकरदोनो गगन उडानी । मनो गीझ लेमांस पलानी ॥
 मैत्री सुन उरमाहि डराई । हा धृग हा धृग मुखोअलाई ॥ १७ ॥
 भई मूरछा तनमैं भारी । श्रद्धा बहुरो कीन उचारी ॥
 सखी प्यारी डरुनहि करो । तुम नीके उर धीरज धरो ॥ १८ ॥
 मैत्री तबै धीर उर धार । श्रद्धे सखी सुकरो उचार ॥
 श्रद्धा बहुरो कीन बखान । सुनो सखी नीके देकान ॥ १९ ॥
 मैं अतिआरत दीन पुकारी । विष्णुभक्ति उर दया सुधारी ॥
 टेढीदृष्टि निहान्यो जबहीं । गिरि भैरवी धरामैं तबहीं ॥ २० ॥
 वज्रपातजिम शैल गिराई । जरजरअंग गिरी तिमआई ॥
 विष्णुभक्ति उर बसे हमारे । गुलाबसिंह सेवक प्रतिपारे ॥ २१ ॥

मैथुवाच ॥

दोहा ।

भलाभया जीवत सखी, आज निवारियो तोहि ॥
मनो मृगी शरदूलमुख, छुटी बहुर कहुमोहि ॥२२॥

श्रद्धावाच ॥

चौपाई ।

देवी विष्णुभक्ति उर भारी । भई क्रोधमुख एहु उचारी ॥
महामोह दुष्टात्म जोई । हनो समूल रहे नहि सोई ॥२३॥
मोहि अविज्ञा ताहि कराई । श्रद्धा केशनते सुफराई ॥
ऐसेकहि मुहिकियो बखान । श्रद्धे बेगसु करो पियान ॥२४॥
बहुर विवेकसमीप सुजाई । काम क्रोध मोह दुखदाई ॥
तिनजीतनहित सैनमिलाई । हुइ वैरागसु तोहि सहाई ॥२५॥

दोहा ।

प्राणायाम सुसंगमिल, मैं आवों ततकाल ॥
कृपा करों तव सैनपर, करों सुजंग बिसाल ॥ २५ ॥

चौपाई ।

ऋतंभरादि प्रज्ञा हैजेती । शमदमादि सगली मिलतेती ॥
प्रबोधपूतहित देव मनाए । कब विवेक उपनिषत मिलाए ॥२७॥

दोहा ।

तातैं तूं उपनिषत संग, मिल विवेकसुत मोर ॥
मम आवसुप्रबोधसुत, होवेगो ग्रह तोर ॥ २८ ॥

१ व्याघ्रमुखसे । २ महाभैरवीसे मेरा तिरस्कार करायादि । ३ ऋतं सत्य भरति विभ-
ति सा ऋतंभरा प्रज्ञा अर्थवद- ऋतकहिये सत्य अर्थकूं जो धारणकरनेवाली वृत्ति है
ताका नाम ऋतंभरा प्रज्ञा ।

चौपाई ।

मैत्रीमें विवेक ढिगजाऊ । विष्णुभक्ति संदेश सुनाऊ ॥
बासर तू किहभांति बिताए । कौन कौन आचरन कमाए २९

मैत्र्युवाच ॥

दोहा ।

विष्णुभक्तिकी आज्ञया, चार बाहिन हमनीत ॥
विवेक काजके सिद्धहित, वसें महात्मा चीत ॥ ३० ॥

चौपाई ।

महात्मजन जगभीतर जेते । या बिध वरते सगले तेते ॥
सुखियनमें जनमें उरधरें । दुःखियनमें करुणा उरकरें ३१ ॥
पुनवंतमें मुदिता धरें । दुष्टनमाहि उपेक्षा करें ॥
योकर रागद्वेष कलषाई । मिटे निजात्मकी सुमलाई ॥ ३२ ॥

दोहा ।

मैत्री करुणा मुदित, और उपेक्षा जान ॥
चार बहिन हम जीवकी, करें सकल मलहान ॥ ३३ ॥
चली प्यारी सखी तू, महाराजके पास ॥
कहां निहारे भूपको, मोहि करो प्रकास ॥ ३४ ॥

१ तथाच सर्वमैत्री कइना मुदितोपेक्षाणां सुखदुःखपुण्यापुण्यविषयाणां भावनातः
चित्तप्रसादनम् अर्थयद्-सुखी दुःखी पुण्यात्मा पापात्मा पुरुषोविषयक यथाक्रमसे
मित्रता दया मुदिता उपेक्षा इनधर्मोंकी भावनाके अनुष्ठानसे चित्तको प्रसन्नकहिये
निर्मलकरे अर्थात् जे पुरुषसुखीहैं तिनमें मैत्रीकी भावना करे जे दुःखीहैं उनपर कृपा-
की भावना करे जे पुण्यशीलप्राणी है उनमें मुदिताकी भावनाकरे जे पापाचारहैं उन
में उपेक्षाकी भावनाकरे अर्थात् उनके सङ्गबदासीनभावसे वतें, इस प्रकार धर्मोंकी
भावनासे (चिन्तनसे) चित्तके रागद्वेषादिक मल दूरहोवै हैं इति ।

श्रद्धोवाच ॥

चौपाई ।

विष्णुभक्ति देवीहै जोई । कहीठौर सुनिये अब सोई ॥
राठा नाम देश इक गाए । महापुनीत जहां बनछाये ॥३५॥

दोहा ।

तिह उत्तरतट गंगके, चक्रतीरथ महान ॥
मनो विधाता गंगश्रुत, रचे तटकं सुजान ॥ ३६ ॥

चौपाई ।

तहां विवेक बसे बडभागी । मीमांसामै जिनकी मतिलागी ॥
किवैंकिवैं धारे निजप्राना । भये व्याकुलचीत महाना ॥३७॥
धमनी व्याप्ततां तनुभयो । उपनिषत संगहित तप निरमयो ॥
परशुरामसम धार मुटेक । करे तपस्या तहां विवेक ॥ ३८ ॥

दोहा ।

कह मैत्री अब जाहि तूं, श्रद्धे बेर नहोइ ॥
विष्णुभक्ति जो मम कह्यो, कर नियोगहै सोइ ॥३९॥
इमकहि दोनो चलीतब, श्रद्धामैत्री जान ॥
अपने अपने पंथमै, बन्दनकर भगवान ॥४०॥

चौपाई ।

श्रद्धा जायविवेक निहारा । धमनी व्याप्ततांतनुसारा ॥
तातजीत अरिमुखो अलायो । पिख विवेक पदमोललुकायो ॥४१॥
श्रद्धा कर गहि लयो उठाइ । पूछो कुशल नैन जलजाइ ॥
विष्णुभक्ति मुख कीनबखान सुनोपूत नीके दे कान ॥४२॥

कामक्रोध पुन मोह अराती । करो पूत इनको तुम घाती ॥
 सुन विवेकमुख एहु उचारी । हनो अरातिसहायतुमारी ॥ ४३ ॥
 या अवसर इक मंत्री आयो । नामसुबुद्धि रूप मन भायो ॥
 मंत्री आइ सुबन्दन कीनो । भूपविवेकसु आदर दीनो ॥ ४४ ॥
 समाचार सभ भूप सुनायो । सुन मंत्री मनमें हरषायो ॥
 देव करो तुम बेग उपाइ । जीते निखल अरातीजाइ ॥ ४५ ॥

दोहा ।

सभामाहि उरहरष अति, अए विवेकसुराय ॥
 जा पदकंज प्रतापते, निखल शोक मिटिजाइ ॥ ४६ ॥

सवैया ।

सूर्यसों तनु शोभितहै, भुजदंड मनो ब्रह्मांड दबाए ॥
 नैन सरोज मनोज हने, सुप्रताप दशोंदिशमै चमकाए ॥
 धरणीसम धैर्यहै उरमै, मुखमै धनश्रावणसों गरजाए ॥
 भूप निहारसमेतसभा, कविसिंह गुलाब बडे हरषाए ॥ ४७ ॥

राजोवाच ॥

दोहा ।

हापापी महामोह शठ, हने महांजन तोहि ॥
 मै तें प्राण निकारहों, विष्णुभक्ति कहि मोहि ॥ ४८ ॥

चौपाई ।

शांति अनंतमहिमा उजागर । चिदानंद अमृत सुखसागर ॥
 मगनभयो तामै इकबारा । बहुनरचहे न सुखसंसारा ॥ ४९ ॥

मृगतृष्णा जलहै निहसार । याबिधको सागर संसार ॥
मूरख ताहिकरे अचमान । केचित ताहि करे मुखपान ५० ॥

दोहा ।

करअवगाहनरमे तिह, अरध उरध पुनजाइ ॥

गुलाबसिंह बिनबोधजग, सदा परमदुःखपाइ ॥ ५१ ॥

चौपाई ।

अथवा यह चक्रसंसार । महामोह तिह प्रेरनहार ॥
ताको मूल अबोध विचार्यो । तत्त्वबोधकरबनेनिचार्यो ॥ ५२ ॥
ईशअराधन बीजते, उपजे तत्त्व सुबोध ॥
ताबिन और उपाइ नहिं, हम देख्यो अति सोध ॥ ५३ ॥

चौपाई ।

पुनर्वंत जे करे उपाइ । करें देवता ताहि सहाइ ॥
ऐसे तत्त्व विवेकी कहें । जनके सर्वसंदेहसुदहें ॥ ५४ ॥
विष्णुभक्तिममआयसुकीनी । श्रद्धा आनि मोहि कहिदीनी ॥
कामादिक जीतन उपाइ । करोसिताब सुवारनलाइ ॥ ५५ ॥
मैभी करो सहाय तथारी । यों हरिभक्ति सुकीन उचारी ॥
वस्तु विचार अहेजगजोई । कामजिने क्षणभीतर सोई ॥ ५६ ॥
ताते ताको बेग बुलैये । तांजीतनहित ताहि पठैये ॥
वेव्रवती अब बेगसु जाई । ल्यावोवस्तुविचारबुलाई ॥ ५७ ॥

१ श्लोक-प्रायः सुकृतिनामर्थे देवा यान्ति सहायताम् । अपन्थानं तु गच्छन्तं सो
वरोऽपि विमुञ्चति । अर्थ यह:-पुण्यात्मा पुरुषोंके अर्थ देवताभी प्रायःकर सहायताको
करतेहैं परंतु कुमार्गगमनकरतेहुए पुरुषको सोइरकहियेसाथ उत्पन्नभ्राताभीत्यागकर-
देवे है ।

प्रतिहारी तब बेगसिधाई । देव कह्यो सुकरों अबजाई ॥
वस्तुविचार संग प्रतिहारी । आई बेगसु सभामझारी ॥५८॥

वस्तुविचार उवाच ॥

छप्पथल्लुन्द ।

बिनसुंदरतनु सुंदर पापी मदन दिखाए ॥
करे बंचना जगतलोकको नरकि लिजाए ॥
अथवा सभदुःखमूल दुष्टमैल्योबिचारी ॥
महामोह जग अहे जगतमै बडो बिकारी ॥
पुन जिहबिध मोहनिलाज सठ जनउरको भ्रमनाकरे ॥
संग मदनमिल दुष्ट यह अबसोप्रकारजनमनधरे ॥५९॥

सवैया ।

यह कामनि कुंचतहै अलिका, दृगकंजपिखे जन चीत चुराए ॥
घन पीन उत्तंग पयोधरहै, मुखचन्द मनो सुबिरंचि बनाए ॥
इहभांति सराहकरे जन मूरख, जांउर तीर अनंग लगाए ॥
मलमूत्र सुहाडतुचा पुतली, युवती खलमोह सुयोंदरसाए ६० ॥
वस्तुविचार करेनर जो, तिहको युवती इमदेत दिखाई ॥
मलमांसकीचिकडसंग बिरंच, सुहाडनकी पुतली सुबनाई ॥
मुखथूक सुनाकमै सीढभरी, निसबासर नयनन गीड बहाई ॥
दुरगंधमलीन सुनारि मनो, खिरकी यमधाम बिरंचलगाई ६१

सवैया ।

रमणीरमणी नहरंचकहै, गुण औरनकै रमणी दरसाए ॥
मुक्ताहलहारसुहेमंतटकह, कुंकमचन्दनलेप लगाए ॥

१ रमणी कहिये स्त्री रमणी नहीं कहिये सुंदर नहीं । किंतु और गुणोंके आरोपसे सुंदर देखनेमें आतीहैसो गुणकीनहीं । २ करणफूल ।

बहु फूलनकी गलमाल धरे, पुन पाट दुकूल शरीर सुहाए ॥
 गति मंद हरे मन नारि नही, नरकाऽग्निचंडशिषाचमकाए ॥
 जिह भूषन नारिनके झनकार, सुनें मनहरेनको अकुलाए ॥
 बिनभाग तिसे सुविपत्ति परे, कनके हितसो पुन कानन जाए ॥
 मलिनांबर मृपधरे सिरपै, पिठरी पुनश्यामकरे लटकाए ॥
 निश आवत हेर बजारविषे, कविसिंह गुलाबनको उलुभाए ॥ ६३

दोहा ।

पापी काम चंडालतूं, जो उर करें मलान ॥
 तौ व्याकुल जन होत है, ऐसे करे बखान ॥ ६४ ॥

सवैया ।

यह कामनि मोहि चितारत है, पुन चन्दमुखी सुअनंद निहारे ॥
 दृग नीलसरोज सुपीन कुचा, सुअलिगनके हित उदम धारे ॥
 सठं कौनचहेतव कौनपिखे, युवती मलहाड सुमांसविकारे ॥
 सुपुमान अमूरति चेतनजो, तब हेरत मूढ नही तवसारे ॥ ६५ ॥

प्रतिहा-युवाच ॥

सवैया ।

इत आवहु हेबडभागसुनो, तब दोन चले पग बेग उठाए ॥
 इह राजनको अधिराजविवेक, समीप चलो तुम बेर मिटाए ॥
 तब जाइ समीप बिचार कह्यो, जय देवनदेव बडे सुखदाए ॥
 करुणाकरके इतओर पिखो, यह वस्तुविचार लगे तव पाए ॥ ६६ ॥

१ शिलारच्छ । २ स्त्री हाडमांसका विकार होनेकर जड है, तिसमें इच्छादिकसं-
 भवेनहीं तथापि स्त्रीमें जो पुमान्पुरुष अमूर्तचेतन हैं सो तेरेको देखता है । मूढ तेरेमें
 सार कुछ नहीं यह भाव है ।

सवैया ।

सुविवेक कह्यो यहठौर निवास, करो श्रम आपन दूर निवारो ॥
वस्तुविचार सुबैठगयो, पुन जोर दोऊकर कीन उचारो ॥
यह किंकरदेव समीपअयो, करुणाकरके कछु आयसुधारो ॥
सुविवेक कह्यो महामोहके संग, सुहोवतहै जगजंग हमारो ६७॥

सवैया ।

मोहबली सुपताकनमै, प्रथमै सिरदार सुकाम बनायो ॥
ता प्रतिवीर सुसैननमै, हमरे मनमै इक तू जग आयो ॥
मम धनविचारकह्यो मुखते, भट कोटिनमै प्रभु मोहि बुलायो ॥
मार करों सभखंड मनो जह, जंबुकपुंज सुखाइ अघायो ६८॥

राजोवाच ॥

दोहा ।

वस्तुविचार उदार, अति शस्त्रविद्या कौन ॥
जांकर इने मनोज रण, मोहि बतावो तौन ॥ ६९ ॥
विस्तुविचार उवाच ॥

दोहा ।

अहो पंचसर हाथमै, फूलनको धनु आहि ॥
तांजीतनहित शस्त्रकी, ग्रहण अपेक्षा नाहि ॥ ७० ॥

सवैया ।

गढ देह मनोजके द्वारजिते, दृढ रोक करों तिह व्याकुलभारी ॥
निजराखनहेत चिते अबला पुन, दूरहितेजु पिखेवहुनारी ॥
तब मैं परिणामसुदूषकहों, मलमूत भरीसु दिखावहु सारी ॥
इहभांति मनोजकरो बलखीण, सुलेवहुतां क्षणभीतरमारी ७१॥

दोहा ।

साधुसाधु भूपति कछो, बोल्यो बहुर विचार ॥

जिहबिध जीतों कामअरि, राजन सुनो प्रकार ॥७२॥

सवैया ।

पावनहै सरिता जगमै, घन कानन तीरबिषे अतिछाए ॥
कोमल सैल सिलातलहै, गिरिवास इकंत महासुख दाए ॥
जोसंमवाक व्यासकथा, सत्संगतिभाग बडे जनपाए ॥
तौंकहि नारि मलीनहरेमन, और मनोज कहा उपचाए ॥७३॥
कामको आयुध एक प्रधान, इहै अबला जगभीतर गायो ॥
ताहि जिते पुन कामसहायक, उदम होवहिगो बिफलायो ॥
भंग करों जब कामसहायक, तौ यहप्राणतजेदुखझायो ॥
कामसहायक जे जगमै, तिहनाम कहों सुसुनो मनलायो ॥७४॥
चन्द सुचन्दन धौलखिंपा, मधुपावली गुंजतफूल सुहाई ॥
बागवसंत मयूर पिको पुन, श्यामघटा घन घोर लगाई ॥
मंद सुगंध कदंब प्रभंजल, और शृंगारजु कामसहाई ॥
नारि जिती तब जितलए, सभ नाहिपिखौइनतैवलराई ॥७५॥

दोहा ।

अति बिलंब नकीजिये, सुनो जगतके राय ॥

आयुस मोको दीजिये, हनो काम रण जाय ॥७६॥

सवैया ।

सार असार विचार सिलीमुख, मैसुदशो दिशमाहि पसारे ॥
सैन मथौं अरिमंडलकी, सुवने प्रभुके अब कारज सारे ॥

कुरुसैन विमंथ्यसखाहरिके जिम सिन्धुपती रणभीतर मारे॥
कामकलंक हनोतिमही, प्रभु आयसुदेहुनलाइ सुबारे ॥७७॥

सवैया ।

परनारिमे अपवाद घनो, सिर दंडसहे यमलोक गहेगो ॥
निजनारिमिले अनुकूल कहाँ, कछुदोष सुने उरमाहि दहेगो ॥
बिनपूत महादुख चीतदहे, खलपूतभये भवधार बहेगो ॥
निपजे दुहितौ घरमाहि घनी, धननाहिमिले दुख लाजगहेगो ॥
याबिध नारिनको सुखजो, क्षणएक भजे दुःखदेवत भारी ॥
नारिन संगमते जन मूरख, घोरसंसार बहे बहु बारी ॥
धृगहै तिनको कछु पाइ विवेकजु, प्रीतिकरें पुन नारमझारी १
कविसिंह गुलाबनहीनरते जग, साचकहों बहु नारि बिगारी ७॥
सुन भूप विवेक प्रसन्नभयो, मुख भीतर यों तिन कीन उचारी ॥
पटकों कटिभीतर खैच कसो, सभ आयुध बीर सुलेंहु सभारी ॥
अब शत्रु सुजीतनहेतु चढो, सुकरे शिव आप सहाय तथारी ॥
वस्तुविचार कह्यो जिम आयसु दुंदभवाइचढे बलधारी ॥८०॥
तब भूपति फेर विचारकह्यो, सुन वेत्रवती सुभले मनलाए ॥
अब क्रोधके जीतनहेतु सुपावन, एक क्षमा तुम लेहु बुलाए ॥
प्रतिहारनि फेरकह्यो बिनबेर, करो प्रभुजो मुखमाहि अलाए ॥
वहुजाइ सिताब अई क्षणमै, सुक्षमा पुन आपन साथलवाए ॥८१॥

सवैया ।

अतिसुंदर चीतगंभीर बडी, दृगलाजभरे घर ओर निहारे ॥
इहभांतिलसे मुखमंडसतां, नभकातक चन्दकला सभधारे ॥

अतिपावन दीरघ हेर कवि जन, सिंच सुधा उरताप निवार ॥
इहभांतिक्षमासभलोकपिखी, अबआपक्षमा मुखमाहिउचारे ८२

क्षमोवाच ॥

कवित्त ।

क्रोध अंधकारके विकार उर भये अति,
भुकुटी चढाइखल फीके मुख बोलई ॥
नैनकरे लाल सुबिसाल होठ डसे अति,
जरे अंगअंग सुभुजंग बिषघोलई ॥
धीरजे गंभीरनीर सागरसमान अति,
भजे न विकार नहि रंच उर डोलई ॥
क्षमावंत संत भगवंतके महंत जन,
बोले मधुबैन जन अमी झकझोलई ॥ ८३ ॥
खेद नजवानको न शीसको महानदुःख,
चित्तको न ताप नहि देह दुःख पाइहै ॥
हिंसादिदोष बिन क्रोधको निकोट हनो,
क्षमा मेरो नाम जग मेरो जस गाइहै ॥
ऐसैतु अलाइ पुन दोनही समीपजाइ,
कहे प्रतिहारी क्षमा और समुझाइहै,
यही देवदेव सुबिवेक भूप भारी अति,
चलिये समीप सखी पेखि हरषाइहै ॥ ८४ ॥

दोहा ।

क्षमा समीप सुजाइ, पुन जयजय देव उचार ॥
यह दासी आई क्षमा, बन्दों पाद तिहार ॥ ८५ ॥

सवैया ।

सुक्षमा इहठौर निवासकरो पुन, बैठ क्षमा यहबात प्रकासी
प्रभु आयुसु देहु बिलंब कहा, जिहहेतु बुलाइलई यह दासी॥
सुक्षमे यह संगरमाहि दुरात्म, क्रोध बडो सुभपंथ विनासी ॥
भट औरनको मुखजोरत है, सुक्षमे अबताहि करोतुमनासी ॥

दोहा ।

देव अनुग्रह पाइ तव, महा मोह रणनास ॥
मैसुकरो क्षण एकमै, कहा क्रोध तिह दास ॥ ८७ ॥

सवैया ।

इह वेदन पाठ सुयज्ञतपो पुन, और जिते नर पुंन सवारै ॥
बिन कारण वैरकरे दुष्टात्म, क्रोध सभो शुभपंथ निवारै ॥
सम लोह सुदेह तपावतहै पुन, नैननते जन आगि निकारै ॥
तिह क्रोधको मैइहभांतिहनो, दुरगा माहिषासुरज्योरणमारै ॥

दोहा ।

बहुर विवेक बखानियो, क्षमे सुने हम कान ॥
जांउपाय क्रोधहि जने, बहु मम प्रगट बखान ॥ ८९ ॥

सवैया ।

सुक्षमा कहि देव सुनो मनमै, नर क्रोधकरेतब मौन गहीजे ॥
वहि गारिबके मुखभीतरजो, पुन तांप्रति कोमलवाकभनीजे ॥
जुधिकारकरे परेतिहपांइ आपद, पेख महा करुणा उरकीजे ॥
तनताडनमै हरषै उरमै, कृतपूर्वपाप सुमेअब खीजै ॥ ९० ॥

इहभांति विचाकरे निसबासर, ताहि सुक्रोध नहीं उपजाए ॥
 तब भूप शबासकही सुखते, सुक्षमे तव भाख्यो साच उपाए ॥
 सुन देव जिते जब क्रोध बली, तव हिंसन पारुष मान बसाए ॥
 सभ जीतलए नहिं फेरलरें, इनकी भुज ना बल देत दिखाए ११ ॥

दोहा ।

कह्यो विवेक प्यानकर, रणमै शत्रु संहार ॥
 सात्विक संपति देवियां, करें सहाय तथार ॥ ९२ ॥
 क्षमा सुआयसु सीसधर, गई सुशंखबजाइ ॥
 राजा प्रतिहारी कह्यो, लेहु संतोष बुलाइ ॥ ९३ ॥
 महामोहभट लोभजो, ताको मारेसोइ ॥
 तांबिन प्रतिहारी सुनो, और उपाव न कोइ ॥ ९४ ॥
 जो आयसु सोई करों, प्रतिहारी इम जाइ ॥
 ले संतोषको संग पुन, कीन प्रवेश सुआइ ॥ ९५ ॥
 चित्त चितार सन्तोष पुन, दयारसीले नैन ॥
 गुलाबसिंह बहुबोलियो, सुनो ताहिके बैन ॥ ९६ ॥

सन्तोष उवाच ॥

सवैया ।

फल काननमांहि अनेक मिलें, विनखेद सदा तरुहै सुखदाई ॥
 पुन नीर जहांतहं पूर रह्यौ, अतिशीतल पुन नदी मधुराई ॥
 मृदुसुंदर पल्लवसेज बने, बिजनाबन आप समीर झुलाई ॥
 जन हा धनवंतनद्वारनमै, कृपण पुन खेद सहै बहु जाई ॥ ९७ ॥

जन मूरख ना मम चीतधरें, अतिमोहभये सठ देह तपाए ॥
 बहुवार अरंभ भये भगना, जग फेर करे पशु नाहिं लजाए ॥
 जिमकालरनीरभ्रमे हरणा, इततै उत मूरख त्यों जगधाए ॥
 विन मोहिप्रसादन आशमिटे, हतबज्रसमान घनो बिललाए ९८

कवित्त ।

लोभ अंधकार दृग याबिध बिकारभजे,
 पांड धन और कछु एतो अब पायोहै ॥
 एतो थापराषों एतो व्याजमै चलाऊं आगे,
 मे पिता पितामेपुन याबिध बढायोहै ॥
 ऐसै धनध्यानकरे कालकी नसारपरे,
 आश सुपिसाची पुन याबिध ग्रसायो है ॥
 बिन सन्तोष जग लहे घनो दोष पुन,
 गहे काल मूड जाने लोक सुख पायो है ॥ ९९ ॥

सवैया ।

धन एक उपाएकरै नलहें, पुन एक बडे सुउपाइ मिलाए ॥
 जु मिलाइ धरे धनभौन विषे, बिनभाग सुभोगविना बिनसाए ॥
 तुल्य वियोग उंमै धनको घर, आइगयो बहु चित्त तपाए ॥
 याजगमाहि सन्तोष बिना, कवि सिंहगुलाबनको तृताए १०० ॥
 केश सुधौल भये शिरके, सुजरा जगसापिन डंक लगाए ॥
 तदपिमूढ चहे धनको, सुख हेतु कवी नहि रामको ध्याए ॥

बोधसुनीर अबोधजनी रज, लोभ भले जगमाहि मिटाए॥
सन्तोष रसामृत सिंधुविषे पुन, देडुबकी सुई पूरणपाए १०१ ॥

प्रतिहा-युवाच ॥

दोहा ।

एहु स्वामी भूपहै, चलो सुयाके पास ॥
जाय सन्तोष समीप पुन, जयजय कीन प्रकास १०२ ॥
इहु सन्तोष प्रणाम प्रभु, करे सुचरण तिहार ॥
भूपति कह्यो समीप इह, बैठो आउ हमार ॥ १०३ ॥

कविरुवाच ॥

बरनो रूपसन्तोषको, बैठोसभामझार ॥
सीतावर वर मैं चहों, बसो सुचित्तमझार ॥ १०४ ॥

सवैया ।

चित गंभिर मनोनिधि नीर, शरीर महाद्युति सोहतहै ॥
दृग सिंच सुधारस शांतिकरे, इहभांति चहूंदिश जोहतहै ॥
निज दौरदलै अरिमंडलको, भवमंडलमैं यश सोहतहै ॥
कविसिंहगुलाब पिखे इहभांति, मनो सभके मन मोहतहै १०५ ॥

दोहा ।

बहुर सन्तोष बखान्यो, आज्ञा देहु सुमोहि ॥
भूपति कह्यो प्रसंग सभ, नाहि सुछानोतोहि ॥ १०६ ॥
बेगबनारस जाहुअब, लोभहनो बलधार ॥
कह्यो सन्तोष सुकरोअब, जो प्रभुकरो उचार ॥ १०७ ॥

सवैया ।

मानव, देव सुदैतसभै, जिह जीतलए जगभीतर सारे ॥
तापसमंडल विप्र हने, बहुभांतिनके पद संगल डारे ॥
तां खललोभको मैं इहभांति, हनो पुन संगर भूमिमझारे ॥
दाशरथीरघुवीरबलीजिह, भांतिसुरावणराक्षसमारे ॥ १०८ ॥

चौपाई ।

ऐस बखान सन्तोष सुगयो । और एक नर आवत भयो ॥
देव विजयहित मंगलजेते । सभमिलाइ लियाए तेते ॥ १०९ ॥

दोहा ।

तरुण ज्योतिषि आइ कर, कहे महरत सार ॥
प्रस्थान भले अब कीजिये, विजयमहरत धार ॥ ११० ॥
भूपति पुरुष बखान्यो, सैनापती बुलाइ ॥
कहु प्रस्थान अब कीजिये, शिवसुतपादमनाइ १११ ॥
कहो सारथी जाइ अब, संग्रामक रथ आन ॥
कृतमंगल रथ बैठकर, बेग सुकरें पयान ॥ ११२ ॥

सवैया ।

भूपकि आयसु जाइकही, सरदारनसों नहबेर लगाई ॥
सूत स्यंदन बेगअने रथ, भूपचढे सुगणेश मनाई ॥
ताहिसमै सरदार सभैचढ, वाहनसैन अशेष चलाई ॥
धुनिदुंदभकीजरजल्लभयो, सुप्रलेघनजानगरजेनभआई ११३ ॥
मत्तगयंदन कोर सजी, भ्रमरावलीगंडनमाहि सुहाई ॥
जान सपक्ष चले गिरिपुंज, सुबेग बडो अवनी गजछाई ॥

कांचनके झुलवार लसें, गजश्याम भली उपमा मनआई ॥
 दामनिपुंज सुसंगमनो, निस भादवकी घटहैं उमडाई ११४ ॥
 श्वेतवह्मथ सुऊच बडे, घनसारदसें रथपुंज सुहाए ॥
 वेग प्रभंजन जीत तजे, इहभांति तुरंगम स्यन्दन लाए ॥
 ते रणरंगमही अति धावत, ता उपमा कवि कौन बताए ॥
 धावनमै मन एक बली, कविसिंहगुलाब सुहैर लजाए ११५ ॥

सवैया ।

पैदल्लेके बहु पुंज चले, रणमै सभके उमगे मनहै ॥
 फेटैनमै यमदाड कसी, सणखोलसंजोह सजे तनहै ॥
 कुंत सुदीरघहै करमै सुगुलाब कछू उपमा भनहै ॥
 जान दिगंतैर भूरखिरे, यह नीलसरोजनके बनहैं ॥११६॥
 कोटन कोटि सुबीर बली पुन, मांहि तुरंग अरूढ भयेहैं ॥
 मानहु भूमिनपाइ छुहे, नभमैं हरिबाहन कोटिधएहै ॥
 थर थल्लभयो दिगमंडलमैं, कर बीजुछटा करवार लएहै ॥
 यों चतुरंगन सैन चली, सभके तनमै अति रूप नएहै ११७ ॥
 मध्यविराजत भूपतिको रथ, मानहु मेरुइसो चमकाए ॥
 वाजि खुदागर चुंबत भूमि, सुले रथमाहि अकाश उडाए ॥
 योंधुनि होवतहै रथकी जनु, खीरनिधी हरि फेर मथाए ॥
 धूरिकीपुंज अकाशचढे, पथऊर्ध्वहै रवि मंडलछाए ॥११८॥

१ झूल । २ उच्छाड । ३ शरदऋतुके वादलसें । ४ प्यादोंकि । ५ कटिवस्त्रमें कटारी कसीहै । ६ टोपसहित कवच । ७ नेजा । ८ दिशायोंके अंतर ।

सूत उवाच ॥

कवित्त ।

राजनके राई सुनजीकआई एहु पिखो,
 शिवकी बनारस सुदेत यों दिखाई है ॥
 नीरयंत्रधार सुफुहारे जहँ अपार छुटे,
 पावनी बनारसकी भूमि सुसुहाई है ॥
 सौधेनके शीश जन रचे जगदीश तह,
 कांचन बनाइ लिपलेप चमकाई है ॥
 जाहिकी अपार छबि हेर छबि छीनभई,
 कहि सुगुलाबचन्द किरणन लजाई है ॥ ११९ ॥

सवैया ।

धौल पिखो ग्रह ऊच बने, जनुसारदमेंघन पुंज सुहाए ॥
 बीच पताक सुऊच लसे, मुमनो तडतागनकै चमकाए ॥
 है मुकैलाकृत वारजपुंज, सुगुंजततां मधुपावलि आए ॥
 गंधकरे उदगार मुखो, मकरंदभयो झडसूर छपाए ॥ १२० ॥
 फूल खिरे सुचुफेर पिखो, यह पावन भूमिसमीप सुहाई ॥
 एहु पिखो घन छायेमही, तरुपुंज किधो घटहैं उमडाई ॥
 मारुत जाइ सुठौरविषे, जन पूजत शंभुप्रेम बढाई ॥
 गाँवत फूल चढावतहै सुनिवावत बन्दत शीश निवाई ॥ १२१ ॥

१ मन्दिरोंके शिखर । २ सुफेद । ३ मुक्तामणिके किये । ४ वायुके संबन्धकर जो वृक्षोंका शब्द है तिसशब्दकर वायु मानो गावत कहिये शिवका जाप करे है और अपने आपसे जो वृक्षोंसे फूल गिरतेहैं सोई मानो शिवजीकोवायु फूल चढावताहै और निवावत कहिये वृक्षोंको अपने बलसे वायु भूमिमें स्पर्श करावेहै तिस बहानेकरमानो शिवजीको वायु बन्दना करेहै ।

आरुद्रगंगको नीर करे पुन, फूलपराग सुगंध चढाए ॥
 गुंजत बीच सुभ्रंग फिरें, मिसताहि मनो शिवैगीत सुनाए ॥
 तरुलंबलता अति नाचतहैं; सुमनोभुजदंडनभाव दिखाए ॥
 सारस हंस चकोर धुनी मिस, वायुमनो शिवपाठ सुनाए १२२ ॥
 दोहा ।

पिख अनंद भूपति भयो, लागो करन उचार ॥
 यह शिवनगरी पावनी, मुक्तिकरे संसार ॥ १२३ ॥
 सवैया ।

तम हौरद दूरकरे क्षणमै, पुन आनंद आत्ममै उपजाए ॥
 विधुमोलपुरी मन अँचतहै, सुमनो पद मोक्षहि ज्ञान लजाए ॥
 जिह ठौरबिषे यह गंगभले, अति वक्रभई इहभांति सुहाए ॥
 जन हासकरे यह चन्दकला सुकिधोंधर मोतिनहार सुपाए १२४ ॥
 सोरठ ।

रथते उतर सुसूत, दई प्रकरमाभूपकी ॥
 पिख बिबेकपुरुहूत, दीरघ आयुबिसालमति ॥ १२५ ॥
 सवैया ।

गंगक तीर सुधीर महामति, मंदरऊच सुमेर सुहाए ॥
 आदिनारायण केशवको, यह पावन थान महात्म गाए ॥
 भूप निहार अनंदभयो, सुखभीतरते यह वाक अलाए ॥
 क्षेत्रकुंआत्म एहुसुनो, सुपुराविद पंडित मोहि बताए ॥ १२६ ॥

१ गंगाकेनीरसेस्नानकरके । २ तालस्वरतानादि । ३ स्तोत्रपाठ अन्य सुगम है ।
 ४ हृदयगततम । ५ काशी मानो मोक्षका पद कहिये कारण है । ६ क्षेत्रमेंहिमाके जानने-
 वाले व्यासादिकोंमें पूर्व हमको क्षेत्राभिमानिदेवता केशव भगवान् कहाहै ।

दोहा ।

याहिठौरतज देहकौ, मिले परात्म जाइ ॥
पुनवंतजन लोकमें, लहै मरण इह आइ ॥ १२७ ॥

सूत उवाच ॥

दोहा ।

कामक्रोध पुन लोभलौ, भूपति हमे निहार ॥
दखो दूर पलातहैं, ज्योंकातर असिधार ॥ १२८ ॥
भूपति कह्यो प्रसाद हरि, सर्वसिद्धि जगहोइ ॥
कर प्रवेश भगवानके, मैं बन्दो पद दोइ ॥ १२९ ॥
रथते उतर प्रवेशकर, भूपति भले निहार ॥
भगवन भक्त कलेशहर, जयजय सदा तिहार ॥ १३० ॥

विवेक उवाच ॥

भुजंग प्रयात छन्द ।

सुरंचक्रचूडामणीदीपजागे ॥
करे आरती पादकंज सभागे ॥
नखं जोतिशोभा लसे हेम पीठे ॥
मनो कोटिखद्योत चाँदे सुदीठे ॥ १३१ ॥
भैंवं द्वैत संभ्रांतिसंतानिताए ॥
तुमे द्वैत मेटो करो बोधछाए ॥
क्षमामंडलों धार संभार पीने ॥
लगी दाड कोटी गिरी चूरकीने ॥ १३२ ॥

१ काशीक्षेत्रमें । २ सुरमण्डल । ३ कोटिखद्योतहीस्ववर्णविंदुकी न्याईदेखीतेहैं ।
४ संसारभेद भ्रांतिकी परंपराकर जो संतप्त है भक्तजन ।

वलीयागमाही करे रूप भारी ॥
 पदोंसाथ मापी त्रिलोकी सुसारी ॥
 भुजादंडआगे गिरं छत्रलीने ॥
 बलारातिको मानकीनो सुखीने ॥ १३३ ॥
 त्रसतगोकुलं त्राणकारी दयाले ॥
 टरीअंबवरषा करे गोपपाले ॥
 सुरारातिभामासुसुधूर शीशं ॥
 सुसंध्याभ्रकांतं हसे देवईशं ॥ १३४ ॥
 तिने दूरकारी मनो मारतंडं ॥
 कहे कोविदा ईशतेदौरदंडं ॥
 सुदैत्येंद्रवख्यातटी पाटनारी ॥
 नखंश्रेणकानाथतेरी उचारी ॥ १३५ ॥
 त्रिलोकीरिपूकैटंभो कंठकाठं ॥
 कटे चक्रधाराकरेभूमिमाँठ ॥
 फुरेज्योतिरूलका भुजादामतेजं ॥
 करेखीरशैनं सजे शेषसेजं ॥ १३६ ॥
 सदा शंभुप्यारे महातेजधारी ॥
 भुजादंडसंभ्रांतिशैलं मुरारी ॥
 मथे खीरसिंधुं भ्रमे बाहुपीने ॥
 भयेलाँछनं ताहिवीचनवीने ॥ १३७ ॥

१ इंद्र । २ हिरण्यकशिपु । ३ कैटभदैत्यका स्थूल कंठ । ४ भूमिको एक रस किया ।
 ५ प्रज्वलतज्योति । ६ भुजारूप दण्डेकर भ्रमताजो है मन्दराचल । ७ चिह्न ।

सुमोतीफलोदारहारं सुहाए ॥
 प्रभा कंठमध्ये सके को बताए ॥
 महामोहछेदी दिजे बोधनाथं ॥
 नमो देवपादं दोऊजोर हाथं ॥ १३८ ॥

दोहा ।

आदिनारायण दीनवर, भये प्रसन्न उदार ॥
 बोधवली सुत होइगो, भूपति भौन तिहार ॥ १३९ ॥
 मंदरनिकस विवेक पुन, पिख इम कीन प्रकास ॥
 यह नीको स्थान है, ईहा करेंनिवास ॥ १४० ॥

कविरुवाच ॥

दोहा ।

सभासमेत सुएहु जब, पेखी भूपति रीत ॥
 कीरतिवरमा देव तब, भयो इकागर चीत ॥ १४१ ॥
 उपजेगो वैराग मन, आइ सरस्वति दयाल ॥
 बोधकरे मनको भले, ह्वैहै कथा विशाल ॥ १४२ ॥

इति श्रीमन्मानसिंह चरण शिक्षित गुलाबसिंह विरचिते प्रबोधचंद्रोदय नाटके
 चतुर्थोऽङ्कः समाप्तः ॥

इति श्रीमदुदासीनवर्य परमानंद शिष्य गुरुप्रसादविरचिता प्रबोधचंद्रोदय नाटक
 चतुर्थोऽङ्कटिप्पणिका समाप्ता ॥ ४ ॥

ॐ श्रीगणेशाय नमः ॥

अथ पञ्चमोऽङ्कप्रारंभः ॥ ५ ॥

दोहा ।

पदप्रसाद रघुनाथके, लहे बोध मतिमान् ॥
हने मोहबलवानको, तिह बन्दो भगवान् ॥ १ ॥
कीरतिवरमाभूपके, देखत सभामझार ॥
श्रद्धा कीन प्रवेश तब, लागी करन उचार ॥ २ ॥

श्रद्धोवाच ॥

सवैया ।

प्रसिद्ध सुपंथ अहे जगमें, यह जातिकुबैर बडो दुखदाई ॥
क्रोध दवानलते जुबढी, क्षणमें सगली कुलजाहि खपाई ॥
ज्यों बनबांससंघरसनते, पुन पावक कानन खेहरलाई ॥
तिमहींग्रह बाधवक्रोधजले, दुखमूर भयोदृगतेजलजाई ॥ ३ ॥
दुःखदेखनअंकलिखेबिधिभाल, सुआजपिखेनहिजातमिटाए ॥
मम सोदरबन्धु हते रणमें, तन भूमिरुले किहठौर सिधाए ॥
दुरवारण दारुण शोक महां, अतिपावकमें उर भूर जलाए ॥
सुविवेककी मेह अनेक परे, क्षणपावकशोकनलाटबुझाए ॥ ४ ॥
सागर शैल मही सरिता, सभअंतकअंतसमे सुखपाए ॥
तौ त्रिणजीरणसें तनुमें, जन कोविदको भवमै पत्याए ॥

यद्यपि यों सुबिचारकरों, पुन तदपि शोक विवेक दबाए ॥
 दीरघ शोककी ज्वाल बढे, बिधहा उर अंतर मोहि जलाए ॥
 यद्यपि कूरस्वभावहुते, मम भ्रात चले कुपंथनमाही ॥
 काम सुक्रोध तथा मदमान मुए सगले रणमंडल माही ॥
 तदपि दुःख कटे उरको, अरु देह सुकावत मैं जगमाही ॥
 शोकदवानलज्वाल लगी मम अंतरआत्मकाननमाही ॥ ६ ॥

चौपाई ।

करकै मनकेमाहि विचार । श्रद्धा बहुरों कीन उचार ॥
 विष्णुभक्ति उर परमदयाल । एसो मोप्रति कह्यो बिसाल ॥ ७ ॥

विष्णुभक्तिरुवाच ॥

शंकरछन्द ।

इहठौर संगर होइगो भट करेंगे कुलनास ॥
 मैहेरसाकों पापनहि मनमोहि भयो उदास ॥
 अब छोडिके बनारसी मैं सालग्रामसु जांउ ॥
 भगवानके स्थान बसकर काल ताहि बितांउ ॥ ८ ॥

दोहा ।

श्रद्धे युध वृतांत सभ, करीनिवेदन आइ ॥
 सो मैं सगलो ताहिढिग, करों निवेदन जाइ ॥ ९ ॥

भुजंगप्रयातछन्द ।

तहांबेगश्रद्धासुनीकेसिधार्ई ॥
 पिखेतीरथं गंडकापावनाई ॥
 जहां आप देवो सदा वास धारे ॥
 सुसंसारसिधुं जनं पारतारे ॥ १० ॥

करी वन्दना ठौरनीके निहारी ॥
 इही विष्णुभक्ति जन मोक्षकारी ॥
 मिली शांतिसंग कछू सोबिचारे ॥
 चलों यासमीप कहों सर्वसारे ॥ ११ ॥

दोहा ।

विष्णुभक्ति अरु शांति पुन, बरीसभामहि आइ ॥
 विष्णुभक्तिको कहेगी, शांतिसुकछू सुनाइ ॥ १२ ॥
 शांतिरुवाच ॥

दोहा ।

देवी तोकों मै पिखों, चिंताकुल उरमाहि ॥
 विष्णुभक्ति मोको कहो, कौनहेतु मनमाहि ॥ १३ ॥
 विष्णुभक्तिरुवाच ॥

सवैया ।

वत्से सुबनारसमाहि महारण होवत मोहविवेकहिकेरो ॥
 जिहठौर सुबीर अनेकमरे सुमनो यमराजकरे सुनिबेरो ॥
 तहि मोहबलीसहि बालविवेक भिरे रणमैं बहुभांति घनेरो ॥
 नहि जानत तांगति कौनभई इहकारणते उर कंपत मेरो ॥ १४ ॥

दोहा ।

कह्यो शांतिकहचितहै, तोहिकृपा जबहोइ ॥
 तब विवेक जीते सही, मै जानो यहलोइ ॥ १५ ॥

१ वृत्तान्त । २ इन्द्रियनिग्रहका नाम शांति है । ३ जडाऽनुताहंकारादिकोंसे रहित सत्यज्ञानानन्दाऽकारप्रत्यक्चेतनकूं विषयकरनेवाली जाअन्तः करणकी वृत्ति है ताकानाम विष्णुभक्ति है ।

दोहा ।

यद्यपि वत्से ऐंवहै, संतनको कल्यान ॥
 जांपतहै अनुमानते, तदपि संक महान ॥ १६ ॥
 अबलौ श्रद्धा नहिअई, समाचारले पाहि ॥
 यांते पुत्री मनविषे, बडो संदेह सुआहि ॥ १७ ॥
 ताहिसमे श्रद्धा अई, लागी करन उचार ॥
 विष्णुभक्ति मोकोमिलो, पुत्री भुजापसार ॥ १८ ॥
 विष्णुभक्ति श्रद्धा कह्यो, सुखसों आई माइ ॥
 श्रद्धा कह्यो प्रसाद तव, कह कलेश जनपाइ ॥ १९ ॥
 कह्यो शांति कर जोरकै, अंब नमो पद थार ॥
 श्रद्धा कह्यो सुजलमिलो, पुत्री भुजापसार ॥ २० ॥
 शांति मिली गलमैं तबै, भयो अनंदनृतांत ॥
 विष्णुभक्ति बोली तबै, श्रद्धे कहहु वृतांत ॥ २१ ॥
 देवीतेंप्रतिकूलको, जोकछु लायकहोइ ॥
 सोवृतांत उहां भयो, और नजानो कोइ ॥ २२ ॥
 विष्णुभक्ति पुन तिहकह्यो, मोकोकहि बिसतार ॥
 गुलाबसिंह श्रद्धा तहा, लागी करन उचार ॥ २३ ॥

श्रद्धोवाच ।

सवैया ।

भागवती सुनतूजबही, तह केशवमंदरते निकसाई ॥
 प्रातभयो फुन ताहिसमै, रश्मीरविकोमलजोनिसराई ॥
 दुंदुभ भेरि निशानबजे, सुप्रलयघनकी धुनि जाहि लजाई ॥
 बीरसुसिंहसमानगजे, वर तीमुखकातरकेपियराई ॥ २४ ॥

खुरवाजिन औररथनेमिदली, धरचूरणधूरअकाशउडाई ॥
 धर जान बिरंचिसुलोकचली, नहिं जान परे रविलीनछपाई ॥
 गज कुंभसंधूर सुभूर सजे, तिनकी इहभांति सुकोरबनाई ॥
 जनसांझसमैदिगपश्चमते, यहलालघटाउमडी अधिकाई २५ ॥

कवित्त ।

अपनी पराई मिल आई सैन दोऊजब,
 गजैबीर ऐसे जन प्रलयघन आएहैं ॥
 भेदके सुबेलमानो लोकनके सुखेदहित ॥
 पश्चमसु पूर्वके सिंधु उछलाएहैं ॥
 राजनकेराय सुविवेक यों ठराइ मन,
 दरसननैयायिकको दूतकै पठाएहैं ॥
 जैसे रामचन्दसुतवालिके पठाए तिन, ॥
 जाइ महामोहको सुवाक योंसुनाए हैं ॥ २६ ॥

सवैया ।

तजके हरिमंदिरसंतरिदे, सरितातट पावनकानन सारे ॥
 तुम जाइ मलेच्छनमाहि बसो, इहभांति सुरायविवेक उचारे ॥
 नहि जो पुन धार कृपाणहते, समअंग गिरें धरमाहितुमारे ॥
 तब जंबुक श्रोणत पानकरें, पल गीझ चरेंरणभूमिमझारे २७ ॥

विष्णुभाक्तिरुवाच ॥

दोहा ।

मात प्यारी शशिसुखी, मृगनैनी बलिहार ॥
 तिहिते बहुरो क्याभयो, मोको करो उचार ॥ २८ ॥

श्रद्धोवाच ॥

सवैया ।

पुन मोहमहीप सुन्यो जबही, बिकुटीभुकुटीखलताहि चढाई ॥
 अति क्रूर सुक्रोधमहानभयो, दृग लालकरे इहबात अलाई ॥
 सुविवेककरे दुष्टात्मताफल, याहिपिखे इमदूत सुनाई ॥
 रणहेत पखंडको आगमजो, खल मोह बली तब दीन पठाई २९

छप्पय छन्द ।

याअवसर पुन आपनी सैन अगारी आई ॥
 श्रीसरस्वतीपद्महाथशशिकांतसुहाई ॥
 वेद वेदांग पुराण धर्म पुन शास्त्र सुजेते ॥
 भारतलौ इतिहास संगमिल आए तेते ॥
 पिखतां प्रताप अरिसैन बल गयो निखल सकुचाइ अति ॥
 सुन ज्यों अतिपावन धारपिख दिव्यधुनी जग पाप गति ॥ ३० ॥

विष्णुभक्तिरुवाच ॥

दोहा ।

मात प्यारी शशिमुखी, मृगनैनी बलिहार ॥
 तिसते बहुरों क्याभयो, मोको करो उचार ॥ ३१ ॥

श्रद्धावाच ॥

तब देवी आगमजिते, वैष्णवसूर्यआदि ॥
 गये सरस्वतीपास सभ, पूर्व शेषधुनि नाद ॥ ३२ ॥

१ ऋग. साम, यजु. अथर्वण, ये चारवेद । आयुर्वेद, धनुर्वेद, गान्धर्ववेद, अथर्ववेद, ये चार उपवेद । शिक्षा, कल्प, व्याकरण, निरुक्त, छन्द, ज्योतिष, ये षट् वेदके अंग हैं । नारदपञ्चरात्र, रुद्रयामलादिक, ये आगम हैं । मत्स्यमार्कण्डेयादि अष्टादश पुराण हैं । मन्वादि अष्टादश स्मृति ये धर्मशास्त्र हैं ।

विष्णुभाक्तिरुवाच ॥

मात प्यारी शशिमुखी, मृगनैनी बलिहारी ॥
तिसते बहुरो क्याभयो, मोको करो उचार ॥ ३३ ॥

श्रद्धावाच

कवित्त ।

सांख्य औ न्याय सुकणादकृत भाष्य पुन,
आगम अनेक सुमीमांसा संगलियाईहै ॥
युक्ति अपारमानो भुजाही हजारफुरै,
दिशाको मिटाइतम जंगहुलसाईहै ॥
धर्मेन्दुआनन सुबेदत्रयी संग मनो,
तीननैनहूं सों कात्यायनी सुहाईहै ॥
सरस्वतीके आगे प्रगटानी सुसहायइत,
बिजुरी अनेकजनु आई चमकाईहै ॥ ३४ ॥

शांतिरुवाच ॥

दोहा ।

स्वभावविरोधी आगम, तरक तथा पुन जान ॥
मिले कथं रणहेतु सभ, माता करो बखान ॥ ३५ ॥

श्रद्धावाच ॥

सर्मानवंशते जेभये, लरे परस्पर सोइ ॥
जो परसों पुन रणपरे, संगति ताकी होइ ॥ ३६ ॥
तिमहम वेदप्रसूत सभ, कछु विरोध निजमाहिं ॥
वेदसुरक्षणहेतु पुन, सभ इकत्र होइजाहिं ॥ ३७ ॥

१ ये सारे मीमांसाके विशेषण हैं । २ धर्म वेदार्थसोई भया इन्दु चन्द्रमा तद्वत् हं
मुख जिसका । ३ तीनवेद हैं नेत्रजिसके । ४ यथा कुरुण्डव ।

नास्तिकपक्ष निषेध हित, संगतभई हमार ॥
 आगममाहि विरोधनहि, कीनो तत्त्वविचार ॥ ३८ ॥
 शांतिअनंत सुज्योतिजो, अद्वैअजबल एक ॥
 मायाके बहु सगमिल, भासे रूप अनेक ॥ ३९ ॥
 नानाअगमपंथ बहु, एक जनावत ईश ॥
 ज्यों वहुनदीप्रवाह जल, मिले जाइ वारीश ॥ ४० ॥

विष्णुभक्तिरुवाच ॥

मात प्यारी शशिमुखी, मृगनैनी बलिहार ॥
 तिसते बहुरोक्याभयो, मोको करो उचार ॥ ४१ ॥

श्रद्धावाच ॥

सवैया ।

तब युध आरंभ भयो दुहंने, रण आपसमै करि कुंभमिलाए ॥
 सुतुरंगमसंग तुरंग जुरे, रथसंग रथी सुप्रहार लगाए ॥
 सरपुंज पदाति चलाइ इसे, जनतोयद रोषभरे बरषाए ॥
 अतियुध भयानक भूर भयो, डर कातरबीर महाहरषाए ॥ ४२ ॥
 तह श्रोणतकीसुभई तटनी, बहुभूत पिसाच सुकंक सुहाए ॥
 सरदार तुरंग मतंग बडे, जगदीश मनो तनसैल बनाए ॥
 सिर छत्र सुहंस समान फिरे, सितपागसुफेनमनो चमकाए ॥
 अतिबीर बली तह नक्रभये, पिखकातरतां उरमै दहलाए ॥ ४३ ॥

चौपाई ।

याबिध दारुण भयो संग्राम । पखंडागम इम कीन सुकाम ॥
 लोकायतको तंत्र सुजोई । कीनो सैन अगारी सोई ॥ ४४ ॥
 परस्परं दोनोदल जुटे । मुए लोकायत प्राण सुछुटे ॥
 बहुर पखंडागमहै जोई । भये निर्मूल सगल तिहसोई ॥ ४५ ॥

सोमसिद्धांत कपालक जोई । सत्य आगम पिख भाग्योसोई ॥
 सत्यआगम इहुआइ बखानी । सुनो ताहिकी साचीबानी ४६
 मदभव भेषज करें बखान । ते मतिमंद सुमहा अजान
 मनु स्मृतीलौ आगम जेते । सुने नमूढन कानन तेते ४७ ॥
 तथांचस्मृतिः—सुरां पीत्वा द्विजो मोहादग्निवर्णां सुरां पिवेत् ।
 तेन निर्दग्ध कायस्तु मुच्यते किल्बिषात्ततः ॥ १ ॥

चौपाई ।

सत्य आगम प्रवाह बहाए । सौगत काशीछोडि पलाए
 परांसीक औ सिंधुगंधारे । अंग वंग पुन मगध पधारे ४८ ॥
 मलेच्छप्राय कलिंगादिक जेई । तामै जाइ बसे पुन तेई ॥
 और पखंड दिगंबर जेत । गये पंचालदेशको तेते ॥ ४९ ॥
 मालव और अभीर अनिरता । सागर मारुदेश त्रिगरता ॥
 बिचारे तामै गूढ स्वभाए । मंदरसेवक द्वाखनाए ॥ ५० ॥
 नास्तकतर्क अहै पुन जेती । दलीमीमांसा पाइन तेती ॥
 तां अनुपथ मै वही सिद्धाई । जहां पखंड दुरे जगजाई ५१ ॥

विष्णुभक्तिरुवाच ॥

दोहा ।

मात प्यारी शशिमुखी, मृगनैनी बलिहार ॥
 तिसरें बहुरो क्याभयो, मोको करो उचार ॥ ५२ ॥

१ मनु स्मृति, अर्थ यह:-द्विजकहिये ब्राह्मण रागसे वा प्रमादसे सुरापानकरके
 अग्निवर्णवालीं सुराका पानकरे तिस सुरापानकरके दग्ध शरीर हुआ तिसपापसे
 छुटिजावेई । २ ये सर्वदेशोंके नामहै ।

श्रद्धोवाच ॥

चौपाई ।

बहुरों वस्तुविचार उदारे । काम बली रणभीतर मारे ॥
 क्षमा क्रोध गहि केसपछायो । हिंसादिकको मूल उखाय्यो ॥
 सन्तोष लोभकोई उरणमाय्यो । ज्यों रघुपति दशकंठ सहाय्यो ॥
 त्रिष्णा चोरी मिथ्याबैन । परिग्रहसहित उडाएगैन ॥ ५४ ॥
 अनसूया मत्सर जिती । नीके शंखबजाइ ॥
 परउत्कर्षहि भावना, मदको दीन खपाइ ॥ ५५ ॥

विष्णुभक्तिरुवाच ॥

दोहा ।

भलाभया अरिगन मूए, संगरभूमिमझार
 महामोहवृतांतजो, मोको करो उचार ॥ ५६ ॥

श्रद्धोवाच ॥

दोहा ।

योगउपसरगन संग पुन, महामोह खलजोइ ॥
 लीनभयो कहि कंदरे, जापतनाही सोइ ॥ ५७ ॥

विष्णुभक्तिरुवाच ॥

चौपाई ।

मोह अनरथहि कारण जोई । रहियो सेष यह भलीन होई ॥
 पुरुष विवेकी जो सुंरज्ञान । जो चाहे अपनी कल्याण ॥ ५८ ॥

दोहा ।

अग्नि ऋण अरु शत्रुको, देवे मूल उषार ॥
रहे सेष काहूसमै, बहुर देहि दुखभार ॥ ५९ ॥

चौपाई ।

मनको समाचार है जोई । श्रद्धा कहो प्रगट मोहि सोई ॥
श्रद्धा लागी करन बखान । विष्णुभक्ति सुनिये देकान ६० ॥
मूएपूत अरु पोते सारे । भयो दूखमन चीतमझारे ॥
शोकवेगमन भूरि बहायो । जीवन त्याग सुतिहठहिरायो ६१
विष्णुभक्ति मुखमै मुसकानी । बहुरों याबिध कीन बखानी ॥
जो मनमरे सुजगतमझारे । तो सभ कार्य होहि हमारे ६२ ॥
पुरुष सनातनहै जगजोई । परमानंद सुपावे सोई ॥
परदुष्टात्म मनहै जोई । जीवनत्याग कहांतिन होई ६३ ॥
श्रद्धा बहुर सुकीन बखान । विष्णुभक्तिमें भाख्यो मान ॥
बोध उदेहित तू दृढहोई । बेगमरे मनरहे नकोई ॥ ६४ ॥
विष्णुभक्ति कर अंगीकार । बहुरोंलागी करन उचार ॥
वैरागउत्पतिहेत योंकीजे । व्याससरस्वती तहां पठीजे ६५

दोहा ।

भई सुअंतरध्यान वैहु, ऐसै मुखो अलाइ ॥
मनसंकल्पसु दोन पुन, बारे सभामहि आइ ॥ ६६ ॥

१ सो शास्त्रमेंभी कहाहै:-अत्यादरपरो विद्वानीहमानः स्थिरां श्रियम् । अग्नेः शेषं ऋणाच्छेषं शत्रोः शेषं नशेषयेत् । अथयह:-अत्यंत आदरयुक्त विद्वान् निश्चलसंपत्तिकं इच्छाकरताहुआ अग्निकेशेषकूं ऋणकेशेषकूं शत्रुकेशेषकूं अबशेष नछोड़े अर्थात् तिस-तिस समयमें दूरकरे । २ व्यासप्रणीतवाणी । ३ विष्णुभक्ति तथा श्रद्धा ।

सवैया ।

मन नैननते अतिनीर बहे, पुन मुंड धुने मुख एहु अलाई ॥
 कहि पूत गए तज मोहि ईहां, इकवारसु देवहु फेर दिखाई ॥
 कहिराग गयो कहि द्वेषगयो, मदमानमुए कछुसार न पाई ॥
 मम अंगनमें दुःखआगिबले, इकबारमिलो गलभीतर आई ६७
 इहठौरनवृद्धजहाजकोऊ मम, शोकसमुंद्रहिते गहि तारे ॥
 सुअसूयते आदिसभे दुहिता, किहठौरगई नअहे कछुसारे ॥
 तृष्णादिकजे सुतनारिहुती, किहभांतिमुई सभलोक मझारे ॥
 बिनभागसुमें दुखभूरभये, इकवारमुए सबबन्धु हमारे ॥ ६८ ॥
 अब व्याकुल मेउर भूरभयो, विष पावक जानलगी उर आए ॥
 अति दूखभयो तनुछीदतहै, दुःखशोकदवानल देह जलाए ॥
 मम आज विवेक सुलोपभयो, सुत मोहमहाउरमांहिबटाए ॥
 अब जीवनमें जग दूरभयो, तनतापबडो उरमोहि तपाए ६९ ॥

दोहा ।

यों नृपसभामझार मन, भई मूरछा भार ॥
 आईसंकल्प सुतिहकह्यो, राजन देह संभार ॥ ७० ॥
 सावधानमन होइ पुन, बोल्यो यों मुखमाहि ॥
 कहां प्रवृत्ति सुनारि मम, देत दिलासा नाहि ॥ ७१ ॥
 सुन संकल्प दृग नीर अति, लागो करन उचार ॥
 देवप्रवृत्तिसुकहा अब, दूढों जगतमझार ॥ ७२ ॥
 कुटुंब शोक दवदाहिसों, दग्धरिदे अतिहोइ ॥
 खेह उडी तनकी सुनो, मुई जगतम सोइ ॥ ७३ ॥

मन उवाच ॥

चौपाई ।

हाप्यारी किह ठौर सिधाई । भयो दूख मोको अधिकाई ॥
 स्वप्नेभी मोहिसंग पियारी । हमेनहोतीरंच न्यारी ॥ ७४ ॥
 आज भागबिन दूर सिधाई । जीवनमोहि भयो दुःखदाई ॥
 तदपि जीवो पापी भार । गिरियो मूरछा धरनमझार ७५ ॥

संकल्पउवाच ॥

राजन सावधान अतिहूजे । होनीमाहि विषादन कीजे ॥
 भयो स्वस्तमन देह संभार । कहे संकल्पहकोसुउचार ॥ ७६ ॥

मन उवाच ॥

चौपाई ।

सुत अरु दारवियोग सुजोई । जाहिभयो दुःख जानत सोई ॥
 अब जीवनकी चाहन मोकों । मरोंबेगइमभाषततोकों ॥ ७७ ॥

दोहा ।

चिता बनावो बेग अब, करोंसु अनल प्रवेश ॥
 शोक अनल दुःख दाहजो, मेटो सकलकलेश ॥ ७८ ॥
 याबिधि व्याकुलमनभयो, पायो बहुतकलेश ॥
 तबै सरस्वती आइ पुन, कीनो सभाप्रवेश ॥ ७९ ॥

सवैया ।

श्वेतदुकूल धरे तनमै, मुख सारदचन्दसमान सुहाए ॥
 कर एकविषे सभ आगमहै, पुन एकविषे मणिमाल फिराए ॥
 पुन दोनविषै अभैबरदान, महाभुजसुंदर चार सुहाए ॥
 बैन मयूषन आत्मको, तम दूरकरे उरताप मिटाए ॥ ८० ॥

सरस्वती उवाच ॥

चौपाई ।

विष्णुभक्ति मोको सुपठायो । सखी सरस्वतीमनदुखपायो ॥
 संतानवियोगभयोदुःखभारी । करोजाइतिहबोधउदारी ॥ ८१ ॥
 मनको जिहबिधि होइ बैराग । तैसो यतनकरो बडभाग ॥
 सो मै अब मनकी ढिगजावों । तहाँजाइ बैरागउपावों ॥ ८२ ॥
 गई सरस्वतीमनढिगआंकुल । कह्यो पूत क्योंभयो व्याकुल ॥
 पूर्वहीते लख्यो प्रभाव । सभेअनित्य अहै जगभाव ॥ ८३ ॥
 अध्ययनकीयेतेंनिखलइतिहास । भारतलौ सभकथाप्रकास ॥
 कलपशतायु अहे जगजोई । मरे अंतचतुरानन सोई ॥ ८४ ॥
 इंद्रलौ सुर असुर सजेते । मरें अंतको सगले तेते ॥
 मनुआदिकमुनि मही समुंदा । नष्टकरेक्षणकोटमुकुंदा ॥ ८५ ॥
 अहो मोह काते तव भयो । जाते बडो शोक उरछयो ॥
 नष्टशरीर नष्ट जब होई । कोविद शोककरे नह कोई ॥ ८६ ॥
 भाव अनित्य सदा उरधारो । नित्यअनित्य सुवस्तु निहारो ॥
 नित्य अनित्य विवेकी जोई । शोकवेग तिहछुहेनकोई ॥ ८७ ॥

तथाच श्रुतिः ॥

एकमेव यदा ब्रह्म सत्यमन्यद्विकल्पितम् ॥

को मोहस्तत्र कः शोक एकत्वमनुपश्यतः ॥ २ ॥

१ जलदी । २ अर्थ यहः—जहाँ अखण्डाद्वितीयब्रह्मही सत्य है औ ब्रह्मसे भिन्न सर्व
 विकल्पितहै नाम अनिर्वचनीहै इसप्रकार एकत्वकूं नाम परमार्थकूं जानतेहुये जीवन-
 मुक्तिको तहाँ कौन मोह है कौन शोक है न कोई मोह है न कोई शोक है मोहा-ऽभा-
 वात् शोकोऽपि नास्तीत्यर्थः ।

मन उवाच ।

दोहा ।

शोक बेग दूषतभयो, देवी चीत हमार ॥
लहे बिबेक सुठौर नहिं, मेरे चीतमझार ॥ ८८ ॥

सरस्वती उवाच ॥

चौपाई ।

पूत सनेह दोषहैं भारी । जाते होइ अनरथ विकारी ॥
विषवलीबीजन सम जानो । करे कलेश अंतको मानो ८९ ॥
सुत अरु नारी प्यारे जान । कीजे तहाँ सनेह महान ॥
बज्र अग्नि जाके उर अंतर । उपजे बेगदूषके अंकुर ॥ ९० ॥

दोहा ।

ताते शोक अनेक दुम, उपजे जगतमझार ॥
दूष अनल तनदाहकर, करे चीतको छार ॥ ९१ ॥

मन उवाच ॥

दोहा ।

देवी यदपि ऐंवहै, तदपि शोक सुभार ॥
मेउर अंतरको दहे, सकौनप्राणसुधार ॥ ९२ ॥
सरस्वती तैं पदकंज जो, जीवनको सुखदैन ॥
भलाभया प्राणांतमे, सो पेखे निजनैन ॥ ९३ ॥

सरस्वती उवाच ।

दोहा ।

यह इक और अकाज सुत, चाहतहैं वसमोह ॥
जो आत्म निज हननको, कीनो निश्चे तोह ॥ ९४ ॥

चौपाई ।

काम सुलोभादिक सुत जेते । अति अपकारी जानो तेते ॥
 इनहित संचो कीजै जोई । करे अनरथ अंतको सोई ९५ ॥
 संचेहित जन अतिदुःखपाए । कामलोभ बहुपाप कमाए ॥
 लोभ जबै उरमै हुलसाए । नदी अनेक सुगहन तराए ९६ ॥
 अतिऊच पुन सल चढाए । कानन घोरमाहि भरमाए ॥
 धनमदमलनकूर मुख राजे । खडो कराए तिह दरवाजे ९७ ॥
 भने कूर भूपति मदभीने । हाथजुराइ करावत दीने ॥
 यों अपकारी तैं सुत जेते । तांहित लहे कलेश सुएते ९८ ॥

मन उवाच ।

चौपाई ।

है योंही ज्यो मुखो बखाने । तदपि मे दुख और न जाने ॥
 तिनके ललत बोल रिदहारी । चिरंकाल रिदमाहि चितारी ९९
 मनोप्राणको होइ विछेदा । याविध मै पावों उर खेदा ॥
 याविध सुनि मनकी दुखबानी । कहे सरस्वती मुखोभवानी १००

सरस्वती उवाच ॥

दोहा ।

ममताकी जन वासना, प्रेमसहित दृढहोई ॥
 तिहमूलक अतिमोहवस, दुःखपावत जन लोई ॥ १०१ ॥
 ग्रहकुंकटको खाइ मन, जब मंजारग्रह आइ ॥
 ममताके वस होइ तब, दूखघनो जन पाइ ॥ १०२ ॥

१ तुमको दुखदाई । २ मदीयत्वाऽभिमानका नाम ममता है । तिसकी जावासना कहिये सर्वदा काल वर्तना सोई है मूल कहि है कारणजिसका महामोहका तिसमहा-
 मोहके वस यहदोहाका तात्पर्यार्थ है । ३ मुरगा ।

ममता सून सुग्रह चटका, औ मूसाखाइ विडाल ॥
 बिनसनेह दुख नाहि सुत, होवत हर्ष बिसाल ॥१०३॥
 सर्व अनरथसुबीज सुत, ममताही जगजान ॥
 तां छेदनके माहि पुन, करो यतन मतिमन ॥१०४॥

मन उवाच ॥

चौपाई ।

मेतनते सुतथे उपजाए । कुकटमूसासम किम गाए ॥
 ताको नास जने दुःखभार । कहे सरस्वती बहुर बिचार १०५

सरस्वती उवाच ॥

चौपाई ।

यातनते यूका उपजाए । औ ब्रणकृमी नहिजात गिनाए ॥
 यतन सहित ताको नरघाए । दूख न रंचक मनमै पाए १०६
 यूका कृमि सुत होइ समान । एकनको उर जान संतान ॥
 महामोह एकनमै धार । मुए मूढ दुख लहे अपार ॥१०८॥

मन उवाच ॥

चौपाई ।

तम अज्ञान ग्रन्थहै जोई । दुहउछेद जानो मैसोई ॥
 सरस्वती तूं सर्वज्ञ उदार । लोकनमै जस आहि तुमार १०८॥
 निरंतर कीनो दृढ अभ्यास । सनेह सूतजीवनको फास ॥
 जाते फास इहै तुटिजाइ । देवी कहो सुमोहि उपाइ १०९ ॥

सरस्वती उवाच ॥

चौपाई ।

भाँव अनित्यसु उरमैं धारो । प्रथम उपावसु यही निहारो
बिंधिसमागम अहेसु जोई । बिजुलीचमतकार समहोई ११०

दोहा ।

ऐसे उरमैं धरातूं, करो सुदृढ अभ्यास ॥
होहु सुखी सुतलोकमैं, कटे मोहकी फास ॥ १११ ॥

मन उवाच ।

दोहा ।

देवीतोहिप्रसादते, नष्टभयो मम मोह ॥
पर उरमाहि संदेह इक, पूछतहो अब तोह ॥ ११२ ॥
तव मुखचन्दमरीचते, सुधाझरे उपदेश ॥
क्षालतमैं उर मलन पुन, हरहै शोक कलेश ॥ ११३ ॥
शोक सुमूल प्रहारको, औषध जो जगहोइ ॥
तापत मैं उरमलनको, मात बतावो सोइ ॥ ११४ ॥

सरस्वती उवाच ।

चौपाई ।

कहें मुनिश्वर सर्व बिचार । मरमभेदते शोकप्रहार ॥
ताहि निवारण औषध इहै । चिंता उरमैं मूलनगहै ॥ ११५ ॥

मन उवाच ॥

दोहा ।

कह्यो तुमारो सत्यहै, परचिंता है दुर वार ॥
चिंता चित्त डुलाइहै, ज्योंजलइंदुब्यार ॥ ११६ ॥

१ पदार्थ । २ कतव्यउपदेशका नाम विधि है । ३ मर्मभेद कहिये दुःखके करनेवाले
जे शोकप्रहार है ।

सरस्वती उवाच ॥

चिंता चित बिकारसुत, देवे बहुत कलेश ॥

काहूं शांति सुविषे मै, कीजे ताहि निवेश ॥ ११७ ॥

मन उवाच ॥

तुम प्रसन्न अति होइ उर, मोको देहु बताइ ॥

ताको ध्यानसु मै धरो, दुःख पुंज मिटाई ॥ ११८ ॥

सरस्वती उवाच ॥

दोहा ।

हे सुत यह अति गोप है, करेजु बन्धन मोष ॥

पर आरत उपदेश मै, कहे न आगम दोष ॥ ११९ ॥

सवैया ।

नव नीरद श्याम बिसाल महा, उरहार भुजासु कियूर सुहाए ॥

मकराकृत कुंडल कानन मै जुगनैन सरोज मनो बिगसाए ॥

जनमाहि निदाघ सुसीत सरोवर, वेद सदा जिह ब्रह्म बताए ॥

हरिध्याव सदा मनतूं उर मै, निज सूखल है दुःख पुंज मिटाए ॥ १२० ॥

सुनके मन दीरघ स्वास लयो कर जोर दोऊ पदशीर झुकायो ॥

भव भेषज मात सुतोहिक ह्यो भव सिंधु बह्यो तब मोहि बचायो ॥

करुणारस नैन बिसाल द्रवे, पुन सरस्वती गह हाथ उठायो ॥

सुतलाइ कतूं उपदेशहि की, अब नीठ भयो इम मे मन आयो ॥ १२१ ॥

चौपाई ।

हे सुत और प्रकारह कहों । तव संसार मोह सभ दहों ॥

जेतो मोह सुजामै होई । अंत जने तेतो दुख सोई ॥ १२२ ॥

पितातने बाधव पति भाई । काल जवै गहि शीशलजिआई ॥
 तब मूरखजन अति दुख पावै । खोहिसिरोरुह धूडरुलावै १२३ ॥
 ताडे उर दृगते जलबहै । पेख विवेकी यों उर कहै ॥
 यह संसार बडो दुखदाई । यामै चीत गडोमत राई १२४ ॥
 दृढवैराग सु जां उर होई । समसुख लहे आपमै सोई ॥
 सरस्वती इम जबै अलायो ताहीक्षण वैरागसु आयो ॥ १२५ ॥

वैराग उवाच ॥

सवैया ।

हाबिधि एक विडंबकन्यो, जिहते सभलोक सुतोहिठगाए ॥
 एनवनीलसुनीरजपे, सलपांतदलंसम देहबनाए ॥
 श्रोणत मांस सुमेद वसा, तिनऊपरते तुच अंबर छाए ॥
 कैकरुणावसनात्रवायसचीलव्याघरजातसुखाए ॥ १२६ ॥

दोहा ।

सर्व ओर श्रोणत मिल्यो, आमिखपिंड निहार ॥
 परे सुवायस चील बहु, कोकरसके निवार ॥ १२७ ॥

सवैया ।

हैमलमूत कुसूतसभो, पुन औरसलेषम भांजन भारी ॥
 नाककी मैल जबै निकसै अरु नाहिसंभार सुपोचि उत्तारी ॥
 तौ मुखचन्द कहै जिहको, वहिनाहि निहारसके तब नारी ॥
 पिख रंचकमैल गलानीकरे, सठ जानतनाहिइहै कछुसारी १२८

१ नीलकमलका दलकहिये पत्ता तिसका जो पांत कहिये अग्रभाग पसलकहिये
 कोमल तथा सूक्ष्म तिसकेसमान ।

चौपाई ।

लोल दोल सम भोग सुहाए । जरा प्रणाम भये दुखदाए ॥
 बियदाको यह गेह पछानो । धनको नास परमदुखमानो १२९
 जितेलोक सभदेवहि शोक । अबला अहे अनरथन ओक ॥
 याहि घोरसंकटपथमाही । हाहाजीव अज्ञलपटाही ॥ १३० ॥
 योंभाषत वैराग सुआयो । सारस्वती तब बैन अलायो ॥
 हेसुत आयो यह वैराग । आदकरो सुतिह बडभाग ॥ १३१ ॥
 कहांपूत मन एहु उचाच्यो । बैरागसमीप सुतिह अनुसाच्यो ॥
 तातचरण अब तें दरसाए । यह बैरागसु लागत पांए ॥ १३२ ॥

मन उवाच ।

जन्मसमे तब दरसन पाए । फेर पूतकहु कहां सिधाए ॥
 मेरे कंठ मिलो सुत पिआरे । मिले वैरागसु भुजापसारे १३३ ॥
 तब मन याबिधिबैन अलायो । तैं पेखत मम शोक पलायो ॥
 वैराग बहुर मनको यों कहै । कहा शोकको अवसर अहै १३४
 ज्यों पथभीतर पथेक मिलाए । समापाइ पुन बीछुरजाए ॥
 ज्यों त्रिणकाठसु नदीप्रवाहा । कबीमिले कबहोहि दुराहा १३५
 ज्यों जलबूंद मेघकीधारा । यथा जहाजसु सिंधुमझारा ॥
 पिता मात सुत बधु सुदारा । मिलै बिछुरे या जगतमझारा १३६
 याको होइ वियोग सुजबहीं । शोकनलए विवेकी तबहीं ॥
 ईहा जगतकी गतिहै जोई । कोटनमाहिलखै नर कोई १३७ ॥
 पूर्वहुतो तात नर जोई । मरकर भयो पूत सुत सोई ॥
 पूत तातहित पिंड कराए । तात पूत कहिगोदखिलाए १३८ ॥

१ डोला वा हिंडोला । २ राही । ३ संयोगजो हैं सो वियोगजन्यही है ।

दोहा ।

तोहि पिता महिं मुएको, भये वरष सुत तीन ॥
हम भूमंडलमै वसैं, बहु भये अमरपुर लीन ॥१३९॥

चौपाई ।

कबहुं मर पर लोक सिधाए । कबहुं ग्रह भीतर उपजाए ॥
बिनगतिजाने मूरख रोवै । विवेकी शोक न रंचक जोवै १४० ॥
ऐसै वचन सुने मन जबहीं । भयो अनंद चीतमें तबहीं ॥
सारस्वती जैसे यह कहै । सत्य बात एवैही अहै ॥ १४१ ॥
अब मैं नीके लयो निहार । जूठो अहैं सगल संसार ॥
नवजोबन नारी है जेई । मधुकरसहित खिरेद्रुमतेई १४२ ॥
फूल मालती बहुत सुगंध । पसरे जह तह पौन सनबंध ॥
मृगतृष्णासायर जल जैसे । भयो विवेक पिखोअब तैसे १४३ ॥
बहुरसरस्वती करुणावान । मन प्रति लागी करन बखान ॥
यद्यपि योंतव भयो सुभान । तदपि वत्स कह्यो मममान १४४ ॥
गिरही एक महूरत वीर । बिनआश्रम नहोवै धीर ॥
ताते अहे निवृत्ति सुजोई । धर्मचारणी कीजे सोई ॥ १४५ ॥
जैसे मंगलकरइ सनान । फूलमाल सिरऊपर ठान ॥
मले कपूरकुंकुमपट भीने । बाजे संग अनेक सुलीने १४६ ॥
व्याही तब प्रवृत्ति सुनारि । त्योंनिवृत्ति कर अंगीकार ॥
शिषासूत्र अब तजो बिसाल । होइ दिगंबरकै मृगछाल १४७ ॥

१ तथा च ब्रह्मोपनिषच्छ्रुतिः। सशिखंवपनं कृत्वा वहिः सूत्रं त्यजेद्ब्रह्मः । यदक्षरं परं
ब्रह्म तत्सूत्रमिति धारयेत् । १ । सूचनात्सूत्रमित्याहुः सूत्रं नाम परं पदम् । तत्सूत्रं
विदितं येन स विप्रो वेदपारगः । २ । अर्थ यह-संन्यासेच्छु बुद्धिमान् पुरुष ।

संतनसंग सो भले विचार । बसो इकांतसु विपिनमझार ॥
 बन नवनीलसरोज सुलोचन । गहो निवृत्ति होय भवमोचन १४८
 लाज सहित मनकरे उचार । देवी कहहु सु अंगीकार ॥
 बहुर सरस्वति करें अलाप । मनके निखल मिटावै ताप १४९

दोहा ।

समदम सतसंतोषलौ, उपजे पूत तुम्हार ॥
 सेवा तेरी वैकरै, सगले दुःख निवार ॥ १०५ ॥

चौपाइ ।

यम अरु नेम आदिक है जेते । तोहि वजीर होहिगे तेते ॥
 ब्रह्मचर्य जो अहे महान । मंत्र कहैगो तेंढिग आन १५१

दोहा ।

बिबेक उपनिषत संगमिल, यौवराज सुखसार ॥
 तोहि अनुग्रहते लहे, शांतिपूत उरधार ॥ १५२ ॥
 मैत्री आदिक चार यह, बहिनि मनोमलहार ॥
 बिष्णुभक्ति तोपै पठी, आदर इने सुधार ॥ १५३ ॥
 सरस्वती आयसुजो करो, धरीशीश मम सोइ ॥
 यों कहिशीश झुकाइयो, गहे चरन कर दोइ ॥ १५४ ॥
 आयुष मत सादर पिखो, यह संगत सुखकार ॥
 यम नेम आसन सहित, प्राणायाम सुधार ॥ १५५ ॥

—शिलासहित मुडन करवायके बाहरले सूत्रका त्याग करे जो अक्षर-परब्रह्मरूपी सूत्र है तिस सूत्रको धारणकरे कहेंतें; सूत्रसे परब्रह्महीं सूत्र है ऐसे कहते हैं इसलीये सूत्रनाम परम पदकाईसो सूत्र जान्य है जिसने ऐसा जो विप्र जो वेदपारगामि होता है अर्थात् वेदके तात्पर्यको जाननेवाला होता है । १ । २ । युवराजकर्मका नाम यौवराज है सो युवराजकर्म यह है अपने जीतेही राज्याभिषेकको देना ।

दीरघायु इनसंग तुम, अबै लहो सुखसार ॥
 सामराज निजलोकमें, नीक करो उदार ॥ १५६ ॥
 तोहि इकाग्रहूंभये, जीव लहे सुखसार ॥
 तव चंचलता संग बस, पाए बहुतै बिकार ॥ १५७ ॥
 सागरवीचीभेदते, ज्यों रवि नाना होइ ॥
 बुद्धिवृत्तिवस जीव बहु, भयो परात्म सोइ ॥
 वृतां सकल संकोचकर, वत्स तू सनीधार ॥
 सहिजानंदसु अत्मा, लहेसूख निजसार ॥ १५९ ॥

चौपाई ।

ग्यातीबंधु जिते रणमारे । प्रेतपतिके भौन सिधारे ॥
 जलतिलांजुली ताको दीजे । देवनदीमें मज्जन कीजे १६० ॥
 सुन मन नैनन नीर बहायो । बहुरो याबिध बैन अलायो ॥
 जोकछु आयसु अहे तिहारी । करों सकल मैसिरपरधारी ॥

दोहा ।

सारस्वती मन भाखि, योतजी रंगप्रवृत्ति ॥
 कीरतिवरमा देव तब, गहींचीत निरवृत्ति ॥ १६२ ॥

१ परमात्मभावको प्राप्त होवै । २ षट्बिकार । ३ सो परमात्मा बुद्धिवृत्तियोंके अधीन
 होयकर नानाजीवरूपसें प्रतीत होवै है तथा च श्रुतिः । एक एव हि भूतात्मा भूते भूते
 व्यवस्थितः । एकधा बहुधा चैव दृश्यते जलचन्द्रवत् । अर्थ यह:- एकही भूतात्मा
 परमात्मा भूतभूतमें स्थित हुआ तथा एकप्रकारका हुआभी जलमें चन्द्रमाकी न्याईं
 बहुतप्रकारका देखाजावैहै इति । ४ नाटकप्रवृत्ति ।

सोरठा ।

जनहै पूत प्रबोध, उपनिषतसु बिवेक मिल ॥
साधन बडो निरोध, जीवनमुक्तिसु होइगी ॥१६३॥

इति श्रीमन्मानसिंहचरणशिक्षितगुलाबसिंहविरचिते प्रबोधचंद्रोदयनाटके
वैराग्यो नाम पञ्चमोऽङ्कः समाप्तः ॥ ५ ॥

१ यह षष्ठमअङ्कका बीजहै ।
इति श्रीमदुदासीनवर्य परमानंद शिष्यगुरुप्रसादविरचिता प्रबोधचंद्रोदय नाटक
पञ्चमांस्क टिप्पणिका समाप्ता ॥ ५ ॥



ॐ श्रीगणेशाय नमः ।

अथ षष्ठोऽङ्कः प्रारंभः ॥ ६ ॥

दोहा ।

याउपरंत सुहोयगी, जीवनमुक्ति रसाल ॥
सभामाहि प्रवेशतब, कीनो शांति बिसाल ॥ १ ॥

शांतिरुवाच ॥

चौपाई ।

नृप विवेक इम मोहि अलायो । समाचार शांतितें पायो ॥
मन सुत कामादिकथे जेई । मुए महारणभीतर तेई ॥ २ ॥
मोहि बिलीन बैराग्य उपाए । पंचकैलेश सुदूर मिटाए ॥
मन प्रशांतिकी संगति धार । ततबोध नरकरे विचार ॥ ३ ॥
तुम उपनिषदपास अब जावो । आदरकर तिहममढिगल्यावो ॥
यो कहि शांति सुजबै पधारी । श्रद्धा आवत ताहिनिहारी ॥ ४ ॥
हरषहेर इम शांति उचारे । यह श्रद्धा कछु मंत्र विचारे ॥
इही ओर यह आवतनीकी । सुनोभला अब याके जीकी ॥ ५ ॥

१ जीवन्मुक्तिका लक्षणः—श्रवणादिकोंकरकै उत्पन्न भयाई ब्रह्मसाक्षात्कार जिसकुं
तिस, ब्रह्मवेत्ताकुं जाजीवत अवस्थाविषे कर्तृत्वभोक्तृत्वादिरूपसर्वबन्धप्रतीतिकी निवृ-
त्ति है ताकानाम जीवन्मुक्ति है । २ अविद्याऽस्मितारागद्वेषाभिनिवेशाः क्लेशाः मिथ्या-
ज्ञान का नाम अविद्या है, १ बुद्धि तथा आत्माके ऐक्याध्यासका नाम अस्मिता है, २
विषयकी इच्छाका नाम राग है, ३ साधनसहितदुःखमें अप्रीतिद्वेष है ४ मरणसें
भयकानाम अभिनिवेश है ५ ॥

दोहा ।

श्रद्धा तवै प्रवेशकर, कीनो इहै विचार ॥
 नैनसुधा पूरतभये, भूपतिकुलालहि निहार ॥ ६ ॥
 जहांदुष्टनीकेहने, पूजेसंतसमादि ॥
 वश^१अनुजीवीसेव्यहै, स्वामिदेव अनादि ॥ ७ ॥
 शांतिकहे अंबा सुनो, कौन सुमंत्र विचार ॥
 करेचीतकहिहैचली, मोको करो उचार ॥ ८ ॥

श्रद्धोवाच ॥

दोहा ।

मैं विवेककेदिग चली, पठीपुरुष मतिमान ॥
 पुरुषविवेक मिलाओगी, मंत्र इहै उरठान ॥ ९ ॥

शांतिरुवाच ॥

दोहा ।

कहो पुरुषको कौनविधि, मनसों बरतन आहि ॥
 काराग्रह बांधेविषे, ज्योंबरते नरनाहि ॥ १० ॥
 कहों पुरुषहीं करेगो, सामराज जगमाहि ॥
 अहेशांति इउहीं सुनो, ज्योंसमुझे मनमाहि ॥ ११ ॥
 कैसे मायामाहि अब, देव अनुग्रह आहि ॥
 निग्रह यों कहिबो रह्यो, कहें अनुग्रह काहि ॥ १२ ॥

१ राजकुलको । २ राजकुलमें मोहादिक । ३ वशकहिये शमादि कर्णेकर अनुजीवीकहिये ईश्वरके अनुपश्चात है जीवना जिनोंका तो कहिये वशअनुजीवी ऐसे जे जीवहैं तिन जीवोंकर स्वामीदेवअनादि सेव्य है नाम पूज्यहै । ४ श्रद्धा कहतीहै देशांति निग्रह ऐसा तेरेको कहना रहाथा (उचितथा) परंतु अनुग्रहऐसे कसाकहती है काहेतो

देवमाहिं माया अहे, सर्वअनरथनबीज ॥
ताको निग्रह भलेकर, कियोचहे निरबीज ॥ १३ ॥
शांतिरुवाच ॥

काशग्रहमै डारमन, माया निग्रहकीन ॥
कहो काहिमै अब अहे, भूपतिको उरलीन ॥ १४ ॥
श्रद्धोवाच ॥

दोहा ।

नित्य अनित्य विचारमै, सदाचितपरवाहि ॥
इह अमुत्र वैराग्यजो, वही सुहृद सुआहि ॥ १५ ॥
मत्री अहे यमनेमही, सम दम सखा सुजान ॥
मैत्री करुणादिक सभे, यही ग्रहदासी मान ॥ १६ ॥
है मुक्तेच्छा सहचरी, भये पुरुष बलवंत ॥
ममता मोह संकल्पसह, हने कृपा भगवंत ॥ १७ ॥
शांतिरुवाच ॥

दोहा ।

कहो स्वामी पुरुषकी, धर्मकर्मफलमाहि ॥
किहिबिधि अहे प्रवृत्तिअब, मैसमुझों मनमाहि ॥ १८ ॥
श्रद्धोवाच ॥

सोरठा ।

जादिन भयो वैराग्य, पुत्रीलेदिन ताहिते ॥
इह अमुत्र फलत्याग, स्वामीधारे ताहिते ॥ १९ ॥

१ सहकारी ॥ २ सखीहै । ३ अर्थ यह:-जीवरूपस्वामी पुरुषकी धर्म रूपकर्मके फलमें प्रवृत्ति किसप्रकारकीहै यहकहो ।

दोहा ।

पापनके फल नरकतें, जैसे डरपै नीत ॥
 त्योंही सुखहै पुनफल, स्वर्गभयो भयभीत ॥ २० ॥
 सुकृतको फल भोगसुख, मिले कदाचित् जोइ ॥
 करै गिलानि सुउरबिषे, अधिक नमाने सोइ ॥ २१ ॥
 प्रत्यक्प्रवण पिखपुरुषको, सफल आपनिरधार ॥
 धर्म आपही होइयो, सनै स्थल व्यापार ॥ २२ ॥

शांतिरुवाच ॥

दोहा ।

ज उपसैरगसुसंगलै, भयो लीन खल मोह ॥
 कहो वृतांत सुताहिको, जननी पूछो तोहि ॥ २३ ॥

श्रद्धोवाच ॥

दोहा ।

मधुमत्तविद्यासहित पुनि, पठे मोह उपसरग ॥
 लोभनिमित सुपुरुषको, दिखलाए बहुस्वरग ॥ २४ ॥
 जो तिनमाहि आसक्त पुन, पुरुष कदाचित् होइ ॥
 तौ विवेक उपनिषतको, स्मरनकरे न कोइ ॥ २५ ॥

शांतिरुवाच ॥

दोहा ।

मात प्यारी शशिमुखी, मृगनैनी बलहार ॥
 तिसते बहुरो क्याभयो, मोको करो उचार ॥ २६ ॥

१ स्वामीपुरुषको आत्मैकनिष्ठाकुं देखकर सोधर्म कीयाहै वैराग्यरूप फलजिसने
 ऐसा अपने आपकू मानकर स्वयं आपही व्यापारसँ रहित होताभया । २ योगविघ्न ।
 ३ काचित् सिद्धि ।

श्रद्धोवाच ॥

चौपाई ।

तब उपसर्ग पुरुष ढिगगए । कौतुक एक करत पुन भये ॥
 इंद्रजालकी विद्या जोई । लोभहेत दिखलाई सोई ॥ २७ ॥

दोहा ।

निखलसिद्धि प्रगटी तहा, पिखी पुरुष मनलाइ ॥
 गुलाबसिंह प्रभावतहि, नीके देत सुनाइ ॥ २८ ॥

सवैया ।

शतयोजनते सभवातसुने, पुन नीरनपै बिन नावचलाए ॥
 बिन ध्येनकिये सभ वेदपुराण, सुभारतलौ इतिहाससुआए ॥
 बिनछन्दपढे सुभछन्दनके, भवमंडलमै सबकाव्य बनाए ॥
 सुजराउजरेसुरथानपिखे, सभलोकनको रुचिप्रेर चलाए २९ ॥
 दृढभीतनते निकसे क्षणमै, तनु मेरुसमान सुभूर बनाए ॥
 तनुकंटकपै समतूल रहे, क्षणमै रविमंडलमाहि सुजाए ॥
 इहभांति निहातर देवनजू, ढिगआनभलैपद मोल झुकाए ॥
 इहठौर स्वामिन बासकरो, दुखद्वंदसमै अब तोहि मिटाए ३०

दोहा ।

ईहा जन्म न मृतहै, यह अतिसुंदर देश ॥
 ईहाबैठ कलोलकर, मनके हरो कलेश ॥ ३१ ॥

दोहा ।

विद्याधरी अप्सरा, विविध सुगंध सुरनार ॥
 ते पदबन्दनकरतहैं, हाथ उपाइनधार ॥ ३२ ॥

सवैया ।

याहिपिखो तुम सुंदरता, मइमत्तविलोचन रूप अपारे ॥
 दीरघ वारज गंधमिली, अलक कचघुघरवंत सुकारे ॥
 पीनपयोधर रंभउरू कमलानन अंजननैन सवारै ॥
 दाडमसीरदपांतिबनी, समदामनि हासहरै तमभारै ॥ ३३ ॥
 हाटककी सिकता धरनी, पुन इंद्रसी नीलमणि धनलाई ॥
 एबनपांति नृतांतखिरी, बहुफूल सुगंध चहूंदिश छाई ॥
 गुंजत ऐमधुपावलिया, मनबावलियासुमनोजचलाई ॥
 संग विलासनि केलकरो, तपसा तव पुंनफले अब आई ॥ ३४ ॥

शांतिरुवाच ॥

दोहा ।

मात प्यारी शशिमुखी, मृगनैनी बलिहार ॥
 तिसते बहुरों क्याभयो, मोको करो उचार ॥ ३५ ॥

श्रद्धोवाच ॥

दोहा ।

सुन उपसर्गनवाकको, कीनो पुरुष उचार ॥
 अतिसुंदर यह भोगसुख, मोमन बाढियो प्यार ॥ ३६ ॥
 संकल्पकियो उत्साहमन, स्वामीपुरुष उदार ॥
 योंमतिसुन उर खेदगहि, करे सुशांति उचार ।

शांतिरुवाच ॥

दोहा ।

हाधिग हादुख कष्टअति, भईबडी अबहान ॥
 पुनरपि जगफासीविषे, पय्यो सुपुरुष महान ॥ ३८ ॥

मात प्यारी शशिमुखी, मृगनैनी बलिहार ॥
तिसते बहुरो क्याभयो, मोको करो उचार ॥ ३९ ॥

श्रद्धावाच ॥

चौपाई ।

तब तांमीत पुरुष इकसार । तर्कनाम तिहकरे उचार ॥
क्रोधभरे दृग ताहि सुलाल । मनोसमीरसखा सुबिसाल ४०
तिन उपसर्गन ओर निहार । बहुरपुरुषको कीन उचार ॥
यह अस्थानी देव सुजेते । बिघनकरें तुमको प्रतितेते ४१ ॥
श्रद्धा याबचननकेमाही । मीत कदाचित कीजे नाही ॥
थानअभिमानी देव सुजेते । है अतिधूरत वंचक तेते ॥ ४२ ॥
विषयवडसपिंडीको डारे । मीनसमान निखलजन मारे ॥
भोगनकी चिंता दुखआगे । डारे तोहि न लखे अभागे ४३ ॥

सवैया ।

एह अतिसुंदर नारि जितीनरकाऽग्निकी सुशिषा पहिचानो ॥
ताहिकि संगमते दुखजोबहु वारलयो कहितोहि भुलानो ॥
तैंतप दीरघ नीतकरे, सभलोक बखानत तोहि स्यानो ॥
भोगनपावकते हटियो, दुःखनाहिभरो सुकह्यो मम मानो ४४ ॥
भवसागरतारणयोग्य जहाज सुतें चिरकालहिते अब पायो ॥
मदमत्तविलोचननारि दिखाइ सुचाहतहैं सुरतोहि छुडायो ॥

१ सत् असत् विचारका नाम तर्कहै । २ अग्नि । ३ मधुमत्तसिद्धि अभिमानी देव-
ते । ४ विषयरूप मांसयुक्तकांटा । ५ मनुष्यशरीर ।

अब छोडि जहाज अगारनदी सुचहैं किम आत्म आपबहायो ॥
 इह सीष सुनो समपीकमलीन सुभोगनहेर कहा हुलसायो ४५
 डार पटंबर अबरधार दिगंबर जाबन बास कएहै ॥
 माहि अरण्य करें तपदीरघ, भोगमहानल पारभयेहै ॥
 नाम महामुनि जाहि कहैं, अरु कांपत भूपतिपांड पएहै ॥
 नारि सुधूमनघेरबिषे, पर फेर रसातलमाहि गएहै ॥ ४६ ॥
 बहुबारभयो नरनारि तुही, इहबार कहांसु अघाइ रहेगो ॥
 अब याहिजहाजते पांडखिसे, भवसागरधारसु फेर बहेगो ॥
 अब हाथ अलंबत मोक्षअहै, इह औसरमीत न फेर लहेगो ॥
 कविसिंहगुलाब नमानत जो, नरकाऽग्निमै बहुदुःख सहेगो ४७

शांतिरुवाच ॥

दोहा ।

मात प्यारी शशिमुखी, मृगनैनीबलिहार ॥
 तिसते बहुरो क्याभयो; मोको करो उचार ॥ ४८ ॥

श्रद्धावाच ॥

दोहा ।

तब तांवचनन कानधर, विषय नस्वस्ति उचार ॥
 मधुमत्तविद्यामोह तज, भयो वैराग उदार ॥ ४९ ॥

सवैया ।

भोगनकेदुख चीत चितार, सुशीश धुन्यो मन ताहि उठायो ॥
 आज महादुखसिंधुविषे, परतो मम मीत सुतोहि बचायो ॥
 फेर भजों नहिं भोग कबी, इह मीत सुनो तव साच बतायो ॥
 इमभाषभले दृग लाज बढी, भरअंक भले सुसखा गललायो ५०

शांतिरुवाच ॥

चौपाई ।

भलाभया बहुपुरुष उदार भयो विरक्त कटे दुःखभार ॥
तू अब मातुसु कहां सिद्धाई । मोकों नीके देहु बताई ॥५१॥

श्रद्धोवाच ॥

दोहा ।

पुरुष पठाई मै चली, हेरन आज विवेक ॥
जावों भूपविवेकढिग, मेटिसु विघन अनेक ॥ ५२ ॥

शांतिरुवाच ॥

चौपाई ।

मोकोबी पुन रायविवेकपढ्यो सुकारज भाषो एक ॥
उपनिषतलियावनहेत पठाई । चले सबेग बिलंब मिटाई ॥५३॥

कीवरुवाच ॥

दोहा ।

विवेक उपनिषत समीप, श्रद्धा शांति उदार ॥
गई जबै बहुपुरुष पुन, आए समामझार ॥५४॥
करविचार उर हर्ष अति, लागो करन उचार ॥
गुलाबसिंह बहुवाकपुन, सुनो साध उरधार ५५ ॥

पुरुष उवाच ॥

दोहा ।

अहो महातम है बडो, विष्णुभक्तिको लोइ ॥
जांप्रसादबन्धनमिटे, मुक्तिजीव जग होइ ॥ ५६ ॥

सवैया ।

जिहमाहि कलेश बडीलहरी, सुभयानक जाहिके पंथ अपारा ॥
 सुत मीत कलत्र सुबंधु सखा, मकराग्रह ग्रन्थ बडें सुबिकारा ॥
 निजक्रोध महाबडवानलहै, तृष्णानिजनागनिरूपसुकारा ॥
 हरिकी भक्ती पदकंज प्रसाद तन्यो भवसागरमें अजभारा ५७ ॥

दोहा ।

तर्क बडो मम मीतहैं, होयो मोहि सहाइ ॥
 पावक भोग करालते, लीनो मोहि बचाइ ॥ ५८ ॥

कविरुवाच ॥

दोहा ।

उपनिषत शांति दोनो तबै, कीनो सभाप्रवेश ॥
 कीरतिवरमा मोलमणि, बैठो जहाँ नरेश ॥ ५९ ॥

शांतिरुवाच ॥

दोहा ।

चलो सखी सुविवेकका, बदन निहारो आज ॥
 भाग तुमारे जागयाहोहि सभे तव काज ॥ ६० ॥

उपनिषदुवाच ॥

दोहा ।

सखी स्वामी निरदई, जाहि त्याग्यो मोहि ॥
 ताको मुख कहिविध पिखों तू मनभीतरजोहि ॥ ६१ ॥

शांतिरुवाच ॥

दोहा ।

देवी स्वामी परोंथो, परम विपदके माहि ॥
इहविध एहुः उलाहनो, तूं भाषतहैं ताहिं ॥ ६२ ॥

उपनिषदुवाच ॥

सखी न देखी दुरदशा, मोपर बीती जोइ ॥
जाकर ऐसै तूंकहै, सुनो बखानो सोइ ॥ ६३ ॥

चित्रपदालुन्द ।

भुजदंडतोडिकुपंडितामणिकंठकीबहुफोर ॥
करकाढिकंकणलीतियाकररहीमैंबहुशोर ॥
चूडामणिममशीशतेकटिदीनबहुतकलेस ॥
समद्रोपतीकेशांतिमेरेंखैंचियातिनकेस ॥ ६४ ॥
कुछ अरथ मेरो औरथो, बहु करहै औरप्रकार ॥
जीवकाके हेत मूरख तोडिफोडि उचार ॥
अर्थको सुअनरथभाखैं देहि बहु संताप ॥
बहुभांति मैं दुखपाइयो नहिडरें ते सठपाप ॥ ६५ ॥

१ कुत्सित पण्डितोंने मेरे मनन तथा निदिध्यासन रूपदो भुजादंड तोड डारेहैं तहां ब्रह्मरूप विषयसँ भिन्न विषयका जो मनन है तथा निदिध्यासन है सोई भुजा-ओंका तोडना है धारणा ध्यान समाधिरूप कंठकी मणिहै सोभी ब्रह्मरूप विषयसँ भिन्न विषयका धारणा ध्यान समाधि करनाहीं तिसका फोडना है-उपक्रम उपसंहा-रादि रूप जे वेदांततात्पर्यके षट् लिंग है, सोई भये कङ्कण तिनकोभी वेदांततात्पर्यकू छोडिकर अन्यार्थकेतात्पर्यपर लगावना यही तिनका लेनाहै-चूडामणि कहिये शिरभू-षणकीन्याई आत्म स्वरूप तिसका जो विप्रीत निश्चय है यहीशिरसँ काटिदेनाहै-केश कहिये वेदांतभाग उपनिषद्भाग तिसको जो अन्यार्थपर लगाना सोई केशोंका खेंचना है द्रोपतिवत् यह लुन्दका तात्पर्य है ।

दुरविदग्ध अनेक मोको मिले लोकमलीन ॥
 विवेक पतिबिन जान मोको चहें दासीकीन ॥
 केचित कहें जग सत तूं मुखकरो इह प्रकास ॥
 केचित कहें मत द्वैतमै उपनिषद तूं कर वास ॥ ६६ ॥
 इक कहें जीव परेशको है भेद एहु बखान ॥
 इक कहें भेदाऽभेदको उपनिषद तूं उर मान ॥
 इह भांतिव्याकुलमै करी नहिलखै मूरख बात ॥
 ज्यों दुष्ट कौरवसभाम भई द्रौपदी बिरव्यात ६७ ॥

शंतिरुवाच ॥

चित्रपदाल्लन्द ।

महा मोहके अपराधते तैं लह्यो है दुःख सोइ ॥
 देवको अपराध नाही होनहारी होइ ॥
 मोह मन उपजाइ काम सुपुरुषको गहि लीन ॥
 डार विषयआरण्यमै सुविवेक दूरहिकीन ॥ ६८ ॥
 कुल नारिके यहधर्म देवी रच्यो भगवान ॥
 संपद सुआपदमै सदा बहुचहे निजपति प्रान ॥
 अब आउ दर्शन देहु नीके मिष्टपिया प्रतिबोल ॥
 अब फले तोहि मनोरथा सभहते द्वेषी टोलि ॥ ६९ ॥

उपनिषदुवाच ॥

दोहा ।

पुत्री गीता यों कह्यो, मोहि इकंत बिछाइ ॥
 स्वामी भरता पुरुषको, करो तोष अबजाइ ॥ ७० ॥

१ दुष्टबुद्धि । २ सांख्यमतवाले ३ मीमांसक । ४ नैयायिक । ५ त्रिदण्डी । ६ उपनिषत् अर्थकी प्रतिपादिकताकर वा उपनिषत्संकाशतें उत्पत्तिहोनेकर गीताकी उपनिषत्का पुत्रिपणा है ।

प्रबोधपूत तव होइगो, बन्धन दयै निवार ॥
 परस्वामीप्रति कहनते, आवत लाज सुभार ॥ ७१ ॥
 शांतिरुवाच ॥

दोहा ।

विष्णुभक्ति सुविवेकको, कीनो इहै उचार ॥
 पेखो स्वामी पुरुष अब, काहे करें विचार ॥ ७२ ॥
 उपनिषद कह्यो ज्यों कहितहै, सोइकरो बडभाग ॥
 गुलाबसिंह दोनो तबी, गई अखाडो त्याग ॥ ७३ ॥
 तब विवेक राजा सुनो, श्रद्धासहित सुहाइ ॥
 मोह पटलको दूरकर, बन्धो सभामहि आइ ॥ ७४ ॥

विवेक उवाच ॥

दोहा ।

श्रद्धे शांति सुगईहै, उपनिषदनिहारन काज ॥
 किहविधि प्यारी को पिखों, मोहि बखानो आज ॥ ७५ ॥
 देव सुआयसुथारीया, गई शीस परमान ॥
 विष्णुभक्ति पुन शांतिको, कीनो एहु बखान ॥ ७६ ॥
 मंदर नाम सुसैलमै, है हरिको अस्थान ॥
 तह गीताके निकट बहु, बसत तर्क डरमान ॥ ७७ ॥

विवेक उवाच ॥

तर्कविद्याते कहो, केस तिह डरभार ॥

श्रद्धोवाच ।

देव उपनिषद करेगी, तोको एह उचार ॥ ७८ ॥
 अब तुम चलो समीप प्रभु, लेवो पुरुष निहार ॥
 बैठ इंकत सुध्यायहै, तोहि आगमन उदार ॥ ७९ ॥

तब विवेकदिगजाइकै, कीनो पुरुष प्रमाण ॥
 कह्यो पुरुष तव एहु सुत, कीनो भलो न काम ॥८०॥
 ज्ञानवृद्ध तुम हो बडे, हमको पितासमान ॥
 यही अर्थ ऋषिदेवता, पूर्व कीन बषान ॥ ८१ ॥

चौपाई।

एकसमे आपके मारे । भूले निगम देव ऋषि सारे ॥
 तिनको एक बाल थो जोई । तीर सरस्वती बसियो सोई ॥८२॥
 दोहा ।

दधीचऋषीसर पूतबहु, जन्यो सरस्वतीमाहि ॥
 नाम सारस्वत ताहिको, धन्यो जगतकेमाहि ॥८३॥

चौपाई।

मात सरस्वती तिह प्रतिपाल । रहे कंठ तिहबेद बिसाल ॥
 तबते समापाइ ऋषिजेत । पूछे परस्पर देव सुतेते ॥ ८४ ॥
 जब तिन कंठन किने निहारे । तबसे बालक पास पधारे ॥
 कह्यो बालको बेद पढैये । कह्यो बाल पूतसुनलैये ॥ ८५ ॥

१ श्रुतिः—प्रजापतिब्रह्मा देवान् सृष्ट्वा केनचिन्निमित्तेनाज्ञानिनो भूयासुरिति देवाऽश-
 शापः । तदनन्तरं ताननुगृह्यन् देवानामन्योन्यं पितृत्वं पुत्रत्वं च ददौ । अर्थ यहः
 —प्रजापति ब्रह्माजी सबदेवताओंको रचिकर तथा कोई कार्यरूप निमित्तकर अज्ञा-
 नि होवो इसप्रकार देवताओंको शाप देतेभये तिसके अनन्तर तिनोंपर अनुग्रह करते-
 हुए ब्रह्माजी देवताओंको परस्पर पितापणा तथा पुत्रपणा देतेभये । इसश्रुतिकर देवते
 धर्ममार्गमें नष्टसंज्ञावाले होतेभये, पुत्रोंसे वेद पूछिकर पुत्रसंज्ञाको प्राप्तभये इसरुहनेकर
 ज्ञानवृद्धको पितारूपिता दिखाई, यह संक्षेपार्थ है ऋषिमत्संग आगे कहिते हैं । २
 नारदादि ।

मेरे शिष्य होहुगे जबही । वेदपढावो तुमको तबही ॥
 क्रोधभरे उरमें ऋषिसारे । तब ब्रह्माके पास पधारे ॥ ८६ ॥
 देवदधीच पूतहैं जोई । हम अतिवृद्ध बाल अतिसोई ॥
 वेदपढनहित हम ढिगगए । पूतपूतकरि सुखो अलए ॥ ८७ ॥

दोहा ।

मेरे होवो शिष्य जब, तभी पढावों वेद ॥
 यों सुन बालकबैन प्रभु, मनमें बढ्यो सुखेद ॥ ८८ ॥

चौपाई ।

तब चतुरानन बैन बखाने । विद्यावृद्ध वृद्ध सुँर माने ॥
 तुम अतिबाल वृद्ध सो कहिये । होय शिष्य विद्याको लहिये ॥ ८९ ॥

दोहा ।

यों चतुरानन बैन सुन, गए ऋषीसर सर्व ॥
 दधीच पूतके शिष्यबहु, भये मिटाइ सुगरव ॥ ९० ॥

चौपाई ।

तातैं तुमहो पिता समान । यों विवेकप्रति पुरुष बखान ॥
 हमपर ऐसी दया सुकीजै । सगलो मोह दूरकरदीजै ॥ ९१ ॥
 या अवसरपुन शांति सु आई । उपनिषत सुताके संग सुहाई ॥
 शांति पुरुषको कीन उचार । उपनिषत करे पदबंदन थार ॥ ९२ ॥
 शांतिन ऐसै करो बखान । उपनिषत अहै मममात समान ॥
 ततबोधको दए उपाइ । तातैं हम इन लागे पांइ ॥ ९३ ॥

दोहा ।

माता औ उपनिषतमै, बडो अंतरो जान ॥
 बहुदृढबन्धनको करे, यह करे बध्न समहान ॥ ९४ ॥
 पुन उपनिषत बिबेकपिख, अभिवन्दन तिहधार ॥
 बठी किंचित दूर हित, पूछत पुरुष विचार ॥ ९५ ॥
 कहो अंव एते दिवस, कहि कहि करे बितीत ॥
 उपनिषत बखाने पुरुषको, सुनो इकागर चीत ॥ ९६ ॥

चौपाई ।

मठमझार पुन शून अगार । मूरखजनकी संगतधार ॥
 आपददिन इहमांति बिताए । कहांकहो मै अतिदुःखपाए ॥ ९७ ॥

दोहा ।

कह्यो पुरुष वहिततकछु, जानतथे पुन तोहि ॥
 उपनिषद कह्यो कहिजानहै, जगल व्यापे मोहि ॥ ९८ ॥

चौपाई ।

ते निजइच्छाके अनुसार । मेरो अरथ सुकरें उचार ॥
 अरथ बिचारबिना इंड कलपै । द्रवडागणज्यों बाणी जलपै ॥ ९९ ॥
 परको ठाग द्रव्य तिह हरे । याहित मोहि बिचारण करें ॥
 मै उपनिषत मोक्षको कारण । पेट हेत सठ करें सुधारण ॥ १०० ॥

दोहा ।

पुरुष कह्यो सुन मात पुन, मोप्रति करो उचार ॥
 किहबिध बासरतेंबिते, भाखो सगल विचार ॥ १०१ ॥

१ मेरे पीछे लग गए । २ द्रवणागण कहिये जेहे द्राविडदेशस्थपुरुषोंकी भाषाको सुनकर कल्पना करतेहैं तद्रत् वाणी कहतेभये । वा द्रवणागण कहिये मंडकोंक समुदाय ।

दोहा ।

पुरुषप्रश्न उपनिषत सुन, लागी करन बखान ॥

गुलाबसिंह वहिवाक पुन, साधधरो निज कान ॥ १०२

उपनिषद्वाच ॥

चौपाई ।

ता मै चली बडोपथ जहां । देखी यज्ञविद्या तहां
इत कृष्णजिन अग्निजलाई । इत समधाधृत जूपसुहाई १०३
स्रोआलौ सभभांजन हाथ । इष्टिपशु मख सोम सुसाथ ॥
कर्मकांडकी पद्धति जोई । नीके मुखो अलाए सोई १०४
तबमै मनमै कीन विचारा । एहु धरे बहु पुस्तक भारा ॥
ए कछु ततपछाने मेरा । कोदिन ईहा करों बसेरा १०५ ॥
तब मै ताढिग शीशु झुकायो । तिन मोको पुन एहु अलायो
कहु कल्याणी वांछतसार । तब मै तिनसो कीन उचार १०६
मै अनाथ दूरमम नाह । तोही समीप बसनकी चाह ॥
तब तिन मोको एहु बखानी । कौनकाज तूं करें कल्याणी १०७
तब मै कह्यो जुपुरुष उदार । ताको रूप सुकरों उचार ॥
जातैं विश्व उदे यह होई । जामैं रहे लीन पुन सोई १०८ ॥
जाके भास निखल जग भासे । सहजानंदसु ज्योति प्रकासे ॥
शांति निरंतर अकरूपा । निरावयवसु असंग अनूपा १०९

१ कालेमृगकी चर्म । २ सुवा-उपभृत् ध्रुवाइत्यादि पात्र । ३ दर्शपूर्णमास इष्टि तथा
दृष्टपशु तथा मखयाग तथा सोमअग्निष्टोम तथा पद्धति इति कर्तव्यता क्रम । ४ श्लोक
-यस्माद्विश्वमुदेति यत्र रमते, यस्मिन्पुनर्लीयते भासा यस्य जगद्विभाति सहजानन्दो-
ज्जलं यन्महः । शान्तं शाश्वतमक्रियं यमपुनर्भावाय भूतेश्वरं द्रवध्वांतमपास्य यान्ति
कृतिनः प्रस्तौमि तं पुरुषम् ॥ १ ॥ इसश्लोकका अर्थ मूलमें लिखा है, ।

द्वैत अंधेरो दूर मिटाइ । जामै मिले सुमोक्षी जाइ ॥
 तत्त्वज्ञानते पावे मोक्ष । पुरुष पुरातन है निरदोष ११०
 यहि पुरुष उर ब्रह्म पछानो । ब्रह्म न यांते भिन्न सुमानो ॥
 बिनाज्ञान भासे पुन भेद । ज्ञान जनावे ब्रह्म अभेद १११
 ऐसे बचन सुमेरुधार । यज्ञविद्या कीन उचार ॥
 निखलक्रियाको करता जोई । कैसै पुरुष ब्रह्म पुनहोई ११२ ॥
 क्रिया भवफासीपर हरे । ज्ञाननमुक्तिसु काहूं करे ॥
 बेदकहें निजकर्म सुकरे । जौलौ जीवै नहिपरहरे ११३ ॥

दोहा ।

तातै तेग्रह राषणे, सरेन मेरो काज ॥
 पर तदपि तूं ऐवकर, ज्योंमम भाखों आज ॥ ११४ ॥
 करताऔ पुन भोक्ता, पुरुष सुअहे बिसाल ॥
 ऐसै निसबासर कहो, बसोसु किंचितकाल ॥ ११५ ॥
 यामैंकहो सुकोन तव, लागत याजग दोष ॥
 योंसुन राय विवेक पुन, बोल्यो धार सुरोष ॥ ११६ ॥

चौपाई ।

अहो मखनकोधूम सुकारा । यज्ञविद्याके नैन मझारा ॥
 तांकर मलनदृष्टि बहुभई । यों कुतर्क यांतै निरमई ११७ ॥
 यज्ञविद्या है निरबुद्धि । ईश्वर पुरुष अकरता शुद्ध ॥
 चुंबक मणि ज्यों निहचल अहै । तासमीप लोहाकृतगहै ११८
 त्यों ईश्वरकी संगतपाइ । माया लेवे निखल उपाइ ॥
 अज्ञान जनत बन्धनहै जोई । कैसै कर्म निवारें सोई ॥ ११९

१ श्रुतिः—कुर्वन्मेवेह कर्माणि. जिजीविषेच्छतपसमाः अर्थः—इस कर्माधिकारभू-
 लोकमें अग्निहोत्रादि कर्मोंक कर्ताहूआहीं सौवर्षपर्यंत जीवनेकी इच्छा करे । २ ईश्वर
 औ पुरुषजीवात्मा ।

तमज्यों तमको दूर न करे । त्यों नही कर्म सुबन्धनहरे ॥
ताँतै यज्ञविद्या है जोई । सम्यक अर्थ नजानेसोई १२०

दोहा ।

लीन अंधेरो भवन तम, करे सुजब प्रकास ॥
तब बिनज्ञान सुकर्मते, होवै बन्धननास ॥ १२१ ॥
बिन आत्मके ज्ञानते, मुक्तिपंथ नहि आन ॥
ऐसे बदनसरोजते, करे सुबेद बखान ॥ १२२ ॥
कह्यो पुरुष उपनिषतको; बहुरो कहो विचार ॥
यज्ञविद्या तोहिको, कैसे कीन उचार ॥ १२३ ॥
उपनिषदुवाच ॥

चौपाई ।

यज्ञविद्या बहुर विचार । मोको याबिधिकीन उचार ॥
सखी सुतेरी संगति जोई । हमरे शिष्य बिगारे सोई १२४

दोहा ।

फल अनित्य सोजानकै, करेन सादर करम ॥
तेरी संगति पाइके, जाने निखल सुभरम ॥ १२५ ॥
ताँतै वांछतदेशको, करो गमन ततकाल ॥
तब मैं ताको छोडिकर, चाली बहुर उताल ॥ १२६ ॥
कर्मकांडकी सहचरी, पिखी मीमांसा जाइ ॥
बहु प्रकार भाषे कर्म, बहु अधिकारी पाइ ॥ १२७ ॥
तामै कह्यो समीप तब बसोंसु किंचतकाल ॥
तब उन कह्यो सुकर्ममुहि, भाषो सखी बिसाल ॥ १२८ ॥

चौपाई ।

तब मैं कह्यौ पुरुषको रूप । मैं भाखोंगी परम अनूप ॥
 निज शिष्यनको बदन निहार । बहुर मीमांसा कीन उचार १२९
 फल उपभोग योग्य है जोई । पुरुष बखानेगी यह सोई ॥
 करो कर्म इस ताहि उचारियो । तब तां शिष्य अनुमोदन धारियो
 तब तां शिष्य एकथो जोई । मीमांसा को रिद अंगम सोई ॥
 नाम कुमारलस्वामी वाको । कर विचारतिन भाख्यो ताको
 करम निफल उपभोगता जोई । उपनिषत कहे नह आत्म सोई
 किंतु कहे अकरता सोई । भुक्ता नाहिक दाचित होई १३२
 ऐसे आत्म रूप सुजोई । करम उपयोग्य करे नह सोई ॥
 बहुरो बोल्यो अपर विचार । ज्यों है त्यों मम करो उचार १३२
 पुरुष दोइ जग भीतर गाए । एक जीव इक ईश बताए ॥
 मोह अंधेरे जीव दबायो । ईश्वर सकल सुसाक्षी गायो १३४
 बांछे करम फल जीव सुजेते । ईश्वर देवे ताको तेते ॥
 जीव करम में है अधिकारी । ईश अकारता बेद उचारी १३५ ॥
 कल्पत बन्ध जीव में अहै । नित्य मुक्ति परमेश्वर कहै ॥
 सुन विवेक भूपति हर खाने । साधु साधु मुख माहि बखाने ॥
 होवै भले सुदीर्घ आयो । जाने या बिधि अर्थ अलायो ॥
 दोन संपरण बेद में गाए ॥ रहें इकठे सखा बताए ॥ १७३ ॥

१ यस्माद्विश्वमुदेति । इस पूर्वोक्त श्लोक कर पुरुष का रूप कहा । २ साधु साधु इस प्रकार स्वीकार किया । ३ द्वा सुपणां सपुजा सखाया, समानं वृक्षं परिपस्वजाते तयोरन्यः पिप्पलं स्वाद्वत्त्यनश्नन्नत्र्यो अभिचाकशीति ॥ अर्थ यह :- दो पक्षी जीवात्मा परमात्मा सो कैसे हैं साथ रहनेवाले हैं तथा परस्पर अनुकूल हैं, तथा एक शरीर रूप वृक्षकू आलिङ्ग (स्वीकार,) करते हैं तिन दोनों में एक जो जीव है सो स्वादु (पक्क) कर्म के फलकू भोगता है और अन्य जो परमात्मा है सो तिस कर्म फलकून ही भोक्ता हुआ प्रकाशता है नाम साक्षिरूप होयकर देखता है ॥

समान वृक्षमै कीन सुबासा । एक खाइ फल एक उदासा ॥
 बहुर पुरुष उपनिषत अलयो । कहो मात तहबहुरसुभयो १३८
 सुन शिष्यनको एहु बिचार । मिमांसा मोप्रति कीन उचार ॥
 जह इच्छा तह कीजैगौन । लायक नाहि हमारे भौन १३९ ॥
 मीमांसाते मैचली अगारी । तर्कविद्या और निहारी ॥
 बहुते शिष्य सुसंग सुहाए । सेवत ताहिं निरंतर पाए १४० ॥
 धनकी इच्छा मनमै धार । बैठी भूपति सभामझार ॥
 जलप वितंडावादै विसाला । छलनिग्रहबहुकरेकराला १४१
 सांख्यविद्या बहुर निहारी । बैठी लांबी भुजा पसारी ॥
 पुरुषनको बहुभेद बखाने । ततनैकी गणना उर ठाने १४२
 कहे प्रकृतिसु जगत उपाये । महदादिक क्रमभाख सुनाए ॥
 बहुर पतंजलविद्या देखी । पुरुष भेद बहुकहै विसेखी १४३ ॥
 मैसभ हनके निकट सुगई । भाष्यो ईहावासहित अई ॥
 तब तिन कह्यो सुकरम अलाई । मैपुन वही सुदयो बताई १४४
 ईश्वर निखल सुजगत उपाए । पुरुष नाम पुन वही कहाए ॥
 क्रोधयुक्त तामै इक भई । फुरेहोठ यों बात अलाई १४५

१ उभयपक्षस्थापनवर्ती विजिगीषुकथा जल्पः) अर्थयहः—वादी प्रतिवादी इन दोनों पक्षोंके स्थापन करनेहारी ऐसी जा परस्परजीतनकी इच्छावान् वादी प्रतिवादी दोनों-
 प्रश्नउत्तररूप कथा है ताका नाम जल्प है । २ (स्वपक्षस्थापनहीना विजिगीषु-
 कथा वितंडा) अर्थ यहः—आपणे पक्षके स्थापनतैरहित ऐसी जा जीतनेकी इच्छावाले
 पुरुषोंकी परस्परकथा है ताका नाम वितंडा है । ३ तत्त्वबुद्धियोंः कथा वादः)
 अर्थ यहः—तत्त्ववस्तुके बोधनकी इच्छावाले पुरुषोंकी जा परस्परप्रश्नउत्तररूपकथा है ताका
 नाम वाद है । ४ अर्थान्तरेण प्रयुक्तस्य शब्दस्यार्थान्तरवर्णनं छलम्) अर्थ यहः—अन्य-
 अभिप्रायसे कथनकियेहुष शब्दके अन्यअर्थके वर्णनका नाम छल है । ५ सत्त्वरजतम-
 गुणकी समभवस्थायकानाम प्रकृति है ता प्रकृतिसे महत्तत्त्व, महत्तत्त्वसे अहंकार, अहंका-
 रसे पञ्चतन्मात्रा, पञ्चतन्मात्रासे पञ्चभूत, औ दश इंद्रिय येषोडश विकार तथा पुरुष
 जीवात्मा ये पचीस तत्त्व हैं । ६ नानापुरुष जीवात्मा माने हैं ।

कौन बलाय कहाँते आई । जाने ऐसी बात अलाई ॥
 ऐसी बुद्धि तुमारी यातैं । धक्केखातफिरतहै तातैं ॥ १४६ ॥
 हापापिनि ईश्वर है जोई । किहविधि जगत् उपावै सोई ॥
 एक कहें प्रधान उपायो । एक कहें प्रमाणु जायो ॥ १४७ ॥
 योंसुन रायविवेक सुजोई । लागो करण उचारण सोई ॥
 तरकविद्यालो सभ जेती । दुष्टबुद्धि जानी सभ तेती ॥ १४८ ॥
 कार्य अहै निखलजग जेतो । ईश्वर सगल उपायो तेतो ॥
 एतीबाति न जानत जेई । हैं अति मूरख जगमै तेई ॥ १४९ ॥
 प्रधान प्रमाणुलौ समजेते । कल्पत अहै सगल पुन तेते ॥
 भूमि नीर अरु पावक पवना । कल्पत सगल स्वप्नपुरभौना ॥
 गन्धर्वनगर पुन इंद्र सुजाल । तांसम जान असत बिसाल ॥
 सीपहूप ज्यों रज्जु भुजंगा । ब्रह्म अज्ञानजन्यो जगअंगा ॥ १५१ ॥

दोहा ।

ब्रह्मज्ञानके उदेते, होवतैहै पुन लीन ॥

ज्यों जागेते होतहै, स्वप्न सगल भ्रम खीन ॥ १५२ ॥

चौपाई ।

विकारसंक तिहभीतर जोई । मूढमति उर कल्पी सोई ॥
 शांति सदा वहिज्योति प्रकासी । नित्यप्रकास सदा अविनासी ॥
 जगत गन्धर्व नगर सुउपाए । रंचकनाहि बिकार सुपाए ॥
 नीलमेघ अरु धूल अपारा । नभमै करे नरंच विकारा ॥ १५४ ॥

पुरुष उवाच ॥

चौपाई ।

संदेहदवानल चीतमझारी । अमृत सिंच विवेक निवारी ॥
 मेरो चीतसु अतिहरषयो । भलो बिचारविवेक अलयो ॥ १५५ ॥

दोहा ।

पुरुष कह्यो उपनिषतको, बहुरो करो प्रकास ॥
तरकविद्या पासतैं, कैसे भई उदास ॥ १५६ ॥

उपनिषदुवाच ॥

सर्वभईते क्रोध मन, ऐसे कौन बखान ॥
कहे जीवकी मुक्ति यह, सकलविश्वकरहान ॥ १५७ ॥
तातैं नास्तकपंथको, एअब करे उचार ॥
केसनतैं याको गहो, करो भलीबिध मार ॥ १५८ ॥

चौपाई ।

पुरुष नारायण ईश्वर है जोई । तब मैं चीत चितान्योसोई ॥
कह्यो पुरुष ईश्वर है कोइ । तब करुणाकर जानोसोइ १५९ ॥
उपनिषतकह्यो जो आपनजाने । ताको उत्तर कौन बखाने ॥
हरषसंयुक्त पुरुष पुन कहे । किहबिध मेपरमेश्वर अहै १६० ॥
उपनिषतकह्यो परमेश्वर जोई । तोतेभिन्न नही पुन सोई ॥
तूं परमेश्वर नहीं न्यारो । ऐसे सदा चीत निरधारो १६१ ॥

दोहा ।

माया अहै अनादि जो, ताको संगति पाइ ॥
जल सूर्य प्रतिबिंबज्यों, भेदवंत दिखलाइ ॥ १६२ ॥
बहुरो पुरुष विवेक प्रति, कह्यो जोर कर दोइ ॥
भगवन अर्थ उपनिषतको, कह्योननिश्चहोंइ ॥ १६२ ॥

चौपाई ।

मैं अर्वच्छिन्न भिन्न पुन जोई । जरामरण धरमा पुन सोई ॥
नित्यअनंद चिदात्म गाए । परंब्रह्ममम रूप बतोंए १६४ ॥

कह्यो विवेक पदार्थज्ञान । अबलग तोहिभयो नहि भान ॥
 पदार्थज्ञान उपावसु जोई । कह्यो पुरुष अब भाषोसोई १६५
 कह्यो विवेक सुनो मनलाई । तोको देहु उपाइ बताई ॥
 तत्त्वंपदके अर्थ भनीजे । एकवाच्यपुन लक्ष कहीजे १६६ ॥
 वाच्य अभिन्न कदाचित नाही । लक्षमाहि विरोधसु नाही ॥
 लक्ष चिदात्म है ये जोई । सो मैयों उर चितवो सोई १६७
 निखल उपाधिसु दूर निवारो । बहुरो तत अर्थ निरधारो ॥
 तत्त्वमसि यों भाखे वेद । तातैं निखल मिटावे भेद ॥ १६८ ॥
 निखल द्वैतको दूर निवारो । चिदानंद उर आत्महि धारो ॥
 बहुर पुरुष उपनिषत अलयो । तिहउपरंत कहो क्याभयो १६९

उपनिषदुवाच ॥

दोहा ।

तबते सर्व सुदुष्टमति, मोहि फरनकेकाज ॥
 दौरीचारों ओरते, मैतब चाली भाज ॥ १७० ॥
 सीतापति रघुवंशमणि, रामशील यशभौन ॥
 जिह दंडकबनमै गए, तिह मैकीनो गौन ॥ १७१ ॥
 तिह मंदर परबतविषे, मधुसूदन असथान ॥
 ताहिनिकट जोदशामें, भई सुकरो बखान ॥ १७२ ॥

चौपाई ।

किंनहूमै भुजदंड प्रहारे । तोडि मणि करकंकण तारे ॥
 चूडामणि शीशते लीनो । खैंचे केश बहुत दुःख दीनो १७३

१ केईकपण्डितोंने, स्वधिविभक्तिरूप जो मेरेभुजदण्डहैं सो तोडडारेहैं तथा कंठकी मणिस्थानी अहंग्रह उपासनाहै सो फोड़डारीहै अर्थात् खैंचकर प्रतीक उपासनामें स्थापन करेहै औ करके कंकणस्थानापन्न निष्कामकर्म तथा वधिहै इनदोनोंको हरण-करेहैं और चूडामणीस्थानापन्न जो तत्त्वमस्यादिमहावाक्यहैं तिनको मतवादियोंने

दुरविदग्ध बहुता वनमाही । दासीकरन सुमैं उरचाही ॥
 विछुरी मम विवेक तेजान । बहुविधमेदुःखदयो अजान १७४
 कह्यो पुरुष बहुरों भयो जोई । मोको सगल सुनावो सोई ॥
 कहि उपनिषत सुनो मनलाई । तव मेरे हरि भये सहार्ई १७५
 तब मधुसूदनके असथान । निकसे पुरुष परम बलवान ॥
 लेकरगदा सगलतेडानी । तबमोको वहि छाडि पलानी ॥

राजोवाच ॥

दोहा ।

भागविहीन विमूढजे, करते अपमान ॥
 सहे न उरमै रंच बहु, जगसाक्षी भगवान ॥ १७७ ॥

पुरुष उवाच ॥

वैदुष्टा दशदिश गयी, दंडक विपिनमझार ॥
 तबते कौन सुबिधभई, मोको करो उचार ॥ १७८ ॥

उपनिषदुवाच ॥

चौपाई ।

गीताके आश्रमकी ओरा । दौरी मै उर डप्यो सुमोरा ॥
 नूपर टूटिपरी पथमाही । बरी जाय आश्रमकेमाही १७९
 तब गीता दुहिता मम प्यारी । पेखिकह्यो आई महतारी ॥
 मातमातयों मुखो अलायो । मैपद पंकजशीशु झुकायो १८०

शीशकी न्याई प्रधान-मुझ उपनिषदसे लीयाहै अर्थात् अंशअंशो, विष्कारविष्कारी, कार्यकारण, प्रकाश्यप्रकाशक, आधेयआधार, उपासकउपास्यादिक भाव ज्ञान कर अखंड अर्थका खंडन कियाहै तथा अवांतरवाक्यरूपी केश तिनवादियोंने मेरे खिंचेहैं भाव यहहै:-'सत्यं ज्ञानमनंतं ब्रह्म' इसअवांतरवाक्यमें सत्ताजातिमानीहै तथा ज्ञानादिक गुणमानतेहैं इति ।

■ चरणभूषण । २ मेरे चरणोंमें शिर निवाया ।

भलीभांति मुहि अकमिलाइ । हेमपीठ मै ल्यो बैठाइ ॥
भयोवृत्तांतनिखलतिनजान्यो । बहुर सुमोको एहु बखान्यो १८१

दोहा ।

मात डरो नहि चीतमे, तेरो कर अपमान ॥

दुष्ट यथेष्टमें रमेंजे, ताहि हने भगवान् ॥ १८२ ॥

चौपाई ।

श्रीपति यों मुख आप बखाने । दुष्टसुजे उपनिषत नमाने ॥
क्रूर नराधम हैं जग जेते । असुरयोनिमें डारों तेते ॥ १८३ ॥
सुनकर पुरुष अनंद तब भयो । यों मुखमाहि सुबैन अल्यो ॥
सुन्यो अर्थमै पूर्व जोई । उपनिषत करावत निश्चे सोई ॥

काविरुवाच ॥

दोहा ।

श्रवण मनन पूर्णभयो, निखल संदेह निवार ॥

निदध्यासनकी चाह उर, भई सुपुरुष उदार ॥ १८५ ॥

चौपाई ।

या अवसर निदध्यासन आयो । बैठ सभामै एहु अलायो ॥
विष्णु भक्तिने मोहि पठायो । तातै मै ईहाचल आयो १८६
गूढ हमारो आयसु जोई । उपनिषत विवेकप्रतिभाखो सोई
दोनोंको यह बात प्रकाश । पुरुषमाहि तू करीनिवास १८७ ॥

१ गीतामे कहाहै:-तानह द्विषतः क्रूरांस्तंसारेषु नराधमान् । क्षिपाम्यजस्रपशुभानासुरीध्वेययोनिषु । अथयह:-हेअर्जुन-द्वेषकरणेहारे तथा क्रूर तथा नरोंविषेअधम तथा निरंतर अशुभकर्मोंकूं करणेहारे पसेतिन आसुरप्राकृतिपुरुषोंकूं मैपरमेश्वर अत्यन्त क्रूर व्याघ्रसर्पादिक योनियोंविषे ही गेरताहूं । २ श्रवणनामाद्वैते ब्रह्मण्युपनिषदांता-त्पर्यावधारणम् । मननं नाम युक्तिभिरनुचिन्तनम् । निदध्यासनं नाम विज्ञातीयप्र-त्ययतिरस्कारेण सज्ञातीयप्रत्ययप्रवाहीकरणम् ।

बहुर बिलोकसु एहु बखानी । यह बैठी उपनिषत सुरानी ॥
 पुरुष विवेकसंग सुहाए । चलौनजीक सुदेहुसुनाए १८८
 ऐसवखाननिकट बहुगयो । उपनिषतसमीप सुवाकअलयो
 देवी विष्णुभक्ति है जोई । ताहि बखान्यो सुनियेसोई १८९
 संकल्पयोनि देवता सारी । यह नीकेमै आप निहारी ॥
 उपनिषतसंगर्भा अब तूं भई । कन्या तेउरमै निरमई ॥ १९० ॥
 और प्रबोधचन्द्र सुत जान । मेरो कह्यो सुसत्य पछान ॥
 क्रूरसुभावजु कन्या अहै । उपजी निखलसंबन्धी दहै १९१
 ब्रह्मविद्या कन्या जोई । मनमै करो संचारण सोई ॥
 संकषणविद्याको उरधार । मनके उदर कन्या डार १९२
 प्रबोधचन्द्र पूत पुन जोई । पुरुषसमर्पणकीज सोई ॥
 विवेकसहित तूं मेरे पास । उपनिषत करो अबसहजनिवास

दोहा ।

विष्णुभक्ति जोभाष्यो, सोई करौं न और ॥
 योंकहि संगविवेकके, गई इकंत सुठौर ॥ १९४ ॥
 निदध्यासन तब पुरुषके, कीनो आन प्रवेश ॥
 धन्यो पुरुष उर ध्यान तब, जाकर हरे कलेश १९५ ॥
 नेपथ्यमाहि प्रवेशकर, दोनो नयन मिलाइ ॥
 अद्भुतरूपध्याय उर, बोल्यो सहज सुभाइ ॥ १९६ ॥

१ संकल्पमात्रे उत्पत्ति है जिनोकी न मयुनसे तथा चश्रुति:- 'ब्रह्म वा इदमग्र आसीत्' इहासे आरंभकरके 'इंद्रसर्वमभवत्' इहांपर्यंत संकल्पप्रभवत्व दिखाया है वृहदारण्यकमें इसप्रकारमें योगसामर्थ्यजन्य ध्यानसे जाःया । २ विवेकके संकल्पसे । ३ जगत्का नाशक होनेसे क्रूरसुभाववाली है । ४ आत्मसाक्षात्कार रूपा । ५ योगकर आकर्षण-रूप । ६ निरतिशय ब्रह्मप्रकाशक ।

मन वक्षस्थल फोरकै, कन्या भई प्रकास ॥
 सहत समग्री मोहको, कीनो एकइग्रास ॥ १९७ ॥
 तडता समदमकी महां, दिशको तिमर मिटाइ ॥
 अंतरध्यानक्षणमै भई, ऐसो रूप दिखाइ ॥ १९८ ॥
 यह प्रबोधशशि उपज्यो, ताको भ्रात बिसाल ॥
 सभा प्रवेश प्रबोध तब, कीनो वाहूंकाल ॥ १९९ ॥
 कहांगयो किनभयो भव, लीन भयो ततकाल ॥
 जाउपजेते भयो यों, सोमै बोध बिसाल ॥ २०० ॥
 परकरमदेपिखभाष्यो, यहहै पुरुष उदार ॥
 चलों समीप सु याहिके, करों सुपाद जुहार ॥ २०१ ॥
 जाइसमीप सुपुरुषके, भगवनमुखो उचार ॥
 हौं प्रबोधउपनिषत सुत, बन्दो पाद तिहार ॥ २०२ ॥
 पुरुष विलोक आनंदउर, हेसुत परम अनूप ॥
 मिलोसु मेरे अंकमें, कीजे शीतल रूप ॥ २०३ ॥
 मिल्यो प्रबोध सुपुरुषको, शीतलचन्द उदार ॥
 पुरुष अनंद सुहोय उर, लागो करनउचार ॥ २०४ ॥
 अहो तिमर पट फाटियो, भयो प्रभांत अनूप ॥
 निखलकलेश बिनाशया, पायो परमसरूप ॥ २०५ ॥
 मोह अंधेरें बिनाशकर, नींद विकल्प सुमार ॥
 बोधशशि यह ऊपजो, जाकि प्रभा अपार ॥ २०६ ॥

सर्वैया ।

आज परातम पूरन जो, वहि पूरन रूप सुदेत दिखाई ॥
 बन्धन जो सभ दूरभये, रविसी उर अंतर ऊजलताई ॥

१ - संसारराज्यपगमाद्धोवः प्रातः क्षणो मत्तः अर्थयहः - संसाररूपी रात्रीके जानेसे बोधही प्रातःक्षण मान्याहै । २ अज्ञान । ३ भ्रमही निद्रा है ।

आज कृतार्थभूरभये, सुमिटी निजआतमकी कलखाई ॥
बोधकरे सभकाजसंपूरन, पूत सुपूतभये सुखदाई ॥ २०७ ॥

दोहा ।

श्रद्धा मति विवेक पुन, शांति यमादिक धार ॥
सर्वात्मप्रभविश्र जो, सोहम भए उदार ॥ २०८ ॥
हरिकी भक्ति प्रसादते, भए कृतार्थ रूप ॥
बन्धन सगल मिटाइया, पाए ज्ञान अनूप ॥ २०९ ॥
बैठ इकंत सुमोन गहि, मनकर कीनो ध्यान ॥
शांतिभयो भय शोकहन, भयो मोह सभहान ॥ २१० ॥
यांप्रबोधहित भवनतजि, भवें भवारण्यमाहिं ॥
ताकोपाइ सुमुनि भयो, मैं निजभवन सुमाहिं ॥ २११ ॥
विष्णुभक्ति आई तबै, उरमै हरष अपार ॥
आइ समीप सुपुरुषके, कीनो एहु उचार ॥ २१२ ॥
बहुत कालकर फले जग, मोहि मनोरथ आज ॥
शांतिअराति सुतवपिखों, भये सगल ममकाज ॥ २१३ ॥
पुरुष कह्यो तव कृपाते, कोफल दुहकर आहि ॥
ऐसै मुखो अलाइकर, पच्यो सुचरननमाहि ॥ २१४ ॥

दोहा ।

विष्णुभक्ति सुउठाय तिह, कीनो एहु उचार ॥
पूतकहो प्रयकाजकछु, पुन मैं करों तिहार ॥ २१५ ॥
पुरुष कह्यो अब याहिते, परे न प्यारे काज ॥
जीत अराति विवेकनृप, भयो कृतार्थ आज ॥ २१६ ॥

रुज बिहीन आनंदपद, थाप्यो ताहि सुमोहि ॥
विष्णुभक्ति पद बन्दना, करेकाज सभ तोहि ॥ २१७ ॥

सवैया ।

यद्यपि पूर्ण आहि मनोरथ तदपि मात सुएहु बरे ॥
रूचिके अनुसार करे बरषा, घनभूपति भूमिसुपालकरे ॥
तैंकरुणाकर लोक महातम, आतमको तम दूरहरें ॥
भवसागर धार बिषे ममता, गहि बोधजहाज सुपार परें ॥ २१८ ॥

दोहा ।

प्रत्यक् तत्त्व निज आत्मा, कीरति वरमाभूष ॥
मनोवृत्ति सभनाटकै, कोविद लखैं अनूप ॥ २१९ ॥

सवैया ।

यहनाटकहे रसुभूपतिके उर माहि सुभाऽसुभ ज्ञानभयो ॥
तजिया जगमाहिकुपंथ बडोशुभपंथ महीपति चीतलयो ॥
बिसमाय रह्यो उरभीतर सो सुशिलूषनको बहु दानदयो ॥
बहुनाटकहैं भवमंडलमें नरनाहनको यह नाटनयो ॥ २२० ॥

दोहा ।

कहनेको यह नाटकहै, दरपन अहै अचार ॥
पावै पावन मोक्षको, कीने याहि विचार ॥ २२१ ॥
गौरी जननी लोकमें, राया जनक महान ॥
गुलाबसिंह सुत ताहिके, नाटक कीन बखान ॥ २२२ ॥
कीरति पूरन लोकमें, पूरण परमानंद ॥
पूरन पद दातारप्रभु, बन्दौ श्रीरघुनंद ॥ २२३ ॥

जिह अज्ञान निवारयो, दीनो मोक्ष अपार ॥
मानसिंह गुरुचरनको, बन्दौ वारंवार ॥ २२४ ॥

शंकर छन्द ।

रस वेद औ वसु चन्द संवत लोक भीतर जान ॥
नभमास भृगु पुन वासरे दशमी वदी पहिचान ॥
गुरु मानसिंह पदारविंद अलंबना उरठान ॥
कुरुक्षेत्र प्राचीकूलतट यह कीनग्रन्थ बखान ॥ २२५ ॥

श्लोक ।

शुद्धाशुद्धश्च संशोध्य गुढार्थाश्च प्रकाशिताः ॥
अवशिष्टामशुद्धिश्च शोधयन्तु मनीषिणः ॥ १ ॥
गुरोः कृपां समासाद्य रचयित्वा सुटिप्पणीम् ॥
मया गुरुप्रसादेन गुरोः पादे समर्पिता ॥ २ ॥

इति श्रीमन्मानसिंह शिक्षितगुलाबसिंहविरचिते प्रबोधचन्द्रोदयनाटके
षष्ठोऽङ्कः समाप्तः ॥ ६ ॥

इन्दुस्कन्दाङ्कचन्द्रेऽब्दे द्वादश्यां श्रावण तिथौ ॥

वनखण्डप्रसादाख्यातसम्पूर्णा टिप्पणी शुभा ॥ १ ॥

१ अर्थ यह:-इसग्रन्थमें शुद्धाशुद्धका शोधन करके गूढअर्थोंका प्रकाश किया है तथा अवशिष्ट (बाकी) रहीहुई अशुद्धिको बुद्धिमान् पुरुष स्वयं शोधलेवे ॥ १ ॥
गुरुमहाराजजीकी कृपाको प्राप्त होयकर मैं गुरुप्रसादेन सुन्दरटिप्पणिका निर्माणकरके श्रीगुरुजीके चरणोंमें समर्पित कियाई । २ ।

इति श्री १०८ मत्परमानन्दोदासीन शिष्यगुरुप्रसादविरचिता प्रबोधचन्द्रो-
दयनाटकटिप्पणिका समाप्ता ॥ १ ॥ इति शम् ।

पुस्तक मिलनेका ठिकाना—

खेमराज श्रीकृष्णदास,

“श्रीवेंकटेश्वर” स्टीम् प्रेस—मुंबई.

